

表忠小志

余榮顯



表忠觀園



三二二一八 八八八六 六六五五五三序頁  
○七四九九全六五二九全四三九五四八二

勘  
誤  
表

七一二七九八三五六五五四六八二一一三行

一一四二一三一 一三二二二 三 一字  
九一四六二一一三三二一四五三八三一九九

旌方辟巽借邊雜安震救陸於月寃元土肅往正  
照 下 詩 民 下


衍方脫最詩曠雜民 衍賜有王免无土脫住誤  
文 盤 借 安 文 文 仍 字

MG  
K820.43



3 1764 4663 5

# 表忠小志序



凡爲天下事者爲民則公。公則安。爲己則私。私則亂。古今中外。其理一也。唐末盜賊蜂起。武肅王以布衣提三尺劍。削平大亂。奠定吳越十四州。保全境土。爲民謀利。築塘捍海。以免其魚之歎。爲民也。興農桑水利。使閭閻富庶。爲民也。不填西湖。以資灌溉。而充飲料。爲民也。其他爲民惠政。筆難縷述。尤以武肅王未納羅隱討朱梁之諫。不欲以一己之尊榮。使人民於塗炭。遂屈意受命。以當時吳越地方千里。兵甲之強。珠玉之富。天下莫與京。如逐鹿中原。統一字內不難。武肅王不忍與師動衆。勞民傷財。薄帝王而不爲者。亦爲民也。文穆忠獻忠遜諸王。均能恪遵遺訓。拱衛社稷。福利民生。至忠懿王見趙宋興國。卽納土歸朝。並助太祖先取金陵。使國家統一。設忠懿王聯合江南。以抗宋師。成敗雖未可知。但兵連禍結。民不聊生。則可斷言。忠懿王不欲與兵殺戮。視版圖如去傳舍。更爲民也。夫以秦始皇之雄。併吞六國。焚書坑儒。大失民心。二世而亡。項羽百戰百勝。終不敵劉氏約法三章。能以收拾民心。故有烏江之死。由此觀之。立國之道。苟爲民謀。方能久安長治。回憶吳越時。斗米十文。人民安居樂業。老死不知兵革。今世何世。追念前王。應有以表彰之。此表忠小志之所由作也。此志由保管委員會主編。書成丐余作序。略敘梗概。以告當世君子。如蒙寵錫宏文。將來復印。更爲完善。抑余尤有進者。民國肇造。方鎮擁兵。日事侵略。而江浙又當四戰之地。僉曰有能致地方於乂安者。亦今之武肅也。家王能以保境安民。故得謳歌萬姓。廟食千秋。深冀後世之握軍符操政柄者。有所觀感則效焉是爲序。 中華民國三十七年歲次戊子冬月錢武肅王三十二世孫

文選士青甫謹序時年七十有五

## 序二

創業難。而能終達成功。爲後世景仰則尤難。蓋自古偉人。乘一時際會。展個人才智。而創造驚世之勳業。其成固極艱辛。然大業草創之後。往往因私見太深。俯視流輩。自以爲天下事。均得以強力取之。於是不畏民怨。不納忠告。終至手創之業。仍毀于瞬息。且至爲後世詬病。此賈誼過秦論所以作也。是以歷史英雄。不難於始創之業。而艱於終成之功。必也。除私見。以民意爲歸。祛私利。以民利爲先。親賢遠佞。審時度勢。書曰。民爲邦本。本固邦甯。明乎此。庶足以成不世之勳業也。吾祖武肅王奠定吳越。歷五王。傳世百年。豐功偉烈。炳于史冊。自宋迄今。文章鉅子。更代有歌頌。固無待縷述矣。然有謂吾祖不以兵力定汴京。而成大一統者。不知者五代之季。列國紛爭。生民塗炭。惟我先王保境安民。以民生爲重。奠吳越千萬年富庶之基。故傳世雖僅百年。然其利溥于民。至今千餘年。民猶戴德銘恩。使當時先王好大喜功。惟求國境之擴展。而不顧念民生之痛苦。吾知縱幸先宋而成一統。然其爲後人所銘戴。或竟不如吳越十四州也。否則何以至今後人惟崇祀表忠觀。而未室之君。竟無寸椽。亦無人追憶宋一統之恩德也。吾故曰。不難于始創之業。而艱於終成之功也。

民國三十七年冬裔孫諱厚哉甫謹序

# 表忠小志目錄

|           |      |
|-----------|------|
| 序         | 一—二  |
| 像贊        |      |
| 五王像贊      | 一—六  |
| 姿烟閣武肅王畫像  | 七    |
| 圖考        |      |
| 吳越王寶      | 八    |
| 武肅王功業圖    | 九—一九 |
| 張翥題詞吳士鑑題詩 | 二〇   |
| 吳越國境圖     | 二一   |
| 鉄券及乾隆御製歌  | 二二   |
| 謝鉄券表      | 二三   |
| 銀龍筒及疏     | 二四   |
| 金塗塔       | 二五   |
| 銅爵圖       | 二六   |
| 武肅王遺墨考    | 二七   |
| 忠懿王遺墨考    | 二八   |
| 功臣山墓園     | 二九   |

表忠小志 目錄

|           |       |
|-----------|-------|
| 武肅王墓園     | 三〇—三二 |
| 文穆王墓園記    | 三二—三三 |
| 忠獻王墓園記    | 三五    |
| 太廟山祠墓基記   | 三六    |
| 宸翰        |       |
| 賜鉄券詔      | 三七    |
| 賜武肅王諡詔    | 三七    |
| 宋太祖敕諡仍舊武肅 | 三八    |
| 賜武肅王竹册詔   | 三八—三九 |
| 賜文穆王玉册詔   | 三九—四〇 |
| 賜忠獻王玉册詔   | 四〇—四一 |
| 贈忠遜王敕     | 四一    |
| 賜忠懿王玉册金印詔 | 四一—四二 |
| 賜忠懿王諡制    | 四二—四三 |
| 允納土詔      | 四三    |
| 年表        |       |
| 五王年表      | 四四—七五 |

家訓

八訓及選訓……………七六一七九

遺文

築塘疏……………八〇

謝欽券表……………八一

勸董昌仍守臣節書……………八一

復邗溝楊氏書……………八二

忠懿王恭繳版圖表……………八三

黃妃塔碑記……………八三

五王詩……………八三—八六

軼事

五王軼單……………八七—九四

古蹟

古蹟及駐軍表……………九五—一〇三

藝苑

表忠觀碑記(蘇軾)……………一〇四—一〇五

論五代史書武肅王事(文天祥)……………一〇五—一〇六

武肅王傳(劉基)……………一〇六—一〇七

重修表忠觀碑記(阮元)……………一〇七—一〇八

重修西湖錢王祠碑記(陶鑄)……………一〇八—一一〇

西湖錢王祠落成序(許世英)……………一一〇

西湖錢王祠落成紀念(齊耀珊)……………一一一—一二〇

重修文穆王神道碑記(錢文選)……………一二一—一二三

重修忠獻王墓碑記(錢文選)……………一二三—一二四

武肅王未納羅隱討朱梁之諫(錢文選)……………一二四

清高宗等詩……………一二四—一二六

清乾隆等……………一二六—一二六

聯額

呈市政府祠產作旌功糧文……………一二七

杭市政府通知准作旌功糧……………一二八

杭州錢王祠產簡明表……………一二八—一三〇

臨安縣准將祠產作旌功糧列表通知函……………一三〇

臨安錢王祠管業證一覽表……………一三〇—一三四

雜錄

保管西湖錢王祠委員會規則……………一三五—一三六

保管西湖錢王祠委員會委員名單……………一三六

保管臨安錢王祠委員會委員名單……………一三六

西湖祠祭日期……………一三六

臨安墓祭日期……………一三七

墓所 附記……………一三七—一三八

像贊

宋理宗勅贊吳越忠烈武肅王

武肅王像



大人虎變。君子龍潛。承家開國，峻德惟立。我瞻王顏。喬嶽泰山。俎豆吳越。

表忠小志 像贊

威振華夷。功揭天地。一代英雄。千載廟祀。有俊斯存。凜然生氣。端平二年三月十一日御書

鍾天之秀。踞地之英。奔奔其貌。炯炯其精。奮臂一呼。風舞雲生。射潮逆流。呼天晦星。兵行神武。妖氛殄平。一方慈父。千里藩屏。歡聲雷動。喜氣霞蒸。遺容赫弈。浩氣長伸。吳臣越庶。瞻仰弗勝。禮部員外郎知淮陽軍米芾拜題

黃庭堅題

匹馬一呼。奄有吳會。橫而藏之。百年有待。子孫其昌。生民永賴。衣錦故城。山川不改。眉山蘇軾敬贊。

攜彤弓射天狼。仗黃鉞誅反仄。奠安康庶。馭閩吳越。厥績懋哉。旂常應劭。金冊誓書。千秋如覲。我瞻王像。燕領隆準。穆如天神。桓文是匹。何以頌之。聖賢豪傑。

紹興四年正月安民端難功臣贛鄂等處觀察兼營田招討等使開府儀同三司武昌郡開國公岳飛敬題

吳越之鄉。乃王封疆。俎豆於廟。劍佩於堂。龍飛輔宋。豹變興唐。光昭史乘。於穆賢王。圓形巖閣。虎步龍驤。有美文孫。鳳羽鸞章。箕裘不墜。食采吳閩。乃摹先型。玉質金相。馭牛瞻仰。夙見羹臠。再拜稽首。流筆稱揚。

淳化三年四月梅溪王十朋拜題

五代之季。羣雄僭竊。當宇宵旰。擁抱虛器。而王獨能去獎公室。翦滅兇頑。以修職貢。來賓王庭。昔齊桓一匡九合。率羣牧而朝周天子。以彤弓黃鉞錫之專征。而唐后以金冊誓書賜王世守。其功業榮遇。又不啻過之。內府向有武肅王真像。乃摹後唐明宗朝長興間內庭供奉張昉使吳越時所寫之本也。天聖間賜王之孫文僖公惟演。歷代寶藏。今翰林學士裕之乃文僖曾孫。因以王之真像。及蘇子瞻岳鵬舉王龜齡三公真蹟像贊見示。遂浣筆志之。

慶元六年三月上海新安朱熹敬題

贊曰。五代之季。揆揄食人。爰篤我祖。救一方民。池龍神表。山石奇徵。芒碭雲氣。蠓蜒潛形。允文允武。戡亂夷庚。以寡擊衆。用兵若神。破巢戡剽。昌復就擒。威振杭越。開府酬勳。戎車嘽嘽。武士雲屯。當關虎豹。畫閣麒麟。河山帶礪。交繡等纒。乃定姑蘇。乃築越城。氣吞江海。怒射潮平。保境字吐。兵革不驚。桑麻徧野。民樂安寧。乃返故鄉。省臺巡軍。林木暮錦。父老箴迎。沛宮張飲。歌入風雲。好樂無荒。有大不盈。粉盤簪枕。業業兢兢。以介景福。三壽作朋。益斯麟趾。振振繩繩。第廿七子。啓封嘉興。爰及苗裔。不置家聲。惟予小子。實屬雲祲。作詩頌德。以告後人。

嘉興侯谿孫士升謹述

二十二世孫文選敬摹並錄

文穆王像



宋理宗勅贊文

穆王

桓桓武威。鎮於南甸。肅肅德容。受天之眷。淮南兩捷。楚浙三戰。一鼓收功。仗儀入殿。端平二年二月十一日

御書

創業甚難。守成不易。三年不改。惟茲臣庶。天鑒不遠。必謹必慎。不早不蝗。不殺不利。眷此英果。率德仁恕。大哉皇言。光映德裔。

韓世忠敬贈

時惟五紀亂何如。史冊閒觀亦皺眉。是地却逢錢節度。民間無事看花嬉。

趙抃敬題

武肅王三十二世孫  
文選敬摹并錄

忠獻王像



宋理宗勅贊忠

獻王

興邦保運。崇德具道。  
元惡是懲。哲人是好。  
仁行智守。善述善紹。  
端平二年二月十一日

御書

保國惟貞。勤王惟誠。  
傳曰畏天。繼緝休明。  
東南重望。吳越福星。  
允文允武。厥精厥神。  
威揚八表。不令而行。

參知政事范仲淹題

武肅王三十二世孫

文選敬摹并錄

忠遜王像



表忠小志 像贊

宋理宗勅贊忠

遜王

戀忠崇重。宜懿翊戴。樹績植功。惟其所在。乃業弗大。而壽弗永。惜哉。

端平二年二月十一日

御書

學窺先天。行履貞素。至大至剛。不憂不懼。治朝之忠。亂世之雄。百年間氣。千古攸鍾。

歐陽修題

威儀濟楚。像貌儼然。允文允武。垂裕後賢。嘉熙二年中和節宮政殿大學士魏了翁題  
天福有德。克鞏克昌。子子孫孫。弗替引長。衡山居士文徵明敬贊  
武肅王三十二世孫  
文選敬摹并錄

忠懿王像



宋理宗勅贊忠

懿王

安時鎮遠。耀武宣德。納彼仁壽。赤心報國。俾西齊融。立我之匹。河平二年二月十一日。御書。

王形則偉。廢相弗傾。祥雲助順。神龜發誠。提兵若脫。帶礪如新。芥從密識。白麻敵增。黃帝子。雍和樸敦。班聯帝真。龍極人致。慈愛情真。唐寅敬贊。

破景迎周。以國入覲。富甲東南。臣事惟謹。三世五王。公守其成。西湖水滸。至今名。翰林學士司馬光題。武肅王三十二世孫。文選敬摹并錄。

凌煙閣武肅王像

凌煙閣功臣圖



凌煙閣功臣圖  
 凌煙閣功臣圖  
 凌煙閣功臣圖

凌煙閣功臣圖

凌煙閣功臣圖  
 凌煙閣功臣圖  
 凌煙閣功臣圖

表忠小志像

七

圖考 吳越王寶考

錢氏家乘內載梁末帝龍德三年癸未二月敕賜武肅王吳越國王册封。暨建國之儀。三代俱册封。更王所居之第爲宮殿。王之夫人册

五代吳越王寶



影置於編首。此書尙有存者。茲值重印家乘。特將攝影之寶。補列圖考門內。是則品質雖渺。跡象尙留。足垂永久紀念。或者神靈呵護。他日珠還合浦。劍掘豐城。亦未可知也。己卯春日文選謹識。

封曰妃。府曰朝。屬官皆稱臣。四月唐莊宗卽位。改元同光。有耕者得傳國璽以獻。武肅王曰。此天子所用之寶。非臣下所宜留。乃表獻於朝。五月遣使宣諭。賚王裘馬玉帶等。册封王吳越國王。詔敕不名。稱尙父。二年武肅王遣使入貢。仍敕授王天下兵馬都元帥。得專征伐。溯自龍德三年癸未。至民國丁丑。蓋已一千八百年矣。此寶原藏於余處。是年冬杭州遭兵燹失去。幸余所編吳越錢氏傳芳集。已將此寶攝

武肅王功業圖



三十二世孫文選恭輯

誕降奇徵

錢武肅王諱鏐字具美。浙之臨安人。英顯王之長子。先是唐大中五年旱。邑令命羽士東方生起龍禱雨。生曰。茅山前池有龍。然不可起。起必大異。明年復旱。又召生起龍。生指王居曰。龍生此家矣。誕王之夕。英顯方他往。鄰人走告曰。君家後庭甲馬聲甚衆。豈有盜乎。英顯馳歸。赤光滿室。而王育矣。英顯以爲不祥。欲棄之井。祖母留之。故王小字婆留。而井亦緣以名。

畢懋康



石鏡瑞應

王生而神表偉麗。識度  
過人。嘗集羣兒戲樹下  
。坐石上指揮羣兒。別  
隊伍。羣兒奉命肅然。  
憩山之陰。見一石屹然  
自立。王曰吾貴當封爾。

晉昌唐世濟



異人望氣

頭陀洪澤者。王遊觀候  
 寺門。王避之他徑。澤  
 復迎焉。王怪問故。澤  
 曰。漢高遊而雲蓋其上  
 。呂后嘗得之。君是其  
 人。不難知耳。及壯不  
 事家人產。好鹽策。縣  
 錄事鍾起有數子。并從  
 王飲博。起嘗禁之。會  
 豫章有望氣者遊錢塘。  
 以相法隱臨安市中。陰  
 求其人。得起曰貴矣。  
 未足以當之。起因置酒  
 會賓客。令徧閱之而不  
 得。最後王至。相者望  
 見。即大驚曰。此真貴  
 人。起笑曰。此吾屬舍  
 錢生耳。相者正色顧起  
 曰。君之貴因此人。毋  
 相狎也。起繇是陰厚王  
 。縱諸子與王遊。  
 洋州李遇知沫手謹書



計走黃巢

僖宗乾符三年。浙西裨將王郢作逆。時董昌戍石鏡鎮。募鄉里健卒。表王爲偏將。擊破郢。而黃巢且擁衆掠浙東。王計巢衆我寡。須設奇計破之。伏銳卒二十輩山谷中。巢前軍皆單騎。崎嶇而前。王弩斃其將。伏發。賊遂大潰。王曰幸勝。可張虛聲却之。引兵屯八百里。八百里者。山谷中小地名也。召里媪語之曰。賊有間。第言臨安兵屯八百里。賊聞相顧愕曰。嚮數騎不能當。況八百里乎。急引兵去。昌仍集諸縣兵爲八都。而以王爲都指揮。使領之。梁南勝峯主人陶珙書

禱天討賊




廣明二年淮南都統高駘  
 表昌爲杭州刺史。時越  
 州觀察使劉漢宏與昌有  
 郟。屯兵西陵。以覘浙  
 右。王率八都兵夜襲之  
 。月白如晝。迺擲江沙  
 吞之。禱曰。吾以義討  
 賊。天見助。必霧而濟  
 我。俄而雲霧四塞。遂  
 渡江。縱火斫營。殺傷  
 無算。宏僅以身免。四  
 年僖宗遣中使與杭。越  
 平。宏不奉詔。殺中使  
 。王復敗之曹娥埭。遂  
 入越執宏斬之。事聞晉  
 昌越州觀察使。拜王左  
 衛大將軍杭州刺史。  
 無邊居居士唐時宜  
 之父敬書



### 築城射潮

梁開平二年。授王太師  
守中書令。四年築錢塘  
城。江濤衝激莫能就。  
王命強弩射潮。潮趨西  
陵。而城以完。

王錫袞



還鄉作歌

四年巡衣錦軍。製還鄉  
歌。歌曰。三節還鄉挂  
錦衣。吳越一王駟馬歸  
。臨安道上列旌旗。碧  
天朗朗愛日暉。父老遠  
近來相隨。家山鄉眷會  
。疎稀。牛斗無孛人無欺


王思任



### 胙土封王

光化元年。改王鄉曰廣義。里曰勳貴。營曰衣錦。詔圖王形于凌烟閣。中尉劉季述等幽昭宗。立德王裕。遣使進王東安王。王不受。天復元年。昭宗反正。授王侍中。賜御衣。二年。王巡衣錦軍。燕享故老。山林卉木皆以錦幕之。天祐元年。封王爲吳王。四年。梁篡唐。遣使宣諭。封王爲吳越王。時鎮海軍節度判官羅隱說王。舉兵討梁。王曰。吾知息民耳。民誠安。吾何難爲之下。梁亦畏王英武。賜名馬玉帶。以交驩于王。

廣陵後學范鳳翼敬書



恭儉持盈

王撫國四十一年。勤儉  
抑畏如一日。在軍中枕  
圓木以自警。又嘗發銅  
丸于外。以警宿直者。  
每寢置粉盤其側。思有  
得卽書。天性仁儉。寢  
帳敞。恭穆夫人請易之  
。竟不易。暇時賦詩示  
將相。除夕宴諸王子。  
曲奏數闕。輒罷去。曰  
得無開長夜飲乎。

香山李孫宸書



### 保民享國

時中原多故。蜀王氏。吳楊氏。漢婁氏。闕王氏。皆竊大號。以龍衣玉册進王。王拒不納。恪守臣節。保全境土。當五季戰爭之場。而江以南獨得免於燐青骨白之苦。其福庇斯民甚厚。唐莊宗長興三年王寢疾。撫文穆曰。將士推汝。宜善守之。又曰善事中國。無失大禮。享年八十有一。在位四十一年。勅葬臨安衣錦鄉茅山之原。

崇禎六年癸酉中秋日  
史氏毗陵鄧鄂敬書



# 威振華夷 功揭天地

張  
謇  
題

納土歸朝後魏我勒表忠州民憬  
 遺澤遙裔述豐功正朔存唐麻飛  
 揚邁漢風蟬嫣南族盛食報古今  
 隆 鐵券鐫銘舊金塗鑄像留匪  
 惟文字壽更向畫圖挾王氣餘天  
 目宏編出秀州千煠程史在載筆  
 待重裛

錢武肅王功業圖明崇禎丙申之相國所刊長三百年矣

士青仁兄先生同出一源世歲勿失癸亥嘉年重付裛池

命題前未謹綴二律以志欽仰 錢塘吳士鑑拜識






### 古吳越境圖并

### 吳越國境圖說

吳越國境。東瀕大海。西隣歙州。南連漳泉。北達常潤。保有十三州一軍之疆土。東膺西府。控抱襟喉。爲兩浙分疆之始。而西府尤當水陸之衝。舟車輻輳。尤稱東南一大都會。自納土以來。迄今八百餘年矣。吳越全境猶得以繪圖攷之。若謂游覽歌思之一助也。亦可爾。

錄錢氏家書

鐵券攝影



乾隆御製觀鐵券歌

表忠觀永記我漢書... 在台朔莊久期其名未起... 物秋御周族今呈好鑄鐵... 如瓦勒金字乾寧歲月猶... 存唐皇帝若曰谷爾... 昌德係為昏狂放壤免罪... 江表履清肅秦保餘杭... 出錫金版永延社克保富... 賢榮寵長恕卿九苑子三... 死承我信誓欽毋忘德... 利餘字漫漶鐵猶如此人... 何方龍門致誚茶礪誓... 宋轉眼為新正俊際談時... 肩弗較善存桑梓功斯... 其皆鐵券因不出南遷後... 出方壇赫佐謬裝匣付珍... 奔所嘉謝表為謙光... 觀錢錄鐵券佳歌... 乾隆壬午御製

按唐昭宗乾符四年... 此已四宗... 至戊寅... 乙未... 子... 五... 年... 間... 復... 三... 覽... 錢... 存... 國... 四... 亥... 曾... 縣... 鎮... 拜... 券... 形... 共... 五... 字... 謹... 文... 識... 。

武肅王謝鐵券表 (羅隱代劉青田跋)



表忠小志 圖考

錢武肅王謝鐵券表

記略

民國丁丑杭州浙江圖書館開展覽會。見有同學葉譽虎先生將此表展覽。細釋詞句。大致與錢氏家乘中所載相同。但其中有兩句稍別。即『永保私門』一欄下。家乘云。『最以功名。申諸帶礪。』此表云『屈以常刑。有其必死。』家乘具名係『臣鏐誠惶誠恐。稽首頓首。』此表云『謝恩表具上羅隱頓首代脫。』并有乾寧丁巳十月吉等字。詞異義同。並垂不朽。葉公云。唐人墨跡傳世至稀。江東書尤僅此。故此表實為稀世珍品。下列明代劉青田跋語。均足寶貴。茲值家乘重印。特一併攝影補入。以資參考。己卯春日文選謹識。

### 太湖龍神疏

大道弟子天下都元帥尚父守中書令吳越國王錢鏐年七十七歲。二月十六日生。自統制山河。主臨吳越。民安俗阜。道泰時康。市物平和。遐爾清晏。仰自蒼昊降佑。大道垂恩。今則特詣洞府名山。遍投

龍簡。恭陳醮謝。上答鴻恩。伏願合貝告祈。兼乞鏐王申行年。四時履歷。壽齡遐遠。眼目光明。家國興隆。子孫繁盛。志祈叩祝。尤協投誠。謹詣太湖水府金龍驛。傳於吳越國蘇州府吳縣洞庭鄉東皋里太湖水府告文。實正三年歲在戊子三月丁未朔二十六日壬申投

### 吳越銀龍簡




太湖漁人於風初網得質銀。洞庭蔡氏賣而藏之。及蔡氏式微。子孫以之銘分。詎意拓本絕無而僅有。字跡永不磨滅。文云。七十七行年壬申。攷之王祖生于宣宗大中六年。至天成即實正三年。適符七十七之數。莫于明宗長興三年。亦符八十一歲。較之五代史相同焉。二十六世裔孫世倫謹識。

謹按此簡。相傳乃

張燕昌金塗塔識

右金塗塔。即朱氏曝書亭集所載錢武肅王金塗塔是也。按錢氏表忠譜。塔高六寸。重三十五兩。陰有


金塗塔圖



文云。吳越國王錢弘俶敬造八萬四千寶塔乙卯歲記。凡一十九字。下有一保字。外畫象作飢鷹餓虎狀。今燕昌縣於桐鄉金鄂岩比部家顯識畫象與表忠譜俱同。惟保字金所見作人字。按紹定間程瑛龍山勝相寺記。吳越忠懿王用五金鑄十萬寶塔。以五百遺傳頒日本。據此則武肅未聞鑄塔。而竹垞以為武肅王何邪。云八萬四千者。水經注阿育王欲破塔作八萬四千寶塔。蓋佛家言三千六千者奇數之極耳。又按數千者稱數之極耳。及吳越國王四面畫象俱全。及吳越國王於承周青士之詆耳。


古銅爵記

始祖武肅王。在唐朝授吳越國王爵。貴顯彌極。褒錫彌崇。封父爲太師英顯王。曾



詢以世藏寶爵如故乎。曰如故。因整衣冠焚香拜觀。爵高五寸許。三足特立。兩耳巍峨。背鑄方印錢。氏世高宗廟六字。審其銅質之斑爛。字畫之遒勁。決非後八所能摹仿。真吾家舊物也。紹南得有是爵。當與天台九一公之寶藏鐵券。共垂千古矣。松仁謹記。

祖爲太尉建初王。曾祖爲尚書洪聖王。史記世家。粲然可徵。迨梁開平四年。太祖皇帝敕建三世祖廟於臨安。唐同光紀元。莊宗皇帝御駕致祭。命以西關寶殿。建吳越太廟。上諭中使置祭器。迄今幾及千年。簠簋盞豆。散軼罕見。惟我邊錫鼻祖尚父公。遞傳唐朝御賜古銅爵一卮。至二十五世孫君惠。猶恆守之。癸未春特至青陽鎮南星橋右。得晤君惠公之七世孫紹南。亦文墨中人也。



### 武肅王遺墨考

此牒文首載天下都元帥。末具都元帥吳越王。係梁末帝龍德二年十二月所頒。迄今屈指計算。已有一千二十一年。唐人墨跡傳世至稀。此牒尙得保存。完好無缺。誠堪寶貴。牒存浙江象山祠中。民國甲子余編輯錢氏家乘。尙未覓得。故付缺如。嗣承象山族人攝影寄杭。復遭丁丑兵燹失去。茲值重印家乘。再向象祠索得付梓。略誌顛末。以資考證。而永紀念。

己卯春日文選謹識。




忠懿王遺墨考

錢氏三世五王。享祚九十八年。武肅王撫治吳越最久。次即忠懿王。而忠懿王納土歸朝。使趙宋得以完成統一。兵不血刃。天下安堵。其有功於斯民。遠出竇融張軌之上。錢氏處處以尊君親重黎庶為心。觀寶慶禪院僧崇定上奏忠懿王。其中亦有所冀功德上報君親之道。次及黎庶之語。正與王意相合。惜王判詞早經失去。而不能以窺全豹。然觀此奏中有忠懿王草書風字及付執二字。筆力之雄偉。亦可略知大概。胡德制宗憲所題二王手澤。已言之詳矣。茲一併攝影附入家乘。庶與武肅王墨蹟。並垂不朽云。

己卯春日文選謹識。

# 臨安功臣山考

考功臣山舊名大官山。係武肅王祖墓。乃發祥之地。墓址坐落臨安縣錢塢壩。占地極廣。前清時豁免錢糧。民國無此例。文選堯權錢唐。於民國十一年呈請飭文。積一萬二千一百七十一石五分。計五十畝零七分一釐四毫。由錢氏承糧。墓碑亦捐資修復。上書錢武肅王祖墓。下署裔孫文選敬立字樣。四至載明錢氏家乘。凡四水歸內之山皆是。坐山右邊。有功臣塔。高插雲漢。憑城一望。巍然在目。山勢蜿蜒。鬱氣嶽奇。衣冠



藏埋。歷久如故。緬懷祖德。穆然神遠已。文選謹誌。

表忠小志 闕考

### 武肅王墓域考

考武肅王墓。咸淳臨安志稱。在臨安縣城北廿三步。吳越備史則云。敕葬王於安國縣衣錦鄉茅山之原。萬曆府志稱。正德間知縣慶瑜建外門三楹。今墓在縣治東五十步。以安國山爲金屋。分三脈。中脈爲王墓。大清一統志云。安國山一名太廟山爲主山。在縣治東北。武肅建城於此。則所謂安國山者。尙在此山之北。此特中抽一脈。殆即備史所謂茅山之原也。墓左舊有錢王太廟。今已湮廢。又有五祖大小二廡室。今圮入關



帝廟內。臨安在三國吳時。爲臨水縣。晉武帝始改臨安。歷隋至唐。廢置不一。迨入吳越。奏改安國。武肅又以素所居營。爲安國衣錦軍。萬曆府志。稱舊城依太廟山。周五千五百六十步。錢王時名衣


錦城。今之縣治自洪武初始移。地名東市。蓋在宋治西暨之東也。其地平曠。乃始建治。乾隆乙丑冬。邑侯滇南李公元蒞任。公餘見二堂左角時有異鳥翔集。且循厓若道。覺空洞有聲。因就空穴處。令人持炬從之。深入丈許。穴屋寬敞。行數十步。磚甃完固。見有券碑及傳。知此爲武肅王葬所。既出。遂滿蓋淨土。就堂改祠。以祀錢氏五王。聽邑人奉香火。并立石表之曰錢王墓。自爲文勒石紀之。聞當時李公本欲移治他所。改治爲祠。阡表王墓。緣事關公署。移改非易而止。其後邑侯絳州趙公民治謂神人不並治。墓可存疑。而堂不可爲祠。因移祠於舊墓前。垂成調去。嶺南殿公天召繼之。三十一年工竣。立石祠中。祠前爲戲臺。卽正德所建外門三楹之址。邑人每歲時報賽焉。其李公所立墓碑及記。移於治後西北隅。建亭覆之。嘉慶三年錫山裔孫等恭詣臨安。展謁祠墓。宗長國勳引至二堂。指示王墓所在。詳述前事。亟錄李殿二公碑文以歸。遂附記於墓圖之末。蓋當時墓域本在衣錦營北原。地甚寬平。石人石獸。華表屢闐列於神道。而葬所相距五十步。事誠有之。不足疑者。先時必有高坟可識。迨明初已閱數百年之久。蹤跡無存。致有徙治之事。惜乎李公碑所謂券碑及傳。未經錄出。不能考其文也。（節錄臨安縣志。）

按臨安縣署中偏左。供有先武肅王神座。朔望由知縣敬香。余緣核浙巖。王戎春赴臨安祭墓。知事余允貞君導余拜謁。神座旁隧道。直達二堂之下。云係武肅王潛宮所在。卽乾隆時知縣李元探穴封固立碑之處。二堂年久失修。勢將傾覆。余知事擬重修。既壯觀瞻。且保陵寢。惟呈省請款。久未核准。囑余設法維持。比回省卽向省署力言之。始撥款修復。不幸丁丑寇至。全署被燬。歲戊子經楊維禱縣長重建之。並於署後山畔建亭。囑余題之。余名之曰錦亭。并附聯云。山起天目玲瓏地。靈人傑。亭對功臣石鏡鳳舞龍飛。

戊子文選謹識

文穆王墓圖記

文穆王葬於杭州龍山南原。即今江干玉皇山之麓。有吳越國文穆王碑矗立墓前。每歲上巳及重九。爲



- (一) 北三弓七分。東西各二十九弓六分。南七弓二分。中間自東至西九弓。(二) 南八弓九分。(三) 東西各十弓三分。北八弓九分。南十一弓九分。(四) 東西各九弓三分。北南各十弓三分。(五)

裔孫祭掃之日。墓右獅子山上。原有 忠獻王墓。年久湮沒。石人石馬牌樓。均坍塌不全。自天打斷至墓約二里許。文穆王神道碑。及頭城門墓址尚在。宋時墓域極廣。有二百頃之譜。今將墓田共三十畝七分一厘一毫九絲五忽。記明弓丈。以圖中地位狹小。特簽號碼。分別詳注於下。以資查考。乙丑孟春裔孫文選謹識。


東十一弓半。南八弓九分。西十弓九分。北九弓六分。(六)東九弓三分。南九弓六分。西九弓四分。北八弓九分。(七)南五弓。中間自南至北七弓。(八)東西十一弓三分。南北八弓七分。(九)東八弓五分。南五弓七分。西九弓四分。北五弓。(十)東西各二十一弓六分。南北各八弓半。(十一)東西各九弓八分。南北各五弓七分。(十二)東西各十二弓。南北各八弓九分。(十三)東西各二十一弓四分。南十弓四分。北十弓四分。(十四)中間自東至西八弓五分。中間自南至北八弓七分。(十五)東二十八弓。南北各十八弓九分。西二十八弓九分。(十六)東西各三十一弓半。南北各二十六弓八分。(十七)東十八弓九分。南六弓三分。北二弓四分。中間自東至西五弓九分。(十八)東十九弓九分。南二十二弓。西二十五弓一分。北十七弓九分。(十九)東西各二十八弓九分。南十八弓七分。北十八弓九分。(二十)東西各二十三弓一分。南北各四弓八分。(二十一)東四弓六分。西五弓半。南北各八弓三分。(二十二)東二十一弓二分。南九弓八分。西三十九弓半。北七弓三分。(二十三)東西各二十七弓。南九弓三分。北十一弓八分。(二十四)東七弓七分。南九弓八分。西八弓半。北八弓二分。(二十五)北七弓二分。中間南至北十弓九分。(二十六)東至北八弓半。南西各八弓半。(二十七)東西各八弓半。南十二弓二分。北十二弓六分。(二十八)東西各十七弓二分。南北各十六弓七分。(二十九)東十八弓。南五弓七分。西十四弓。北五弓七分。(三十)元號田東七弓二分。南北各二十八弓九分。西五弓四分。(三十一)元號田東五弓四分。南北各十六弓九分。西七弓四分。(三十二)二號田。(三十三)光緒十六年九月日鏡塘縣盛鑑冊屏重修告示碑。(三十四)天打斷至錢王墓約計二里之程。(三十五)此處有石人石馬牌樓均坍塌不全。忠獻王之墓已無形跡可稽。(三十六)此路旁地上有石人石馬駝龍碑。均皆坍塌不全。澗頭城門約一里之遙。(三十七)

骷骨塚。(三十八) 骷骨塚東九弓四分。南五弓。東三十二弓四分。南二十三弓三分。西二十九弓六分。北大東港十七弓一分。西南角三弓九分。西南角尖三弓七分。合二畝八分六厘五毫。(三十九) 東二十五弓六分。南二十一弓七分。西二十三弓。北西小港二十弓一分。別竹園東四弓三分。西三弓半。北九弓六分。合二畝四分二厘三毫七絲一忽。(四十) 別竹園。(四十一) 東十五弓二分。十四弓六分。南十弓二分。西十五弓二分。十二弓八分。北小東港二十一弓九分。北角三弓九分。中間北二十一弓七分。中間南十弓六分。合二畝三厘七絲九忽。(四十二) 獅子山後至錢王墓約計一里。(四十三) 附圖青石橋田三坵。合計柒畝叁分壹厘九毫五絲。(四十四) 頭城門內田貳拾玖坵計貳拾叁畝叁分玖厘陸毫叁絲五忽。

按文穆王墓域極廣。凡玉皇山脚東南向之地皆是。并有墓田三十餘畝。早經承糧管業。民國二十三年。杭州市政府轉據滬杭甬路局。爲擴充機器廠基。擬徵用文穆王忠獻王墓地。取土作用。本會以錢王保障東南。百年不知兵革。並捍海築塘。免斯民其魚之歎。是浙江之得有今日者。錢王之功居多。皮碑蘇記。敘述綦詳。歷代崇德報功。列入祀典。與岳廟于故。同有歷史關係。爲中外人士所同深景仰者也。黃妃保俶兩塔。地方且思設法修之。不忍令其湮沒。況錢王墓地所在。不加保護。而毀壞之。似非所宜。事關古蹟。兩請取消此議。幸免破壞。此地固爲古蹟。且係名勝。請清宏博厲樊榭游天龍寺詩之序言。云石壁上有太平興國六年心經。門外八卦田。卽宋郊壇故蹟。次登天真寺靈化洞側。刻字云：梁龍德元年歲次辛巳十一月壬午朔一日。天下兵馬都元帥吳越國王鑿建置。錢王拜郊臺也。此寺登眺。最爲江山勝處云云。文穆忠獻二王墓。迄今千有餘年。文穆王神道碑。與浙中三老碑並重。不可多得。茲印表忠小志。略書梗概。俾後世加以保護。使古蹟名勝。永垂不朽。

吳越忠獻錢王墓圖記

錢氏家乘內載杭州龍山之西原。有忠獻王墓。年久失修。一度被人盜葬。致遭雷擊之報。余詢之該處土人。均知有大打斷之故事。蓋因某氏盜葬錢王墓後。出一尙書。適被雷將來此打斷。故名天打斷。某氏後即衰微。言之確鑿。杭志亦載王墓在江干龍山西原。民國甲戌。余會同在杭族人申請承。幾經交涉。始確定產權。江墳石坎以下。均歸錢氏所有。計地七畝五分一厘九毫。領有三都二圖第二二七〇號圖照管業。並於丙子建築衣冠墓。立碑定界。以備嗣後在浙裔孫春秋祭掃。余撰有重建吳越忠獻錢王墓碑記。同時因相距里許頭城門文穆文穆錢王神道碑記。以資紀念。而便查考。




王神道碑。年久剝蝕。勢將傾倒。恐古蹟湮沒。遂加修理。余並撰有重修吳越文穆錢王神道碑記。同時因相距里許頭城門文穆文穆錢王神道碑記。以資紀念。而便查考。文選謹記。

表忠小志 圖考

### 臨安太廟山錢王祠墓基記

臨安太廟山。亦名安國山。爲縣治主山。自天目中文。逶迤七十里至九仙。玲瓏。葛仙。諸山。下平地十餘里。隱隱隆隆。至此起頂有屹然獨尊之象。左右兩山環抱。中爲武肅王墓。碑勒唐故天下兵馬都元帥尚父守尚書令兼中書令吳越國王諡武肅錢王之墓三十字。縣治居山之右。王祠居山之左。祠址即接陵地。查縣志陵廟基地。原有二頃四十五畝二角五十步。前次清理。只有九十七畝七分三厘一毫。但未立案。迨文選



綜核兩浙縣務。即請 沈省長飭由縣覆丈。經丈得陵廟畝分相符。由縣發給升糧戶摺執管。交繼字宗台保存。並囑繼字宗台繪圖註明弓尺畝分。以便後人查考。用垂久遠云。文選謹誌。

# 宸翰

## 唐昭宗賜吳越錢武肅王鐵券

維乾甯四年。歲次丁巳。八月甲辰朔。四日丁未。皇帝若曰。咨爾鎮海鎮東等軍節度。浙江東西等道觀察處置營田招討等使。兼兩浙鹽鐵制置發運等使。開府儀同三司。檢校太尉兼中書令。使持節潤越等州諸軍事兼潤越等州刺史。上柱國彭城郡王。食邑五千戶。實封壹百戶。錢鏐。朕聞銘鄧陰之勳。言垂漢典。載孔悝之德。事美魯經。則知褒德策勳。古今一致。頃者董昌僭僞。爲昏鏡水。狂謀惡貫。流染齊人。而爾披擿兇渠。盪定江表。忠以衛社稷。惠以福生靈。其機也氛稂藉。其化也疲羸秦。拯於粵於塗炭之上。師無私焉。保錢塘成金湯之固。政有經矣。志獎王室。績冠侯藩。溢於旂常。流在丹素。雖鍾繇刊五熟之釜。竇憲勤燕然之山。未足顯功。抑有異數。是用錫其金板。申以誓詞。長河有似帶之期。秦華有如拳之日。維我念功之旨。永將延祚子孫。使卿長襲寵榮。克保富貴。卿恕九死。子孫三死。或犯常刑。有司不得加責。承我信誓。往維欽哉。

## 賜諡詔

詔曰。天下兵馬大元帥。尙父尙書令。吳越國王錢。本朝元老。當代勳賢。位已極於人臣。名素高於簡冊。贈典旣無其官爵。易名宜示其優崇。宜令所司。定諡曰武肅。長興三年壬辰夏四月十五日己巳。

### 宋太祖勅諭仍舊武肅照封吳越國王

奉天承運皇帝詔曰。唐室衰微。五朝僭亂。乃致盜賊蠡起。生民塗炭。如有志之士。乘時而興一旅之師。能除暴而奠安一方之黎庶者。是亦可謂豪傑之人者矣。爾故吳越國王錢鏐英明而沈毅。嚴肅而恢宏。知世道之變。乃奮起錢唐之地。首破黃巢於河淮。次誅宏昌於吳越。不數年間。闢地千里。恩威並著。部落咸賴以安全。撫御合宜。士庶各修其職業。得非義勇之主乎。茲朕開鴻業之初。爾孫錢宏俶灼見歷數之有在。審於去就之獨先。封其府庫。卽行獻册以來朝。籍其土疆。不待興師以及境。智同馬援識貞主。義同箕子歸成周。昔寧融保五都以事漢。式彰推戴之忱。李勣舉十州以歸唐。益著忠貞之節。在當時之寵遇。越百典以褒封。存爾外藩。忠於內附。朕可異數。用闡幽光。茲特封爾爲鎮國大將軍吳越開國王。仍謚武肅。錫之誥册。俾爾子孫。世世承襲。鳳詔昭垂。式資如存之寵。龍章載錫。永爲不朽之稱。惟爾明靈。尙其歆服。故誥。開寶八年八月十五日誥。

### 武肅王竹冊詔

皇帝若曰。惟后法天以降命。式協無私。惟臣體國以垂功。乃興厥后。周襲宗盟之土。漢分子弟之邦。非劉式論於諸儒。同姓亦譏於太史。酬庸懋賞。是曰能右。顧茲藐躬。實屬多難。允賴元勳。廓清寰宇。憫予怠荒。保我不圖。舉同心協力者無虛日。推祕略宏謀者無間時。俾列疏封。以昭勳績。況江山右地。吳越名區。百雉則前朝舊都。會稽則夏后遺址。宜旌社土。以統藩維。咨爾檢校太師守侍中兼中書令上柱國錢鏐。大昂流精。維嵩孕祉。萃東南秀異之氣。鍾文武英略之資。奮茲不羣。卓爾

有立。自總戎二紀。作奠兩藩。崇名輝於廟堂。茂績策於盟府。處股肱執政之寄。服貂璫清道之榮。行必求人。勳無任己。勝殘務理。經遠詢謀。不怙貴以專刑。不矜能而肆志。深厚寡公侯之蔑。剛明執忠孝之風。威加敵國而愈謙。化被鄰封而垂訓。以百當千之銳卒。勇且知方。育幼與老之編氓。恭而好禮。負戡難濟時之術。蘊天資神授之機。而設燎探微。築臺講益。詩盈鼓篋。傳癖橫經。比飯均羹。席上盡雕龍之客。投醪散庫。營中皆擗虎之人。勁節貫於雲霜。至誠格於天地。頃者浙人饑市稱霸。蚊雷振妖。爾則統仗順之師。整爭先之旅。騰馳勇敢。冰泮渠魁。書於鼎彝。煥若縑素。近則淮人作孽。僞僧無君。拒抗王師。懲截貢賦。竊據州縣。斷絕梯航。先皇上賓之時。不展號弓之慕。羣后咸秩之日。莫申執幣之儀。神人共憤其侵陵。華夏爭誅其干犯。爾則痛主辱以疾首。冀師貞以適志。共粉巨盜之骨。必搥元兇之頰。是用金璽昭德。彤弓報功。示王澤之非濫。表臣勳之益崇。繡符出征。驚壑專祭。爾爾修之。克有終也。今遣使臣中大夫上柱國王鉅副使朝議郎麥筠冊爲吳王。於戲。加王爵之極號。標封建之殊名。往盡乃心。永服徵命。

### 賜文穆王玉冊詔

維天福三年戊戌冬十一月甲辰朔五日戊申。冊曰。皇帝若曰。王者握圖立極。崇德報功。或開國以建邦。或苴茅而錫壤。乃樹屏藩。式獎忠勳。古先哲王。率由斯道。惟朕薄德。敢忽彝章。況夫奠南服之輿區。鎮東甌之重地。懋績雖高于列土。殊榮未繼于肯堂。得不仲加等之恩。降非常之命。用紀代天之業。特頒鏤玉之文。乃擇吉辰。爰敷盛典。咨爾與邦保運崇德志道功臣。天下兵馬都元帥。鎮海鎮東等軍節度使。浙江東西等道管內觀察處置兩浙鹽鐵制置發運營田等使。開府儀同三司。檢校大師

。守中書令杭州越州大都督府長史。上柱國吳越國王。食邑一萬五千戶。實封一千五百戶。錢元璣。嶽靈稟粹。天象儲精。蘊文武之兼才。受乾坤之間氣。寵承吳越。功邁桓文。運妙略以平兇。用奇兵而制變。祇嗣基構。表率英雄。淮夷之屏氣銷聲。海嶠之波澄浪息。而況興我昌運。竭乃忠規。懋庸勳而首列韓壇。奉玉帛而誠先禹貢。誥尊獎則獨標大節。顧封崇則未稱溢名。宜舉徽章。俾奉先正。矧其天文當斗牛之分。地志控勾踐之都。眷茲舊封。允屬全德。用是異車服於羣后。盛簡冊於列藩。王二國之土疆。錫九天之寶瑞。表予嘉命。續乃舊邦。大振家聲。夾輔王室。今遣使大中大夫尚書右丞上柱國賜紫金魚袋王延嗣使中散大夫尚書司門郎中柱國賜紫金魚袋張守素持節備禮。冊封爾爲吳越國王。於戲。服袞衣而珮玄玉。位壓于諸侯。駕戎輅而握兵符。名震於九伐。馭貴之重。象賢之榮。爾其祇荷天光。勉清國步。往綏厥位。永孚于休。戒之慎之。勿忝前烈。檢校太師中書令內使中書侍郎平章事臣維翰宣奉。

### 賜忠獻王玉冊詔

皇帝若曰。在天成象。拱宸分將相之星。惟帝念功。啓十列侯王之國。朕所以法吳蒼而光宅。稽典禮以疏封。而況世著大勳。時推令器。探寶符而嗣位。仗金鉞以宣威。羽翼天朝。藩籬東夏。宜列諸侯之上。特隆一字之封。簡自朕心。洽於輿論。茲爾保邦宣化。忠正翊戴功臣。起復鎮國大將軍。右金吾衛上將軍員外置同正員檢校太師兼中書令杭州越州大都督。充鎮海鎮東等軍節度。浙江東西等道管內觀察處置兼兩浙鹽鐵制置發運營田等使。上柱國吳越國王。食邑一萬七千戶。實封四千戶。錢宏佐。爲時之瑞。命世而生。負經文緯武之才。蘊開物成務之志。英華發外。精義入神。亞夫繼社稷之勳。

顧榮擅東南之美。眷言祖考。志奉國朝。清吳越之士疆。執桓文之弓矢。天資厥德。代有其人。荷基構以克家。事梯航而述職。殊庸斯在。信史有光。是舉華章。爰行盛典。十茅符節。方推翼世之賢。黼冕輅車。更重策勳之禮。斯爲異數。尤屬真王。今遣光祿大夫檢校司徒行太子賓客上柱國太原縣開國男食邑三百戶王致副使正議大夫行尚書吏部郎中柱國賜紫金魚袋趙熙等持節備禮。冊爾爲吳越國王。於戲。周寵元臣。四履錫命。漢封異姓。八國始王。指河岳以誓功。蔭子孫而襲爵。爾纂服舊業。朕稽考前文。勿忘必復之言。更廣無窮之祚。懋昭前烈。爾維欽哉。維天福八年歲次癸卯十月丙午朔六日辛亥。檢校太師兼中書令內使右僕射兼中書侍郎平章事臣王凝宣奉。

### 宋仁宗贈忠遜王敕

敕曰。朕昨者虔陟嘉壇。恭承大祀。協巽風而施令。法解雨以推恩。眷惟綸掖之近僚。式沛漏泉之新命。矧於勳烈。宜爾褒崇。中大夫上柱國彭城郡開國侯錢易之父。故檢校太師兼中書令吳越國王錢宏侖。位襲真王。功聯冊府。明敏嚴毅。國史具書。人臣極隆。天爵自奉。襲齊桓之業。挺忠孝以無遺。振泰伯之風。敦揖讓而斯在。果鍾佳嗣。爲我詞臣。得之本心。克濟其善。雖風樹之感。常切於疚懷。而密對之封。是膺於異渥。總師綿宇。茲乃世官。舉而贈之。尙冀歆奉。特贈天下兵馬都元帥。仍封讓王。餘贈如故。天聖三年六月。

### 賜忠懿王玉冊金印詔

冊曰。維乾祐二年歲次己酉十月庚午朔越十九日戊子皇帝若曰。我先帝承有晉崩離之後。醜類充斥。

毒螫中夏。是用順天致壽。大振黎元。太阿一揮。羣兇宵遁。享萬靈於無主。解兆庶之倒懸。駭定世助。以吳越居右。俾朕藐躬。虔奉先訓。嗣位之始。即瞻懋功。前命爲元帥。按地圖授武節東南之境。得行征伐。今冊爲眞王。駕大輅執桓圭，牛斗之鄉。盡荒土宇。詢于有位。僉曰克諧。咨爾匡聖廣運同德保定功臣。東南面兵馬都元帥。鎮海鎮東等軍節度使。浙江東西等道管內觀察處置兩浙鹽鐵制置發運營田等使。開府儀同三司。檢校太師。兼中書令杭州越州大都督。上柱國吳越國王。食邑一萬戶。實封一千戶。錢宏俶。象緯炳靈。公王襲慶。橫江負海者三千里。開國承家者六十年。而能望屐極以駿奔。奉天朝之師律。充庭納貢。則外府告盈。下瀨宣威。則前茅獻捷。忠信著於羣后。禮讓行於一方。故立冕九章爲王之服。昭其名也。朱輪駟馬爲王之御。昭其器也。而又三吳百越。列土分疆。有民人焉。有社稷焉。怵祖禰之令國。實典禮之鉅著。勸夫忠孝。以御邦家。今遣正議大夫守右散騎常侍上柱國賜紫金魚袋張煦右補闕崔頌持節備禮。冊爾爲吳越國王。於戲。品秩甚尊。名數尤重。肅廣庭而備物。揀吉日以覃恩。爾其恪共厥位。事大以敬。用教民順。馭衆以寬。用教民義。居敬而行惠。神其福之。禮曰。惟王建國。諸侯所以守舊邦。書曰。惟帝念功。王者於是出好爵。匡我堯緒。永爲漢藩。浙江如帶。稽山如礪。福祿無窮。貽厥百世。汝往欽哉。對揚休命。漢乾祐二年十月敕遣散騎常侍張煦等持節備禮賜吳越國。

宋太宗賜忠懿王誥

皇帝若曰。吳穹眷祐。賢哲挺生。稟象緯之純精。負經綸之盛業。作民父母。爲國翰垣。其存也冠中台而長諸侯。其沒也峻徽章而崇禮命。咨爾故安時鎮國崇文耀武宣德守道功臣。武勝軍節度。鄞州管

內觀察處置等使。開府儀同三司守太師尙書令。持節鄧州諸軍事。行鄧州刺史。上柱國鄧王。食邑九萬七千戶。實封一萬六千九百戶。賜劍履上殿。詔書不名。錢 嗣祖考之舊德。奠東南之輿區。開國承家。本仁祖義。以忠孝而保社稷。以廉讓而化人民。勤翼戴於累朝。克惠綏於一境。世傳威略。志慕聲名。當武庫戡兵。洞閱詩書之府。洎秣陵問罪。雄長犄角之師。致區宇之同文。賴忠良之協力。逮余纂紹。益享崇高。蘊明哲以保身。務頃輸而竭節。盡獻土壤。來歸闕庭。予嘉乃功。荐錫殊寵。而道隆簡退。志尙謙沖。屢辭卻毅之權。難奪范宣之讓。朕深惟勛舊。俾就養頤。爰出殿於大邦。庶聿臻於眉壽。式繫元老。永輔藐躬。何天道之難誥。而梁木之斯壞。長沙既往。空存申令之勳。征鹵云亡。但見雲臺之像。贈賻從於異等。嗟悼廢於臨朝。寔酬柱國之勳。未極君臣之分。庸加典冊。以厚始終。今遣使大中大夫尙書工部侍郎上柱國汾陽郡開國侯食邑一千戶賜紫金魚袋郭贊持節冊贈爾爲秦國王。諡忠懿。嗚呼。德無不報。予敢忘於格言。魂而有知。爾尙歌于休命。嗚呼哀哉。

### 宋太宗允納士詔

詔曰。卿世濟忠貞。志遵憲度。承百年之堂構。有千里之江山。自朕纂臨。來修覲禮。覩文物之全盛。嘉書軌之混同。願親日月之光。遠忘江海之志。甲兵樓櫓。旣悉上於有司。山川土田。又盡獻於天府。舉宗効順。前代所無。書之簡編。永彰忠烈。所請宜依。太平興國三年五月六日。

年表

三十二世孫文選謹纂

武肅王

唐吳越王姓錢。諱繆。字具美。杭州臨安縣人。王之先世考妣。俱見錢氏家乘世系。唐宣宗大中六年壬申二月十六日。生於本邑衣錦鄉動貴里。先是五年邑中大旱。邑令命道士東方生起龍。以祈雨。生曰。茅山前池有龍。然不可起。起必有大異。令乃止。六年復旱。又召生起龍。將臨池遠指王所居曰。池龍已生於此家矣。時王誕甫數日。始誕之夕。適鄉人從屋後過。聞甲馬之聲。疑有盜。告王考。急馳歸。王已誕矣。尙有紅光滿室。王考懼。將棄於井。祖妣知非常人。不許。留之。因小字曰婆留。而井亦名焉。

- 唐宣宗 在位十三年
- 大七年癸酉 王二歲
- 八年甲戌 王三歲
- 九年乙亥 王四歲
- 十年丙子 王五歲
- 十一年丁丑 王六歲

十二年戊寅王七歲從師讀書

十三年己卯王八歲王與羣兒嘗戲聚於樹陰。端坐石上。指揮衆人。如佈陣勢。以優劣定賞罰。頗有條律。

。十月王祖大尉薨。將葬之前夕。大風拔樹於野。詰旦術者引靈輜將就葬所。謂王考曰。此拔樹之穴。葬之大吉。是天意也。撫王背曰。當貴斯人。

唐懿宗在位十四年

咸元年庚辰王九歲王每語人曰。吾喜武而厭文。

二年辛巳王十歲

三年壬午王十一歲

四年癸未王十二歲王嘗遊徑山書院。有道人洪諱著。輒迎於門。王恐勞其起居。乃由後山僻徑往。諱亦迎焉。王問其故。諱曰君非常人。故預知耳。並勸讀書以明志。由是王潛心攻書。喜讀春秋。

五年甲申王十三歲王與羣兒至石鏡山。其石隱見晁旒。一如王容。羣兒以狀告鄉老。咸往觀之不見。邀王同至即顯然。九月聘戴氏。

六年乙酉王十四歲王嘗於後山憩息。忽一石屹然自立。後建功臣精舍。遂以石爲佛座。樹號衣鎗將軍。

七年丙戌王十五歲王家益窘。遂廢讀。然猶溫故書。凡不明處。必問先達。解悟後已。兼治武經諸書。

八年丁亥王十六歲王貧甚。無以奉高堂。乃販鹽謀生。每擔鹽劬有二百餘。行走甚捷。今之肩引。即王之

遺蹟也。

九年戊子王十歲習武。

十年己丑王十歲王嘗與鍾邑吏諸子交。鍾每禁之。有江西人善識天文。仰觀王氣在蘇杭間。及至武林不

得。復至臨安。託名善相。寓鍾邑吏家。密語所以至臨之故。鍾邀集富貴子弟與之相。均曰非。一

日王來。術者適見謂鍾曰。此非常人。頗有王者氣度。君家功名富貴全賴之。不可輕視。由是鍾命

子與王遊。並有所贈。

十一年庚寅王十歲聘吳氏。初鍾邑吏與吳厚。吳有女鍾爲王作伐。王以父命已與戴姓締姻。吳公願以

女妻之。因而定婚。

十二年辛卯王十歲王習弩。鍾吏勸也。

十三年壬辰王二十歲王好讀孫子兵法。兼溫春秋。始從軍。

十四年癸巳王二十歲王習劍戟。迎娶戴氏夫人。

唐僖宗在位十五年凡改元五

乾元年甲午王二十歲九月迎娶吳氏夫人。

二年乙未王二十歲四月浙西鎮遏使王郢作亂。王充石鏡義兵。撥董昌標下爲偏將。王驍勇絕倫。爲昌所

重。一日遇摸骨相者問曰。旁有人乎。王曰無。謗者嘆曰。天下亂矣。復笑曰。君可保邦平賊。

亦十三州百姓之幸也。十月迎娶陳氏夫人。

三年丙申王二十八月納胡氏。

四年丁酉王二十五歲王始授副使官職。十月五日生長子元璉。陳氏出。十三日生次子元璣。胡氏出。

五年戊戌王二十七歲時寇盜蜂起。朱直管。曹師雄。王知新等。率眾劫掠宣歙等處。九月王率兵平之。以

功聞。授王石鏡鎮兵馬使。遷鎮海軍右副使。二十一日生三子元璣。吳夫人出。

六年己亥王二十八歲七月黃巢擁眾二十萬。大掠州縣。王謂董昌曰。巢雖有數萬之眾。隴山越嶺而來。又

無紀律。宜以伏兵截之。遂率二十騎伏於草莽。發弩射之。應弦而斃。賊兵大潰。王謂眾曰。此按

只可一舉。若大軍齊至。則寡不敵眾。宜乘勝張虛聲以懼之。乃進屯八百里。古地名。途次喝老嫗曰。

後有兵至。當言臨安兵屯八百里。未幾巢兵果大至。嫗如所對。賊眾相顧曰。向止數騎。尚不可當

。况八百里乎。乃退。王伺其後軍。斬獲人馬無數。讓功董氏而不自居。臨安縣董昌。王副之。徐杭縣陳晟。於潛縣吳文舉。臨官縣徐及。新登縣杜稷。唐山縣饒景。

廣元年庚子王二十九歲四月十三日生四子元璣。胡氏出。十二月杭州始建八都。富春縣文禹。龍泉縣凌文學。各聚眾數千人。以衛鄉里。既而淮南節度使高駢召董氏赴廣陵。王亦從焉。駢視王謂左右曰。此人

他日爵祿。必遠過於我。時駢將大舉討巢。命董從行。王謂董曰。竊觀高公。無討賊之志。苟從其

行。功效不立。是同坐罪。宜以捍衛鄉里為辭。董然之告駢。駢因禮而歸焉。是月納側室金氏。

二年辛丑王二十十歲正月改元中和。九月授王都知兵馬使。太子賓客。是月納側室金氏。

和二年壬寅王三十一歲七月浙東觀察使劉漢宏。伺僖宗幸蜀乃叛。遣弟漢宥等率兵二萬營於西陵。將圖浙

西。董昌遣王禦之。王於是月十二夜將渡江祝曰。吾以義兵討賊。願天濟我。俄而雲霧四起。王即

渡江。竊賊號縱火焚其營。精兵繼至。與賊交戰。大獲全勝。俘賊偽將惡官。僞勅二百道。兵甲牲口萬計。釋宏所掠民間妻女數百人。是月詔王兼侍御史。十一月初三日生五子元懿。金氏出。

三年癸卯王三十三月漢宏兵大至。王率八都兵自富陽直搗黃嶺巖下。及山洞三十餘所。獲宏弟漢容及諸將等皆斬之。漢宏宵遁歸越。

四年甲辰王三十七月授王國子祭酒。兼御史大夫。右千牛衛將軍。

光元年乙巳王三十一二月王納童四歲十月授王檢校散騎常侍右武衛將軍。

二年丙午王三十一十月漢宏亂未平。王謂董昌曰。除惡務盡。願率全師討之。昌曰然。即欲進兵。部署諸將時。詔遣中使爲杭越通和使。俾漢宏改過。王班師以待之。詎宏殺王守將。密令水陸並進。王聞信。親率師導山路三百餘里至曹娥埭。命弟錄往探要道。錄告王曰。通明等處宜造欄關。既可阻賊兵之遁路。復可蓄水以溉田。王即命趕築。癸丑破賊衆。甲寅進屯豐山。丙辰拔越城。宏走台州。十二月台州刺史杜雄執宏至。命斬於會稽市。越人及諸將皆推王爲主。王固讓董氏。董遂權流於越。杭人復請王代董氏。時浙西節度使周寶。以王權知杭州軍事。并錄功勳奏聞。詔授王檢校工部尚書。

三年丁未王三十一正月授王杭越管內都指揮使。上武衛大將軍。兼杭州刺史。得專征伐。尋進戶部尚書。

三月潤州劉浩逐節度使周寶。推薛朗爲主。四月六合鎮使徐約攻陷蘇州。五月王命杜稜。阮結。成及。等共討薛朗。六月與賊將李君旺大戰破之。九月十二日生六子元璠。吳夫人出。王進攻常州。刺史丁從實宵遁。

十月周寶始返。王以舊屬禮迎之於郊。是時廬州刺史楊行密始入淮南。十一月十二日生七子元璣。陳夫人出。

王奏請以杜稜爲常州制置使。遣阮結等進攻潤州。是月十八日生八子元璣。董氏出。  
文元年戊申王三十正月克潤州。薛朗就擒斬之。劉浩走。王表阮結爲潤州制置使。又疏請築嘉興城。以固封守。三月詔加王檢校司空。四月十八日生九子。九月王命弟銖率兵討徐約於蘇州。

唐昭宗在位十六年凡改元十六

紀元年己酉王三十三月我師破徐約於蘇州。約中箭死。七月敕授王金紫光祿大夫。檢校司空。本州防禦使。是月九日生十子元璵。吳夫人出。十月敕除杜儒休爲蘇州刺史。以沈粲爲制置使。是月十三日生十一子元璵。陳夫人出。十二月淮南孫儒等陷潤州。制置使成及奔歸。是月七月生十二子元璵。胡氏出。

大元年庚戌王三十八月敕建安衆營於臨安。加王吳興郡開國男。是月十三日生十三子元瑛。金氏出。閏九月孫儒復遣劉建封攻毗陵。殺張行周。而復困姑蘇。是月王命樂夾城。環包家山泊桑望山而迴。凡五十餘里。皆穿林架險而版築焉。王警親勞役徒。因自運一甕。由是從者爭先恐後而工成。十月八日生十四子元瑛。吳夫人出。十二月敕賜官語。加王檢校司空。同平章事。

二年辛亥王四正月孫儒自淮南復入姑蘇。將乘勝以圍我。王大出舟師以禦之。七月城東安鎮。十二月孫儒燒掠蘇常。遂逼宣州。因圍楊行密。行密求救於我。王出縶糧甲兵以助。並遣師平姑蘇。是月三子元瑛。吳夫人出。八日生十六子元裕。陳夫人出。

景元年壬子王四十二月王命弟銖權姑蘇招捍使。四月敕陞杭州爲武勝軍。授王本軍防禦使。六月王出師會宣州。大敗孫儒於宣城。楊行密斬孫儒。因有廣陵。七月表呈版築亦山安衆營圖。

二年癸丑王四十二歲閏五月詔授王本軍團練使。蘇杭等州觀察處置使。晉封彭城郡開國侯。七月七日生十七子元祐。陳夫人

出。是月王率十三都兵十三都者。八都之外。又有紫溪。保城。龍通。三泉。三鏡。是也。泊錢塘。新築羅城。自秦望山由夾

城東亘江干。泊錢塘河。霍山。范浦。凡七十里。九月敕授王鎮海軍節度使。浙西道觀察處置等使

。潤州刺史。王性至孝。維時妣秦國太夫人。春秋已高。喜登樓。每遊後庭三層臺。恐有顛蹶。王必親負以登。

乾元元年甲寅王四十一歲正月二十一日長子元邁逝。三月制授王光祿大夫。檢校司徒。進充本道營田招討鹽鐵制置發運等

使。五月敕授王開府儀同三司。同中書門下平章事。六月敕王私門立戟。十月初六日生十八子元弼。陳夫人出。

二年乙卯王四十二歲正月羅隱來謁。王留之。待以上賓。二月晉封王彭城郡開國公。是月威勝軍節度使隴

西郡王董昌僭帝制。建元順天。國號羅平。王以書勸。略云與其閉門作天子。不如開門為節度。昌不聽。遂具表聞。命王

討之。率兵至迎恩門。猶復委婉開導。昌陽許改悔。且言待罪於天子。王為代表其事。誅妖人應智

等。昌所聽三月娶次媳孫氏為元瑛成婚。四月娶三媳馬氏為元瑛成婚。十八日乙巳王考太師薨。哀痛幾絕。六月制授王檢校

太傅。封彭城郡王。因又泣曰。今日之貴。皆由于考積德所致也。又移榻於靈前。確遵喪儀。昌復

亂。召王討逆。以居喪告。詔許奪情。素服出師。昌屢戰屢北。求援於淮帥楊行密。應之。圍姑蘇

。又遣安仁義。田頌等攻王。困嘉禾。王命顧全武禦之。十二月王疏以伍子胥追錫惠應侯。

三年丙辰王四十五歲正月至五月討昌。果戰俱捷。是月乙未顧全武遣吳璋執昌將至軍。昌投水死。越州平

。王開倉廩以賑貧乏。散金帛以賞將士。又斬偽宰相李邕。蔣瓌等十餘人。宥其脅從者。具情以聞

。八月敕授王檢校太尉。兼中書令。賜王旌節。九月授王越州。王辭。十月敕改越州威勝軍為鎮東

軍。授王領鎮海鎮東等軍節度使。王具表辭。不許。乃受。

四年丁巳

王四十一歲

正月請征安仁義田頴等。遂命杜稜吳璋率兵救東陽。仁義驚遁。四月顧全武與王弟

鎮等。率兵自海道救嘉禾。城中望見旗幟皆大悅。賊亦驚以為神。是日內外夾擊。擒賊將卒三千

餘人。嘉禾平。田頴由吳興遁。五月八日生長孫仁傑。改名六月王如東府。授鎮東節鉞。七月十九日生

奕子。八月師屯崑山。敕王起復。遣使齎鐵券至。遂具表謝恩。並請晉錫伍子胥為吳安王。九月湖州

刺史李繼徽以州附淮南。王親巡吳興平之。十月淮人以臺蒙守姑蘇。

五年戊午

王四十七歲

正月改元光化。是月我師救姑蘇。擒淮將李近思等。餘賊皆遁。師還。七月敕授王檢

校太師。賜定亂安國功臣。是月九日生十九子元玩。陳夫人出。十月王復遣顧全武率師克蘇州。淮將臺蒙等宵遁。奏表

力屈乃降。蘇州平。是月廿二日生二十子元琢。胡氏出。闕十月婺州王檀衢州陳茂俱叛。遣將討之。十一月廿八日生二

出。

光化二年己未

王四十八歲

正月敗陳茂黨於龍邱。二月敕改石鏡鄉為廣義鄉。臨水里為勳貴里。安衆營為衣錦

營。仍賜兩浙行軍司馬顧全武杜稜等以下一百二十八人。并號誓忠去僞功臣。二月奏建天柱觀。為

祝聖道場。

十七日生二十二子元璣。金氏出。四月敕陞杭州為大都督府。七月淮人有使入衢州者偵殺之。獲陳茂

所送楊氏地圖州印以歸。八月五日生二十三子元琳。吳夫人出。

三年庚申

王四十九歲

正月。陳茂以淮將康儒徐從皋侵婺州。王遣從弟銖率師討之。三月康儒等遁。五月

詔封王為南康王。并封諸夫人爵邑。王上表謝恩。九月王巡衢州。陳茂降。王表顧全武權衢州事。

以岌為浙東安撫副使。十月遣鎮海軍使院。以衢州治擴而大之。在今鳳凰山左。是月七日生孫仁九

日敕取王形圖於凌烟閣。王命寫容以進。二十五日葬王考太師公於安國縣錦北鄉清風里。隸係元璣次子。

復天元年辛酉王五十二歲二月王親巡衣錦營。大會故老賓客。山林樹木皆覆以錦。表衣錦之榮也。并作歌以紀其事。十二月娶四媳齋氏為元璣成婦。四月王親巡東府。是月八日娶五媳羅氏。為元璣成婦。五月敕授王守侍中進封彭城王。仍升王所居衣錦營為衣錦城。封石鏡山為衣錦山。大官山為功臣山。八月敕授王七子元璣禮部尙書。九月四日王妣秦國太夫人水邱氏薨於杭州大都督府。王哀痛幾絕。十一月駕狩鳳翔。王聞之悲泣。乃遣使奔問。帝嘉之。賜王御服夾襖一副。仍降御札於衣襟以褒之。十二月淮人以師老糧乏求成而還。是月初敕王起復雲鏗將軍。上金吾衛大將軍。員外置同正員。

二年王戊王五十一歲三月大雪盈丈。損春花。王奏請減賦。是月戊午十二子元珣卒。五月敕封王為越王。七月王親巡衣錦城。治溝洫。八月丙戌將還。徐滄許再思邀田頴同叛。王聞變潛入城。頴至王登城注弩中執旗者。頴見有備懼退。率徐滄許再思回宜城。嗣後王每暫憩。必先整衣甲而寢。又以圓木小枕綴鈴。睡熟則欲而痛。名曰警枕。又置粉盤於榻前。有所記則書之。每夕必列侍女二名。囑曰。凡有所報。須振鈴以警。又置彈丸於牆樓之外。以警直宿者。七月五日生孫仁俱。係元璣長子。十八日生孫仁子。

三年癸亥王五十歲九月田頴安仁義叛於淮。楊行密請師。王命方永珍從弟鏐等率兵以應。十月我師與淮人會擒安仁義。歸淮帥斬之。頴死於陣。

四年甲子王五十三歲三月六日王六子元璣以行密女楊氏自淮歸。次日成婚歸。十二日娶七媳馬氏為元璣成婦。四月改元天祐

。進封王爲吳王。八月昭宗崩。王服衰舉哀。凡王子陪臣俱成服。如喪考妣。是月淮人謫送徐縉至命斬之。十月大雪丈餘。民多壓斃。王加意撫卹。開倉以賑。貧民賴之。十一日生孫仁儼係元璿次子。十一月九日娶八媳顯

氏爲元璿成婚。十五日生孫文英係元璿長子。

唐昭宣帝在位三年綱目稱爲哀帝

天二年乙丑王五十四歲正月敕授王七子元瓘等官爵。十一月王命建功臣堂於府門之西。樹碑記功。仍列名

氏於碑陰。凡五百人。十一日十三子元瓘卒。二月初八日生孫仁儼。係元瓘次子。

三年丙寅王五十五歲九月敕授王吳王冊禮。十一敕封三代。并建祠廟。閏十二月王請以弟鏐爲婺州制置使

。八日生孫仁儼。係元璿長子。十是月邗溝楊氏。西川王氏。南海婁氏。長溪王氏。皆竊大號。並備龍衣玉冊書疏等。勸王自大。王笑曰。爾等自坐於爐炭之中。而又欲踞吾於上耶。吾以去僞平賊微

勞。獲蒙天子酬庸之命。至於封建車服之制。悉有所由。豈圖一時之利。波靡於爾輩耶。皆卻之。並勸仍宜守臣節。切勿自大。漢之王莽。董卓。袁紹。我朝之安祿山。黃巢。劉漢宏。董昌等。皆

因不守臣節。致取滅亡之禍。殷鑒不遠。能無懼乎。宜速改之。尙可免禍。

四年丁卯王五十六歲三月敕陞衣錦城爲安國衣錦軍。四月梁改元開平。進王爲吳越王。時節度使判官羅羅

勸王舉兵討梁。曰。縱無成功。猶可退守杭越。自爲東帝。王雖不能用。心甚善之。梁遣使來宣諭。有勸王拒之。王曰。斯言羅羅早已言及。吾亦等之熟矣。奈興兵征討。必動干戈。且兼淮氛未靖

湖州初平。吾若外討。彼必乘虛滋擾。百姓必遭塗毒。古人有言。屈身於陛下。是其略也。吾以有

士有民爲主。故不忍與兵殺戮耳。遂受之。十月梁授王七子元璫金紫大夫。十二月初九日生孫仁偏。係元球長子。十八日娶弟

十媳趙氏。爲元璫成婚。

五代 梁太祖 在位八年 改元二

開二年戊辰 王五十歲 正月敕改臨安縣爲安國縣。廣義鄉爲衣錦鄉。是月三日生孫文奉係元璫次子。二月十二日生孫仁黜。係元懿三子。十五日生孫仁

僊係元璫三子。九月淮人困姑蘇。王命從弟欽率兵討之。時興福里常有黑魚爲患。王遣匠築樓以鎮之。名

曰朝天樓。又號祝聖樓 併於樓中供立帝。以歷祝嘏。十月十二日生孫仁繼。係元璫次子。十一月三日娶十一媳薛氏爲元璫成婚。

三年己巳 王五十歲 四月王命弟鏐率兵救姑蘇。內外夾攻。王七子元璫接應。擒淮南將卒三千餘人。獲兵

甲牲口三十萬。戰船三百餘艘。餘賊夜遁。是月二十八日生孫仁信。係元璫四子。五月王巡明州。以九子元球爲明州制

置使。閏八月十三日生孫仁修。係元璫四子。十月湖州刺史高澄貳於我。焚義和臨平等鎮。王命弟鏐率師討之。是月二十一日生孫

仁修。係元璫之子。廿八日娶十四媳馬氏。爲元璫成婚。十一月發運使羅隱卒。王甚悼惜。佐以賻資。并蔭其嫡子。

四年庚午 王五十九歲 二月湖州高澄導淮將入境。都將閉城不納。王遣子元璩濟師禦之。淮人挾漕而遁。是月十一日生孫文傑

係元球第三子。三月王巡吳興。以弟鏐爲刺史。又命七子元璫修築杭州子城。五月一日次子元璩卒。八月王因江

濤衝激。各堡幾至淪沒。先爲詩一章投海門。復禱胥公祠不應。遂命強弩以射潮。三日不至。得定

塘基。自六和塔至良山門俱築捍海塘。並置鐵韗於江以鎮之。復建候潮通江等城門。執役者於府門

揭一紙云。沒了期。沒了期。修城纔罷又開池。王見之。命易其句曰。沒了期。沒了期。冬衣脫了又春衣。怨思頓止。是月二十四日。壬午娶十五媳馮氏。四子元璠幸。爲元璠成婚。

乾元年辛未王六正月敕建王生祠於衣錦軍。六和塔南古井常有蛟出沒。攻損江岸。王因鑄鐵井欄。上

畫八卦鎮之。戒曰吾因百姓受爾之累。是以囚爾。如冥頑不靈。罔違禁令。當鑿上蒼斬汝。爾無悔

。由是怪遂絕。沙土漸積。岸益堅固。是月又築松江南北二城鎮柵。以防險要。元珣。金氏出。十月八日生孫文俾。係元璠四子。十一月生孫仁健。係元璠次子。十三日

二年壬申王六十正月作家訓八條。勉勵子孫。是月三日生二十五子元淵陳氏出。三月十六日生孫仁澤。係元

璠長子。七月詔尊王爲尙父。并敕廣闊牙城。有衝者獻策曰。若將西湖填瀟爲城。於法當有拓土之應。

不止十四州已也。王曰百姓藉湖水以生。無水即無民。吾之遼詔廣城。原冀衛民。何敢稍存他念。

況於百年之內。必有真主。爾無妄言。吾不爲也。八月敕授王六子元璠。任蘇州節度使。王七子元

璠任鎮海等軍節度使。是月二十日娶十六媳王氏。爲元璠成婚。九月十一日順德夫人戴氏薨。追贈元妃。葬於安國縣南

鄉原。諡曰恭穆。三年癸酉。王六十正月十八日娶十七媳王氏。爲元璠成婚。二月二十六日娶長孫媳周氏。爲宏度成婚。

王命七子元璠討之。俘李濤及士卒三千餘人。命六子元璠率水師攻東州。在常州界。獲濤黨李師愈等三千

餘人而還。五月二日生孫文俾。五月准將花虔滿信等五千餘人。會屯於宣州。廣德。復寇衣錦軍。王命

表 忠 小 志 年 表

五 五

七子元璠討之。六月師克廣德。俘花虔。滿信等全軍。七月十五日生孫仁信。係元璠三子。八月初八日

生孫仁傲。係元璠次子。九月初二日娶十八媳婁

氏。為元 十月敕加王七子元權爵。開國男。十二月敕授王六子元璩。權蘇州刺史。加封廣陵郡王。

四年甲戌王六十二歲 十二日生曾孫惟善。係宏度長子。三月三日生孫仁德。係元璩次子。六月制授王七子元

權開國侯。九月王命元權率兵攻常州無錫縣。獲將卒五百餘人。十月八日三子元瑛逝。九日娶

梁末帝在位九年

明元年乙亥王六十歲 正月敕授王六子七子以下官爵有差。二月敕使選王十五子傳珍更名元璩。尙梁太祖

女壽昌公主。賜駙馬都尉。三月二日娶次孫媳陸

二年丙子王六十一歲 正月十五日奏建廣潤龍王廟。二十日娶三孫媳方氏。為仁傑成婚。四月十三日娶四孫媳吳氏

娶六孫媳陳氏。七月授王諸道兵馬大元帥。十二月王命弟鐸率官吏僧衆詣明州鄞縣阿育王寺。迎釋

迦舍利塔歸於府城。仍建浮屠於城南供奉。十月六日娶二十媳沈

三年丁丑王六十二歲 三月敕授王子元璩等十人官爵有差。四月敕授王天下諸道兵馬都元帥府。開幕除吏。

一同天策上將軍故事。復敕峯州刺史元璩。遷守檢校太保。八月初七日生曾孫惟

之金井洞。命立端應宮。初五日娶二十一媳葉

四年戊寅王六十三歲 二月初七日娶七孫媳李氏。為仁傑成婚。三月初七日娶八孫媳劉氏。為文英成婚。六月王命九子元球權衛州刺史。命鮑君福率兵

討信州擒將卒一千餘人。八月初六日娶二十二媳余氏。為元璩成婚。十二月初七日娶二十三媳汪氏。為元璩成婚。十二月淮人圍虔州。絕我貢路。刺史

盧光僑來告。王命徵兵援之。未及境。而虔州拔。由此航海入貢。

五年己卯王六十正月初六日娶九孫媳劉氏。為宏儀成婚。三月敕王七子元瓘伐淮南。是月王納陳氏。四月王七子率師與淮

入戰於狼山之江。淮人大敗。八月淮人遣使通好。王納之。息民故也。自是休兵樂業廿餘年。十一

月三日丁亥吳越國正德夫人吳氏薨。年六十二。追封元妃。謚曰莊穆。生子五人。十二月初二日。生曾孫惟實。係

仁傑之子。

六年庚辰王六十二月敕授王六子元璋以下各王子。加授節度使。同平章事。雲麾將軍。上右金吾衛大

將軍。三月王納董氏。四月初二日生曾孫熙。係宏儀之子。七月王以次子元懿由睦州刺史。調婺州刺史。

七年辛巳王七十三月淮人以王從弟鎰送歸。王以李瀛歸淮。五月改元龍德。七月楚王馬殷。遣書記李峴

等送女歸於王子元瓘。十月制授王七子元瓘檢校太傅。同中書門下平章事。充清海軍節度使。自是

賜王書詔不名。

龍德二年壬午王七十正月敕授王子元瓘以下并起復加爵有差。七月敕王建造天下元帥府於興國門之右。

十月一日王晝寢。夢青衣人捧簿書於前告曰。大王明年官滿於錢塘。及瘡頗惡之。明年天子乃命王封冊中外皆如列

國之儀。其是月元瓘。童氏出。元瓘。童氏出。

三年癸未王七十正月初三日娶十孫媳蘇氏為文奉成婚。二月敕賜王吳越國王冊封暨建國之儀。三代俱冊封。更王所居之

第為宮殿。王之夫人冊封曰妃。府曰朝。屬官皆稱臣。悉如典禮。四月唐莊宗即位。改元同光。有

耕耨得傳國璽以獻。王曰此天子所用之寶。非臣下所宜留。乃表獻於朝。五月敕遣使宣諭賜王名馬

玉帶香藥等。封吳越國王。詔敕不名。稱尚父。一切典禮如故。七月十八日生曾孫見龍。係仁俊之子。元瑤之孫。

後唐莊宗在位四年。

同二年甲申王七十正月初八日生曾孫仁瑤。係文奉之子。八月王遣使入貢。十月仍敕王天下兵馬都元帥。得

專征伐。尚父尚書令。十一月敕陞蘇州爲中吳軍。授王六子元瑑節度使。兼領鎮東軍節度使。檢校

太保。兼中書令。大彭郡開國侯。晉封廣陵郡王。授王七子元瓘檢校太師。兼中書令。充兩浙節度

使觀察留後。  
三年乙酉王七十正月初九日王十四二月十四日莊宗賜書。朕從靈堂卽聞尚父之名。茲以玉璽進呈。雖非

緊要。然其一舉一動。無不拿重中國。其忠悃之心。出於至誠。命備冊禮。以報崇功。有司乃備竹

冊銅印。唐主曰。尚父元老。居方面。任將五十年。惠濟黎元。攘除兇醜。忠有可嘉。禮無不腆。

不當待以人臣。况封建乎。乃定玉冊金印。紅袍御服冠履劍佩等賜焉。五月十一日生廿七子元瓘。陳

瑑。董十一月授王子元球守檢校大尉兼侍中。充靜海軍節度使。

四年丙戌王七十四月戊寅王不康。如衣錦軍。命七子元瓘監國。是月明宗卽位。改元天成。七月庚寅

王同。八月廿四日新建靈德王廟。九月制加王六子元諫開府儀同三司。十二月敕授王十七子元祐開

府儀同三司。

後唐明宗在位八年。  
改元二。  
天二年丁亥王七十三月初八日生孫宏傳。係元瓘長子。卽孝獻世子。

歲二年丁亥王七十三月。四月十二日生二十九子元島。陳氏出。

三年戊子王七十 二月敕賜王湯藥。授王七子元瓘鎮海鎮東兩軍節度使。六月大旱。有蝗蔽天而飛。晝

爲之黑。王禱於各神廟。是夕大風。蝗悉墮錢江而死。七月二十六日生孫宏佐。係元瓘次子。即忠獻王。八月十九日重開上

虞舜井。敗得重華寶石一片。并勒碑以記其事。

四年己丑王七十 正月初三日娶會孫媳金氏。爲惟善成婚。二月敕授王七子元瓘杭越等州大都督府長史。王子元球兼中書令

。王子元洵爲順化軍節度使。是月十二日生三十子元禕。胡氏出。七月台州大水。王以軍儲三十萬斛。賑濟貧民。是日

生孫宏傑。係元瓘三子。即忠遜王。八月二十時樞密使安重誨兄弟用事。屢索王賄。王以外藩不敢交納

四日。生孫宏傲。係元瓘四子。即忠懿王。內臣。遂譖於君。不聽。乃於九月矯制削王官爵。以太師致仕。王命七子元瓘奏雪其事。不得入。

乃以絹書上之。免始白。降安重誨出爲河中節度使。旋誅之。是歲所在地震。居民廬舍傾圮。王復開倉賑之。

五年庚寅王七十 二月改元長興。五月制授王七子元瓘以下。食邑實封。郊禋普恩也。十三日生元孫象賢。係惟善之子

。宏茂之孫。元瓘之曾孫也。

與二年辛卯王八十 二月敕賜王湯藥。復王官職如故。七月有象入新安境。王命兵士取之。圈而育焉。

三年壬辰王八十 正月三日生曾孫恆圭。係文英子。二月敕賜王湯藥。甲辰王有疾。謂將吏曰。吾疾必不起。諸兒愚懦

。宜善輔之。并諭諸子曰。爾等各言功績。吾將聽之。惟時元璩。元璟。元祐。元弼。僉以兩鎮令

公元瓘。仁孝有功。將吏悅服。可命繼立。遂具疏以聞。並以印鑰兵符付之。噶曰中國之君。雖易異姓。宜善事之。勿廢臣禮。十四州百姓。須用敬信節愛。使民之道。善爲撫輯。叔姪兄弟。務敦

友愛。撫馭將吏。期於寬嚴相濟。無圖安康逸豫。無得罪於羣臣百姓。三月廿五日己酉大雪。庚戌日王寔於正寢。在位四十一年。明宗聞訃。廢朝七日。哀悼不已。御祭三次。廷臣以謚請。制曰武肅。四月庚午奉靈輜殯於衣錦軍。應順元年甲午正月壬午詔勅工部侍郎楊凝式撰神道碑文。將作監張鎔奉敕督工建塋。光祿寺少卿張褒宣命。一切葬典用王禮。御葬於安國縣衣錦鄉茅山之原。即今臨安縣址

論曰。王挺命世之才。屬艱難之運。奮臂起義。所向披靡。以寡敵衆。黃巢不犯其鋒。伏順伐逆。漢宏至於授首。誅逐帥之薛朗。遂申屬郡之禮。平作僞之董昌。不奪本朝之命。加之禦淮戎以耀威。奉梁室而示略。迴江山之深險。致都邑之宏麗。七者克備。五福是臻。故八輔地圖。三受天冊。總四海之戎柄。爲一人之教師。威名赫然。霸業隆矣。然後內敦恭儉。外正刑賞。安民和衆。保定功勳。雖文臺崛起於江東。立德雄據於巴右。比之令德。固不足同年而語哉。

### 文穆王

唐後吳越王諱元瓘。字明實。武肅王第七子。母晉國昭懿太夫人陳氏。唐乾甯元年授鹽鐵發運巡官。金部郎中。賜金紫。天復元年改授禮部尚書。遙領邵州刺史。二年秋田頔求實。武肅王歷選諸子。時王尙幼。年僅十六獨請行。乃再拜而出。武肅王奇而送之。王及宣城。而頔叛於淮。淮師會我師攻之。頔每戰不勝。歸必求王將肆毒。頔母老且賢。常加保護。天祐元年十月我師與淮師攻之甚急。頔曰今日不勝。必殺錢郎。是日頔爲亂兵所殺。頔母遂奉王至我師。衛而歸焉。二年正月制授王檢校右僕射。開平元年正月武肅王命王伐永嘉。四月斬盧僭而還。承制改王內衛都指揮使。檢校尚書右僕

射。十月授王金紫光祿大夫。檢校司空。五年七月賜王贊正安國功臣。進授司徒。守湖州刺史。乾化三年十月敕授王檢校太保。大彭縣開國男。四年六月制授王特進光祿大夫。開國侯。貞明元年。正月敕授王鎮海軍節度使。土客諸軍都指揮使。三年六月制加王檢校太傅。六年十月授王檢校太尉。同中書門下平章事。充清海軍節度使。龍德二年正月敕王特進檢校太尉。兼侍中。仍賜匡扶定亂立証至道功臣。同光二年十月制授王開府儀同三司。檢校太師。兼中書令。天成元年四月武肅王不豫。因如衣錦軍。命王監國。仍俾便宜行事。七月武肅王至自衣錦軍。而中外無所專命。武肅王嘉嘆久之。三年二月授王鎮海鎮東等軍節度使。杭州越州大都督長史。七月己巳忠獻王生。四年八月己酉忠懿王生。文穆王功績詳武肅王年表。

長三年壬辰王四十六歲三月己酉大雪。二十六日庚戌武肅王薨。王哀慟四日不食。四月己未王即位。用藩服之儀。從治命地。赦境內一應荒絕田產。尙隸租籍者悉免之。中外班賚有差。是月庚午奉武肅王靈輜殯於衣錦軍之寢。

四年癸巳王四十七歲三月敕賜先王之贈。又授王起復雲麾將軍。上金吾衛大將軍。員外置同正員。王兄元諫檢校太師。兼中書令。王弟元瓊檢校太傅。同中書門下平章事。七月敕授王中書令。進封爲吳王。

十二月庚戌太傅王兄元瓊卒。

後唐閔帝在位一年應元年甲午王四十八歲正月敕遣使册封王爲吳越王。壬午奏葬先王於茅山。四月潞王從珂率兵入洛。遂闕帝而自立。改元清泰。

後唐廢帝三年

在位三年

清二年乙未王四十九歲三月制授靜海軍節度使。檢校太保。中書令。王弟元球守太師。七月重建開元宮。

追福先王也。

三年丙申王五十歲七月敕建先王廟於東府。閏十一月契丹石敬瑭爲晉帝於洛。改元天福。十二月敕王天下

兵馬都元帥。

後晉高祖八年

在位八年

天二年丁酉王五十歲四月免境內本年租稅之半。八月戊申王新建五廟於城南。

三年戊戌王五十二歲十一月敕使賫捧吳越王玉册及沿身法物等至。

四年己亥王五十三歲二月敕授世子弘僉爲梁州團練使。九月詔陞婺州爲武勝軍。王兄元懿爲節度使。十月

王子吳越國莊睦夫人馬氏薨。是月敕授王天下兵馬元帥。十二月辛酉葬恭穆夫人于衣錦軍陵仙鄉。

五年庚子王五十四歲二月甲辰温州刺史王子弘僉卒。三月壬申敕授王天下兵馬都元帥。四月甲子世子弘僉

薨。十二月以子弘佐爲內衙諸軍都指揮使。

六年辛丑王五十五歲三月敕遣使册授王守尚書令。八月辛亥王薨於瑤臺院之綵雲堂。在位十年。敕贈太師

。謚曰文穆。詔宰相和凝撰神道碑。

七年壬寅二月癸卯葬於杭州龍山之南原。

論曰王以英毅之姿。兼仁厚之德。入田頴豺狼之穴。示忘身之慮。破知誥蛇豕之羣。揚對敵之威。

奮劍屢成大勳。歷紐遂當慶嗣。念功忘過。崇德布政。然後聿修先烈。光紹世官。天子賴其元勳。諸侯奉爲盟主。以稱克家之令嗣。以號列國之賢君。則彤弓緇衣。不足侔其美也。

### 忠獻王

晉後吳越王諱弘佐字玄佑。文穆王第二子也。母吳越國仁惠夫人許氏。王以後唐天成三年七月廿六日己巳生於功臣堂。後晉天福六年八月。王以遺命承制授兩軍節度使。九月庚申王卽位於仙居堂。赦境內外班賚有差。及租稅等。丞相曹仲達攝政事。是王辛未王遷於思政堂。命境內給復一年。諸關梁禁制悉除減。又命田園有隸道宮佛寺比入賦稅者悉免之。十一月勅授王起復鎮國大將軍。右金吾衛上將軍。員外置同正員。領鎮海鎮東等軍節度使。檢校太師。兼中書令。吳越國王。仍賜保邦宣化忠正功臣。

七年壬寅五歲二月癸卯敕葬先王於龍山之南原。三月敕遣使歸先王之贈。乙丑中吳建武等軍節度使廣陵郡王王世父元璪姪。子文奉嗣。王申制仍改賜保邦宣化忠正翊戴功臣。十二月己巳以龍山武功堂爲文穆王廟。

八年癸卯六歲正月重建功臣堂。十月敕遣使授王玉册。十一月辛巳王駕遷於功臣堂。是月王納元妃仰氏。

後晉出帝在位三年

開元元年甲辰王七歲三月敕王起復。十一月王命從兄仁俊爲內外馬步都統軍使。弟弘保爲東府安撫使。

二年乙巳王十三月丙午王從祖順化軍節度使鐸卒。七月修武肅王廟於城西。奉旃檀神像而致焉。十月  
敕遣使册王守太尉。

三年丙午王十三月敕授王東南面兵馬都元帥。仍改賜推誠匡運忠亮威德功臣。七月庚寅吳越國夫人王

妣許氏薨。八月重建天寵堂。是月王申葬王妣仁惠夫人有安國城西山之原。十月金陵攻福州。節度

使遣將求救於王。是月王命統軍使張筠趙承泰等率水賜兵三萬人以救之。并曰唇亡齒寒。吾爲天下

元帥。曾不能救鄰難。將安用之。諸將有異議者斬之。十二月王命弟弘僊爲湖州刺史。

後漢高祖在位一年未改元

四年丁未王二十二月晉劉知遠稱帝於河東。國號大漢。三月遣將率水師救福州。大敗淮師。獲其將楊匡

業等。擒戮裨將并餘黨二萬餘衆。器械數十萬。李弘義歸附於我。更名孺登。四月孺登遣弟孺賢來

請入覲從之。五月我師凱旋。王饗將帥於光册堂。賞賚有差。是月敕授王諸道兵馬都元帥。仍賜賚

忠緯武恭懿翊戴功臣。六月乙卯王薨於咸甯院之西堂。在位七年。敕諡曰忠獻。八月敕葬於龍山之

西原。

論曰。王岐嶷之姿。雖由天縱。績嗣之日。方屬妙年。箝藏困回祿之劫。將校競陸梁之志。乃能

恭勤庶務。紹開霸圖。有果斷之名。無酣嗜之累。以至興復宮室。開拓土疆。光有大功。聿修厥

德。而享祚非永。哀哉。

### 忠 遜 王

後吳越王諱弘侖。字隆道。文穆王第三子。孝獻世子同母弟。起家內衛指揮使。檢校司空。開運元年

十一月出爲東府安撫使。累授檢校太尉。尋拜丞相。四年六月丙寅卽位於天冊堂。時王年二十歲與忠懿王同庚。

七月閩李璠來覲。閏七月王命李璠復任無諸。王親餞於碧波亭。八月葬忠獻王於國城之西原。

十月忠懿王至自丹邱。十二月李璠復貳於我。王命安撫使鮑修讓等攻討。擒而戮之。是月命丞相吳程知福州威武軍事。庚戌內衙統軍使胡進思指揮使諸溫斛滔等。以內衙兵遷王於義和後院。諸將校率衆迎忠懿王卽位。自忠獻王時。諸將校驕慢。雖旋加誅殛。而在位者皆優饒遇之。及王繼嗣。性既嚴急。誅杭越侮法吏三人。而統軍使胡進思恃迎立功。干預政事。王惡之。每有僭越必顯責讓。進思憂懼不自安。內衙指揮使何承訓希旨請誅之。又謀於都監使水邱昭秀。昭秀以進思黨盛難制。請於王且容之。王猶豫未決。承訓懼。反以謀告進思。進思遂亂。率親兵戎服入見。王叱之不退。因惶駭入義和院。進思鎖其門。矯稱王命。告中外曰。王猝得風疾。傳位於俶。因率諸將迎於私第。且言於丞相元德昭。德昭至立簾下不拜。曰俟見新君。進思等亟出簾。德昭乃拜。進思稱王命承制授元帥。元帥曰。若全吾兄。乃敢受命。不然當避賢路。進思許之。元帥始視事。後王薨。請諡曰忠遜。以王禮葬會稽秦望山之原。

論曰。王以英敏之行。惡強梁之黨。納承訓阿順之說。昧忠懿嚮晦之機。僅以寡謀。至於失位。易曰君不密則失臣。臣不密則失身。誠哉是言也。猶賴鴿原至愛。致稽嶺安居。養玉體以終天年。掩泉扃而備王禮。古之廢君失國。未有若斯之安全者。於此見忠懿王仁孝之道至焉。

### 忠懿王

後漢吳越國王諱弘倬。字文德。文穆王第四子。母吳越國恭懿太夫人吳氏。王以後唐天成四年己丑八月

二十四日生於功臣堂。後晉天福四年十二月承制授內衙諸軍指揮使。檢校司空。忠獻王時累授王特進檢校太尉。開運四年三月出鎮丹邱。今合下車數月。有僧德昭語王曰。此地非君爲治之所。當歸國城。不然將不利矣。王察其言。卽求歸。九月甲戌發自丹邱。是日大風。東南有雲如樓閣之狀。識者異之。十二月內衙統軍胡進思等幽廢忠遜王。乃奉迎王於南邱。王見府僚將校於帥府之外。謙讓者三。諸將校以王素有德望。俯伏稱賀。王乃蒞事於元帥府之南序。

後漢隱帝三年

在位

乾元年戊申王二十歲正月朔。漢主南郊改元。是月乙卯王卽位於天龍堂。敕境內租稅班賚有差。王戊奉廢王於衣錦軍。二月辛卯王親祀五廟。乙未誅內衙指揮使何承訓。懲其反覆。中外大悅。三月敕歸忠獻王贖。丙寅內衙胡進思請去廢王。王不許。於是進思憂懼。不二日發疽而死。十一月下令以每歲租賦逋滯者悉蠲之。仍著爲令。百姓歌舞焉。

二年己酉王二十一歲三月敕授王東南兵馬都元帥。鎮海鎮東等軍節度使。浙江東西等道管內觀察處置兼兩浙鹽鐵制置發運等使。開府儀同三司。檢校太師。兼中書令。杭州越州大都督。上柱國。吳越國王。

。仍賜匡聖廣運同德保定功臣。五月內衙指揮使斜滔以罪黜於處州。七月王命弟弘億爲明州刺史。十月敕使持節備禮賜王王册金印法物等。是月內衙指揮使諸溫以罪黜於溫州。是歲下令以境內田畝荒廢者。縱民耕之。公不加賦。民皆大悅。

三年庚戌王二十二歲

二月金陵以僞永安軍節度使查文徽取福州。遣陳誨留從効等率兵犯我無諸。王命潘審矯率師禦之。生擒文徽等三十餘人。斬馘萬計。陳誨留從効等走。三月敕授王守尙書令。四月王以

查文徽等獻俘於五廟。國人皆爲之聳觀。是月丙午王親享五廟。六月敕授王兄弘僊知福州威勝軍事。七月命弟弘億爲東府安撫使。十月王歸查文徽於金陵。

後周太祖三年

廣元年辛亥王二十三月制授王諸道兵馬都元帥。仍賜尙書令冊禮。四月王奉廢王居東府。即越州六月丙

午武勝清海等軍節度使王伯元薨。以其子仁敬嗣。

二年壬子王二十二月制授王天下兵馬大元帥。改賜推誠保德安邦致理忠正功臣。四月敕衢州刺史王叔

元瓚知福州威勝軍事。王弟弘僊爲衢州刺史。六月乙未王妣吳國順德太夫人吳氏薨。八月敕葬恭懿夫人於錢塘慈雲嶺之西原。

三年癸丑王二十三月敕授王起復鎮東大將軍。左金吾衛上將軍。王以兄弘僊爲温州刺史。四月建報恩

元教寺於城北。荐王妣也。王親閱內外諸軍。非驍勇者咸停放之。十月大閱馬步軍艦艦於碧波亭。十一月命弟弘仰爲台州刺史。是歲境內大旱。邊民有鬻男女者。命出粟帛贖之歸其父母。仍命所在

開倉賑卹。

後周世宗六年

顯元年甲寅王二十五月王命鑄王妣恭懿太夫人銅容二。致於奉國金地二尼寺。

二年乙卯王二十七月有虹入天長樓。在內城王避寢於思政堂。九月王復居於天寵堂。閏月丁酉世

勅司空李穀率師伐金陵。十二月王遣使入貢。敕王出兵會擊金陵。子惟濬生。

三年丙辰王二十正月世宗東征。詔王以國兵分路進討。二月王師入淮南。靜海制置使姚彥洪率家屬軍

士戶口等一萬餘人奔於我。是月王命諸將分攻毗陵宣城。并以水師次江陰。應王師也。三月我師克常州。生擒刺史趙仁澤等一百餘人。遂班師。六月王命兄仁俊知福州彰武軍事。周政威勝軍為彰武軍。九月王親閱於龍山教場。是歲始括境內民丁以益師旅。

四年丁巳王二十九歲正月始議鑄錢。七月王命弟弘信為衢州刺史。八月勅賜王生辰御服紅袍二副。每歲班賜自此始也。

十一月泉州刺史留從効請修貢於京師。附我以聞。詔從之。

五年戊午王三十歲正月丁未前衢州刺史王弟弘偃卒。偃性仁慈。年二十五卒。中外咸惜之。二月王命將率水師二萬會攻江北。

諸郡悉平。三月敕賜王羊馬橐駝。四月辛酉城南火延於城內。王出居都城驛。詰旦未息。將焚饗國倉。王親率左右至瑞石山。命酒以祝之曰。不殺不德。天降之災。宮室已矣。而倉廩備積。師旅之備。實所痛惜。若盡焚之。民命安仰。天其鑒諸。乃命從官伐林木以絕其勢。火遂滅。即日下罪己之詔。中外聞之頓安。丁卯王命弟弘儀復為東府安撫使。六月戊寅前台州刺史王弟弘仰卒。仰文穆子。善騎射通儒術。性雖嚴急而政事寬簡。終年二十四。謚曰成顯。七月勅賜王兵甲旗幟等。十月乙巳王遷於思政堂。王第九

六年己未王三十一歲二月王遣使入貢。四月敕陞湖州為宣德軍。授王兄弘儀特進檢校太尉。充本軍節度使。

八月敕賜王崇仁昭德宣忠保慶扶天翊亮功臣。又敕王元妃孫氏為吳越國賢德夫人。王世子惟濬為鎮海鎮東等軍節度副使。檢校太保。十月重建功臣堂。

宋太祖在位十七年改元三

建元年庚申王三十二歲三月大慶堂成。王舊邸也。四月敕授王天下兵馬大元帥。六月敕加吳越國賢德夫人。

爲賢德順睦夫人。又授王世子惟濬金紫光祿大夫。檢校太保。充節度使。是月敕陞明州爲奉國軍。授王弟億金紫光祿大夫檢校太保。充本軍節度使。九月揚州李重進叛。車駕東征。王遣師至潤以迎之。十一月揚州平。王命衢州刺史從弟信入貢。十二月王遷於功臣堂。

二年辛酉王三十三歲三月敕使送王弟信回。仍賜王戰馬羊駝等物。十二月王命從弟信復爲衢州刺史。

三年壬戌王三十四歲五月東陽新定信安三都有災。王遣使賑卹。十月敕授救王世子惟濬爲邕州建武軍節度使。

四年癸亥王三十五歲九月重建天寵堂。大閱樓艦於西湖。賜內外將校服帶有差。十一月王命姪昱入貢。敕

改賜王承家保國宣德守道忠貞恭順功臣。又加王世子惟濬檢校太尉。十二月命王姪郁爲秀州刺史。

乾德二年甲子王三十六歲三月制授王天下兵馬都元帥。四月重建城南寶塔寺成。鑄先武肅王文穆王忠獻王銅

容供於寺。八月王復位於天寵堂。謂丞相以下曰。頃以寡德。遂貽災釁。曾未十年。內外如斯。實

宗廟之休。公等之力。然作之者勞。吾不敢忘。更賴公等以輔不逮。丞相以下咸稱大慶。十一月王

師伐蜀。王命司馬孫承祐等率師會焉。

三年乙丑王三十七歲正月西川平。二月王命姪昱台州刺史入賀。八月重建寶塔寺於城北。十一月王命叔元

瑣爲睦州刺史。姪昱復爲台州刺史。

四年丙寅王三十八歲二月乙亥宣德節度使同平章事王兄偁卒。偁明吏術能詩。年三十八卒。謚恭襄。五月丙戌王從兄蔡州刺史

仁傲卒。六月敕授王子惟治爲容州甯遠軍節度使。金紫光祿大夫檢校太保。九月癸卯王兄知福州彰

武軍事弘僊卒。僊爲文穆王養子。洞曉政術。吏不敢欺。性簡儉。善騎射。能書有文而自晦。穆鎮時。百十

一月王命弟信知婺州武勝軍事。

五年丁卯

王三十九歲

二月除元瓚知福州彰武軍事。王弟奉國軍節度使億卒。億性倭拔強正。善屬文。末年夢金甲神告其終期。因會賓客飲酒與之訣別。

癡疾三日而終。年三十九歲謚曰康寧。

王申祀禹祠於東府。己卯王從兄温州刺史仁俊卒。三月五星聚奎。如運珠太平是之兆也。

月王子惟濬入貢而還。賈賜吳越國賢德夫人珠翠冠帔等。四月敕命于子惟治兼判奉國軍事。七月敕授王弟儀金紫光祿大夫檢校太保。十月王遣使入貢。

六年戊辰

王四十一歲 三月建奉先寺於城西。荐文考。六月戊午長洲縣民王安妻產三子。七月王辰知福州彰武軍事王叔元瓚卒。瓚少強直。好詩學武。在麾下者。畏服。處兄弟和睦。卒年六十有七。

開二年己巳 王四十一歲 八月敕賜王御衣紅袍金鎖甲駝馬等物。

三年庚午

王四十二歲 九月王遣子惟濬入貢。

四年辛未

王四十三歲 十一月敕賜王開吳鎮海崇文耀武宣德守道功臣。

五年壬申

王四十四歲 三月王世子惟濬入貢歸。賈賜吳越國賢德順穆夫人珠翠冠帔一副。九月王遣使入貢。

太祖謂曰。汝歸語元帥。當訓練甲兵。江南偃強。朕將討之。元帥當助我。無信人言。唇亡齒寒。

王密表謝。且請師期。十月王親饗五廟。復謁寶塔寺。拜先王銅容。

六年癸酉

王四十五歲 八月敕賜玉帶一條。御衣一襲。

七年甲戌

王四十六歲 五月敕賜王襲衣玉帶玉鞍勒馬金銀器錦繡各物。七月詔王取常州。王即日命境內訓練士卒。揀閱兵甲。十月庚申王親率將校師旅五萬餘人。癸亥次嘉禾。丙寅入毗陵。賊望風而遁。戊

士卒。揀閱兵甲。十月庚申王親率將校師旅五萬餘人。癸亥次嘉禾。丙寅入毗陵，賊望風而遁。戊

辰克關城。王嘗於九仙墩。命凌超等分營四門。王諤攻江陰。金彥滔攻宜興。並率水師由吳興出太湖而進。十一月詔賜湯藥。是月克宜興。王卽命獻俘於京師。十二月癸亥王親率軍將敗賊於城北。金陵大將盧絳管遁。

八年乙亥

王四十七歲

二月詔遣使以戎服五萬副，賜王軍卒。又賜王將帥服帶器帛有差。四月我師大攻城壘。

。知常州軍事禹萬誠降於軍門。詣行府待罪。王賜以衣冠器幣等。悉送於京師以請命。又命羊潛置其家以慰之。江陰甯遠等軍來降。王悉宥之。是月敕授王太師。仍賜開吳鎮越崇文耀武宣德守道中正功臣。天下兵馬大元帥。兼昇州東南招撫制置使。開府儀同三司。檢校尚書。中書令。上柱國。吳越國王。爵祿如故。仍賜湯藥。及沿身法物。五月奏授丁德裕權知常州。敕賜王襲衣玉帶玉鞍勒馬金銀器錦綵各物。詔王歸國。是月王遣將率兵會王師於金陵。十一月我師克金陵。僞主李煜降。王乃表賀。并請入覲。十二月敕賜王綵錦御衣金盞金甲御酒駝馬各物。仍賜御札一通變馬。又賜王麾下孫承祐爲平江軍節度使。沈承禮爲甯海軍節度使。又賜防禦使者三人。爲刺史者六人。賞克金陵之功也。是月詔王入覲。

九年丙子

王四十八歲

正月庚申王發自國城。先是太祖因王入覲。敕使開河一道。自瓜州口至潤州口。達龍舟堰。以待王舟楫。遂名曰大通堰。又於京城之南敕建大第。連亘數坊。棟宇宏麗。備時什物供帳之類。皆如王者。賜名曰禮賢宅。以俟王駐節焉。沿路敕賜王及夫人湯藥茶果法酒金鞍馬駝等物。

並詔節度興元尹皇子秦王德昭迎勞。王至京師。賜宴於迎春苑。尋詔王居禮賢宅。二月戊午王朝見於崇德殿。進賀平江南。及謝允朝覲表貢。奉犀玉帶及寶玉金器五千餘事。上酒一千瓶。遂賜宴於長春殿。又賜王黃金照匣鈔鑰餅盤等御物。己未王進謝。詔宴於後苑。丙寅駕幸禮賢宅。賜金二千

兩。銀三萬兩。絹三萬疋。又賜王世子惟濬及陪臣等絹帛有差。是日王遣世子又進雲龍通犀帶二條。金玉寶器五千事。三月制賜王劍履上殿。詔書不名。進封王夫人孫氏爲吳越國王妃。封王女爲彭城郡君。仍詔賜王妃湯藥法酒茶果等五百餘事。時又詔王宴於苑中。上命王與太宗秦王敘昆弟之禮。王叩頭陳讓再四。是月奉辭。詔賜金銀器白銀玉帶下鞍御馬綾羅錦緞銀裝戎器馬匹腰帶絡繹衫等事頗多。又賜王麾下等官錢帛有差。太祖謂王曰。南北風土。炎暑不同。宜加調和。卿可早歸。於是手賜金印一方。仍授舊封諸命。又親賜密封黃綾包袱一封。謂王曰。卿至途中宜密視之。王領謝。進謁顯三歲一朝。上曰。川陸迂遠。當俟我詔即來。次日王妃入辭。中宮賜金器三百兩。衣着二千匹。銀二千兩。是月甲戌王離京師。詔賜宴於迎春苑。敕遣使押翰林御廚儀器送至睢陽。次日又賜王及王妃湯藥。戊子王在舟中拜啓所賜黃袱。視之皆羣臣乞留王章疏也。四月丙辰王至國城。丙寅王命子惟治詣闕謝恩。卽日王視事。移座於東偏。謂左右曰。西北者神京所在。天威不遠。顏咫尺。某豈敢甯居乎。十月太祖宴駕。太宗卽位。改元太平興國。敕使來告哀。王率府僚將校等發哀。王二日不食。十日不視事。十一月王遣子惟滄實奉通天犀帶一條。金器五百事。玳瑁器五百事。塗金銀香龍等巨萬。詣闕以爲賀。是月吳越國王妃孫氏薨。

宋太宗在位二十一年

太平興國二年丁丑五十四歲  
二月敕遣使來歸王妃之贈。賜證曰順德恭穆。五月王下令以文軌大同。封疆無患。凡百禦敵之制。悉命除之。境內諸州城。有白露屋及防城物。亦令撤去之。八月遣惟濬入朝修覲禮也。

三年戊寅五十五歲  
二月六日王發自國城。沿途均敕使宣問。并屢賜湯藥酒筵鞍馬衣物等事。三月二十四

日至京師。敕詔皇太弟開封府尹廷美賜宴於迎春苑。仍賜王衣帶金銀器玉鬻鞍馬各物。是日王安唐禮賢宅。二十六日朝見。太宗差親王迎接。賜宴於長春殿。王進法酒金銀器物綾羅龍鳳香等件。此後賜宴數次賞賚甚厚。四月廿六日王表謝。請吳越封疆歸於有司。優詔不允。五月四日王再表請。乃下詔宣依。於是部州十三。縣八十六。戶五十五萬七百。兵十一萬五千。營民籍倉庫。盡獻於朝。帝御崇元殿受之。敕陞揚州爲淮海國。制王依前守太師尙書令。兼中書令改封王爲淮海國王。仍充天下兵馬大元帥。改賜甯淮鎮海崇文耀武宣德守道中正功臣。以王弟弘儀弘信并爲觀察使。王子惟濬惟治并爲節度使。十三日賜王淮海國王金印。仍賜禮賢宅爲永業。十五日又授王子惟演惟灝及未官者子弟。并墜下將校孫承祐沈承禮均爲節度使等官有差。又賜宰相而下拜官者二千五百人。八月六日詔王總麻以上親丁并赴闕授以官爵。九日命以杭州俗人馬迎恩等四十五人賜王。俾備旦夕宴樂。自是常賜宴賞。恩禮備至。

四年己卯<sup>王五十</sup>二月王朝賀。大宴於苑中。太宗顧王甚厚。是月車駕征太原。王請從行。詔別押供帳御廚從王。撫諭錫賚。殆無虛日。會劉繼元降。上御蓮城臺。顧謂王曰。卿能保全一方。以歸於我。兵不血刃。深可嘉也。

五年庚辰<sup>王五十</sup>正月朝賀。王以劍履升殿。觀者榮之。三月清明節。召王乘馬擊球。是日宴於殿廡。飲必唱籌。上謂王曰。卿中年宜以此自娛。四月一日王以風疾告假。遣御醫中使一日三至。仍賜湯藥茶果。車駕親幸。撫問再四。十月宴王於朝元殿。至暮又以金裝肩輿送王歸。仍以賜焉。十一月駕幸大明府。王請從。詔許賜王肩輿。舁以隨行。

六年辛巳<sup>王五十</sup>正月王風疾復作。敕遣尙醫中使絡繹而至。自是賜王免朝。

七年壬午王五十 四月王風疾復發。上遣使慰問。賜王湯藥并龍鳳簫笛。娛王終日。

八年癸未王五十 正月十三日賜王珍珠寶燈一座。仍命坊市張燈於王第前後。俾王怡悅。五月賜王珍珠黃羅傘一。龍香涼茶二十斤。十月王以天下無事。兵革偃息。乃讓大元帥及國封。表上但許罷兵柄。

。其國封如故。十二月遣使賜筵一席。以儀鑿迎送王第。近代無比。

熙元年甲申王五十 二月二日上幸太乙宮。路由禮賢宅。王力疾出見。上駐蹕撫諭再三。及駕返命取他道歸。遣使諭王。恐煩迎接。十二月進封王爲漢南國王。仍改賜甯海鎮國崇文耀武宣德守道功臣。

二年乙酉王五十 正月上以王善於草隸。遣使取王筆迹。王以風疾。手不能握筆。將往時所書絹圖草字以進。詔加褒獎。仍賜金匣玉硯一副。龍鳳墨百挺。紅綠筆千管。盈丈紙二百軸。白絹三百疋。十一月授王子惟洽等九人官爵有差。

三年丙戌王五十 二月上以王疾未痊。詔免入朝。改封南陽國王。仍賜領南陽節鉞。王復抗表陳護國事。表上不許。四月王將赴南陽。詔免入辭。賜衣帶金銀玉器。又詔王子惟澹惟灝並從王行。

四年丁亥王五十 二月敕封王爲許王。仍改賜安時鎮國崇文耀武宣德守道功臣。

端元年戊子王六十 二月進封王爲鄆王。七月王不康。太宗聞之。敕遣中使醫官泊王諸孫絡繹而至。又屢賜湯藥。八月廿三日王於寢齋之西軒。命左右讀唐書數篇。命諸子孫誦詩數篇。未迄而風恙復作。四鼓而薨。是夕大流星墜於正寢之上。光燭滿庭。太宗聞之。哀悼不已。詔廢朝七日。復勅使護喪歸於京師。十一月廿三日至。太宗復發哀詔。權窆於城東別墅。即日命有司致祭。二十五日命持節追冊爲秦國王。定諡忠懿。明年正月丁酉遣使押翰林儀鑿鹵簿鼓吹。葬王於河南洛陽縣賢相里陶公

原。命大臣以下俱素服送三十里。仍命有司撰碑文。

論曰。王以尊謹之資。居藩輔之位。會遭國變。遂承世祚。安民保境。踵列祖之成規。節用愛人。培一方之元氣。其敬兄也。如季歷之事泰伯。而泯猜忌之心。其納土也。如管融之歸光武。而加恭順之德。不彰人過。以邀寵榮。不恃己才。而生傲慢。卒之忠著當時。澤延後裔。奠乎尙已。

按錢氏家乘。除五王年表外。尙有五王世家一門。敘事簡明。體例謹嚴。因篇幅過多。不能全載。至沈麟之吳越世家。有云。『讀殘唐五代史。而傷生民塗炭。至於其極也。吳越 錢武肅王咽起臨安。削平大亂。使十四州之民。不知兵革。男女農桑。安常如太平。此其功亦仁矣。及宋太祖一統。而其孫忠懿王又能知天命所歸。納土稱藩。去國如若傳舍。是故江浙獨得保全。始終不被兵禍。錢氏功德在生民。豈可量哉。』武肅驅殘暴。平反側。則有湯武征誅之功。忠懿王納土地。退稱藩。則有唐虞揖讓之德。宜其俎豆千禩。血食百世而不絕。誠爲篤論。其他蘇軾表忠觀碑記。文天祥劉基武肅王傳。尤極推崇。惟年表詳於事實。而無論斷。五王世家。則有論斷。而又略於事實。如能合而觀之。則可窺全豹矣。嘉興家抑之相國。又刊有武肅王功業圖。余亦搜羅唐昭宗詔賜 武肅王之鐵券。暨清高宗之鐵券歌。謝鐵券表。吳越王賈。銀龍簡。金塗塔。銅爵。武肅王忠懿王墨寶。及吳越國境圖。外間多未見之。茲一併攝影加入。使閱者知吳越之歷史與事實。孟子曰。不嗜殺人者。能一天下。錢氏五王均以保境安民爲職志。不欲以一己之尊榮。使天下人民於塗炭。故百年不見兵革。仁者有後。殆天意也。文選謹識

# 家訓

吳越武肅王三十二世孫文選謹錄

## 武肅王八訓

(一)曰吾祖自晉朝過江。已經廿七代。承京公枝葉。居住安國。吾七歲脩文。十七習武。二十一上入軍。江南多事。溪洞猖獗。訓練義師。助州縣平深洞。尋佐隴西。鎮臨石鏡。又值黃巢大寇奔衝。日夜領兵。七十來戰。固守安國。餘杭。於潛。等縣。免被焚燒。自後輔佐杭州郡守。爲十三部指揮使。值劉漢宏譏起金刀。擬興東土。此時挂甲七年。身輕百戰。方定東甌。初領郡印。尋加廉察。又值劉浩作亂於京口。將兵收復。卽繕浙西節旄。又值隴西僭號。詔勅興兵。三年收復羅平。蒙大唐雙授兩浙節制。加封郡王。自是恭奉化條。家傳衣錦。立戟私門。梁室受禪。三帝加爵。封錫國號。後唐興霸。重封國號。玉册金符專降。使臣宣揚帝道。受非常之叨忝。播今古之嘉名。自固封疆。勤脩貢奉。吾五十年理政錢唐。無一日耽於三惑。孜孜乾乾。皆爲萬姓三軍。子父士客之軍。並是一家之體。

(二)曰自吾主軍。六十年來見天下多少興亡成敗。孝於家者十無一二。忠於國者百無一人。予志佐九州。誓匡王室。依吾法則。世代可受光榮。如違吾理。一朝興亡不定。

(三)曰吾見江西鍾氏。養子不睦。自相圖謀。亡敗其家。星分瓦解。又見河中王氏。幽州劉氏。皆兄弟不順不從。自相魚肉。構訟破家。子孫遂皆絕種。又見襄州趙氏。鄂州杜氏。青州王氏。皆被小人門牆。盡喪家門。汝等兄弟。或分守節制。或連籍郡符。五升國號。一領藩節。汝等各立台衡。

。並存功業。古人云妻子如衣服。衣服破而更新。兄弟如手足。手足斷而難續。汝等恭承王法。莫縱驕奢。兄弟相同。上下和睦。

(四)曰爲婚姻須擇門戶。不得將骨肉流落他鄉。及與小下之家。汗辱門風。所娶之家。亦須揀擇門閥。宗國舊親。是吾鄉縣人物。粗知禮義。便可爲親。若他處人。必不合祖宗之望。

(五)曰莫欺孤幼。莫損平民。莫信讒人。莫聽婦言。

(六)曰兩國管內綾絹綢綿等賤。蓋謂吾廣種桑麻。斗米十文。蓋謂吾漏開荒畝。莫廣愛資財。莫食人錢物。教人勤耕勤種。歲歲自得豐盈。

(七)曰吾家門世代居衣錦之城郭。守高祖之松楸。今日興隆。化家爲國。子孫後代。莫輕棄吾祖先

(八)曰吾立名之後。須子孫紹續家風。宣明禮教。子孫若不忠不孝不仁不義。便是破家滅門。千萬叮囑。慎勿違訓。

### 武肅王遺訓

余自束髮以來。少貧苦。肩販負米以養親。稍有餘暇。溫理春秋。兼讀武經。十七而習兵法。二十一投軍。適黃巢叛。四方豪傑並起。唐室之衰微。皆由文官愛錢。武將惜命。託言討賊。空言復讜。而於國計民生全無實濟。余世沐唐恩。目擊人情乖忤。心憂時事艱危。變報絡繹。社稷將傾。余於二十四得功。由石鏡鎮百總枕甲提戈。一心殺賊。每戰必克。大江以內十四州軍。悉爲保障。故由副使遷至國王。垂五十餘年。身經數百戰。其間叛賊誅而神人快。國憲立而忠義彰。無如天方降禍。霸主頻生。余固心存唐室。惟以順天而不敢違者。實恐生民塗炭。因負不臣之名。而恭順新朝。此余之隱痛



世代居衣錦之城郭。守高祖之松楸。今日興隆。化家爲國。子孫後代莫輕棄吾祖先。第十吾立名之後。在子孫紹續家風。宣明禮教。此長享富貴之法也。倘有子孫不忠不孝不仁不義。便是壞我家風。須當鳴鼓而攻。千叮萬囑。愼體吾意。爾等勉旃。毋負吾訓。

按 武肅王八訓及遺訓。告誡子孫。紹續家風。宣明禮教。千叮萬囑。愼守勿違。凡係王之子孫。自應遵守。惟支派一事。年代久遠。各派紛歧。每有出自一本。因支派未能統一。而視等秦越者。譬如衆流。皆發源於星宿海。而涇渭顯分。羣峯皆沿崑崙山。而秦華對峙。甚非所以光昭前烈。垂裕後昆也。曩者余編輯錢氏家乘。已舉一直系之宗族。則爲世系一門矣。錢氏在中國各省者。都百餘支。約有二十二萬餘人。

武肅王曾有錢氏百字派之製定，文曰。

聖神功德厚，光盛武陵春。敕券傳家寶。文章貫日清。詩書忠孝遠，蘭桂冕旒尊。溫良恭儉讓。奕葉立尼門。王侯從古有。英烈至今新。物華天象應。人傑地靈生。蛟騰連鳳起。電紫與霞橫。海闊波濤大。枝繁根蒂深。仰觀星斗近。俯視泰嵩平。皇圖期鞏固。終始襲駢臻。

此百字派。雖因後世支派日繁。未能悉依以上字派次序。然以世數考之。可以得其大概。今錄出載入家訓之後。俾後世子孫未見此百字派者。可以做而行之。漸見錢氏支派趨於一致。使 先王詔示子孫之用心。可以昭垂千古也。文選謹識

## 遺文

### 武肅王築塘疏

爲築塘禦潮。請復古基。以衛民生事。竊惟江之水源。自衢。婺。睦等州各道匯入富春奔騰而入。潮汐由杭州之鹽官。秀州之海鹽。各路匯入熬子門而入。每晝夜兩次衝激。岸漸成江。近年以來。江大地窄。溯自唐貞觀以前。居民修築。不費官帑。塘堤不固。易於崩坍。迨後兵革頓興。民亦屢遷。遂廢修塘之工。海颶大作。怒濤掀簸。堤岸衝齧殆盡。自秦望山東南十八堡。數千萬畝田地。悉成江面。民不堪命。羣訴於臣。臣目擊平原沃野。盡成江水汪洋。雖值干戈擾攘之後。卽興築塘修堤之舉。春秋時白圭築堤。壅於隣國。孟子譏以爲仁人所惡。臣今按神禹之古迹。考前人之治堤。其水仍導入海。不傷隣界。則土地復而隣無患。塘之不可不築一也。況民爲社稷之本。土爲百物所生。聖人云有土斯有財。塘之不可不築二也。經始於開平四年八月。竣事於是年十月。功成計費十萬九千四百四十緡。堤長三十三萬八千五百九十三丈。以禦江濤。外加土塘。內築石堤。不辭鞭石畚土之勞。以圖經久樂利之計。塘之不可不築三也。況風氣所凝。人材所聚。昔之汪洋浩蕩。今成沃壤平原。東南水土長生。亦可以儲精氣之美。人文之盛。今則徵科有據。常賦無虧。歲獲屢登。民亦奠業。臣非敢沽名以邀斯民之戴德。實不忍以沃壤之區。投之江漢耳。茲塘已築。將見安瀾永慶。海晏河清矣。謹將築塘緣由。據實奏明。伏維睿鑒謹奏。開平四年十月、

## 武肅王謝賜鐵券表

恩旨賜臣金書鐵券一道。恕臣九死。子孫三死者。出於眷眷。形此論言。錄臣以絲髮之勞。錫臣以山河之誓。鑄金作字。指日成文。震動神祇。飛揚肝膽。伏念臣微從筮仕。逮及秉麾。每自揣量。是何叨忝。所以行如履薄。動若持盈。惟憂福過禍生。敢望愼終護末。豈期此志上感宸聰。憂臣以處極多危。慮臣以防微不至。遂開聖澤。永保私門。勛以功名。申諸帶礪。雖君親屬念。皆云必恕必容。而臣子爲心。豈敢傷慈傷愛。謹當日慎一日。戒子戒孫。不敢因此而累恩。不敢乘此而買禍。聖主萬歲。愚臣一心。臣鏗誠惶誠恐稽首頓首。

## 勸董昌仍守臣節書

杭州節度使。開國公錢鏗。致書於威勝軍董節度隴西郡王麾下。竊鏗與節度同起布衣。均膺組綬。既受皇家厚祿。宜盡臣下微忱。詩曰大邦維翰。書曰以蕃王室。惟屏惟翰。正我輩報國之職也。方今天子寬仁。在廷忠恕。我輩禦巢微勞。伐宏寸錄。過蒙拔擢。位至公王。感難勝任。愧無以酬。何期麾下壯志未滿。別有所圖。始則陰謀微露。疑信相參。今則僭號微加。神人共忿。鏗與節度生同里。起同時。又有寅恭之誼。相好之情。心有不忍。誼難緘默。敬奉一言以勸曰。與其閉門作天子。使九族百姓受塗炭。不如開門爲節度。俾子孫富貴無憂。禍福去取。惟節度裁之。如以鏗言爲然。及早改悔。仍盡臣節。尙可及矣。謹勸。乾甯二年二月二十三日錢鏗頓首。

### 復邗溝楊氏書

浙中屢得喜音。未敢馳書致賀者。非置麾下於不議。蓋以春秋之義。大夫無私交也。天祐三年閏十二月十七日忽接翰教。并惠隆儀。不啻從天而降。讀至僭號稱尊。不禁戰慄恐懼。伏念唐朝三百餘年以來。歷聖相承。勤政愛民。深仁厚澤。皆堯舜之主也。如鏐昔年不過去僞平賊微勞。獲蒙聖慈。錫以封建車服之榮。鏐自分過優。讓再讓三。堅不允辭。始敢拜受。如麾下位至藩王。今上之待臣工。未嘗薄也。祇以庸臣誤國。僭並起。遂致國亂民愁。凡爲大唐臣子。理應各矢忠忱。以扶唐室。連兵共討。以報君父之讎。庶不愧爲臣職。茲辱明諭。竟乘君難。而欲自立。乃蔑禮忘恩。棄德背義。小人所爲。豈廟堂之士亦忍出此言也。承惠龍衣玉册書疏。斷不敢領。謹以奉璧。并有一言奉勸。惟望採納。竊思漢之王莽。董卓。我朝之祿山。黃巢。漢宏。董昌輩。才勢過人。卒致家破身亡。皆以不守臣節之故。今麾下之才。恐未必能如漢之莽賊。與其取禍于將來。毋寧退守藩封。以全臣節。共竭股肱之忱。以效忠貞之志。則麾下之英風義勇。自必光耀史冊。名垂千古。倘以鏐勸爲非。竊恐禍至臨頭。異日相處。鏐惟知唐而不知有麾下。非以力視。理則當然。禍福去取。君自裁之。不贅。

### 忠懿王恭繳版圖表

臣夔遇承平之運。遠修肆覲之儀。宸眷彌隆。寵章皆極。斗筭之量。實覺滂盈。丹赤之誠。輒茲披露。臣伏念祖宗以來。親提義旅。尊戴中京。略有兩浙之土田。討平四方之僭逆。此際蓋隔朝天之路。莫譜請吏之心。然而稟號令于闕廷。保封疆于邊徼。世家承襲。已及百年。今者幸遇皇帝陛下。嗣守

丕基。削平諸夏。凡在輻員之內。悉歸輿地之圖。獨臣一邦。僻介江表。職貢雖陳於外府。版籍未歸于有司。尙令吳越之民。猶隔陶唐之化。太陽委照。不及葑家。春雷發聲。尙爲舉俗。則臣實使之然也。罪莫大焉。不勝戰栗。願以所部十三州獻于陛下。頒綸有司。收其土地。閭里名數。別具條析以聞。伏望陛下念奔世之忠勤。察乃心之傾向。特降明詔。允茲至誠。謹奏。

### 黃妃塔碑記

敬天修德。人所當行。矧俶忝嗣不圖。承平茲久。雖未致全盛。可不上體祖宗。師仰翟曇氏慈忍力所沾漑耶。凡於萬幾之下。口不輟誦釋氏之書。手不停披釋氏之典者。差有深旨焉。諸宮監尊禮佛螺髻髮。猶佛生存。不敢私祕宮禁中。恭率瑤貝。創窰塔於西湖之澚。以奉安之。規模宏麗。極所未見。極所未聞。宮監宏願之始。以千尺十三層爲率。爰以事力未充。姑從七級。梯旻初志。未滿爲歎。計甃灰土木油鏗瓦石。與夫工藝像設金碧之嚴。通緝錢六百萬。視會稽之應天塔。所謂許元度者。出沒人間凡三世。然後圓滿願心。宮監等合力於彈指頃。幻出瑤坊。信多寶如來分身應現。使之然耳。願元度有所不逮。塔之成日。又鑄華嚴諸經。圍繞八面。真成不思議。劫數大精進幢。於是合十指爪以贊歎之。塔曰黃妃云。吳越國王錢俶拜手。謹書於經之尾。

### 詩

還鄉歌（武肅王） 三節還鄉兮掛錦衣。碧天朗朗兮愛日輝。功臣道上兮列旌旗。父老遠來兮相追隨。

。家山鄉谷兮會時稀。今朝設宴兮餓兜飛。斗牛無李兮民無欺。吳越一王兮駟馬歸。

青史樓引賓從同登（武肅王）雲閣霞軒別構雄。下窺疆宇壯吳宮。洪濤日日來滄海。碧嶂聯聯倚

太穹。志仗四征平逆孽。力扶三帝有褒崇。如今分野無狼亭。青史樓標定亂功。

石鏡山（武肅王）卯歲遨遊在此山。曾驚一石立山前。未能顯瑞披榛莽。蓋爲平凶有歲年。昨返

錦門停駟馬。遂開靈岫種青蓮。三吳百粵與金地。永與軍民作福田。

築塘（武肅王）天分浙水應東溟。日夜波濤不暫停。千尺巨隄衝欲裂。萬人力禦勢須平。吳都地

窄兵師廣。羅剎名高海衆驚。爲報龍神并水府。錢塘且借作錢城。

九日同羣僚登高（武肅王）淡蕩晴暉雜素光。碧峯遙襯白雲長。好看塞雁歸南浦。宜聽砧聲搗夕

陽。滿野旌旗皆動色。千株橘柚盡含芳。錦袍分賜功臣後。因向龍山醉羽觴。

功臣堂（武肅王）今夕雖非豐沛酒。醪觥同醉洽吾鄉。兩邦父老趨旌府。百品肴羞宴桂堂。寶劍

已頌王禮盛。錦衣重帶御爐香。越王册後封吳主。大國宣恩達萬方。

上元夜次序平江南（武肅王）四朝雙母顯真封。古往今來事一同。志若不移山可改。何愁青史不

書功。

西園產芝（武肅王）五紀擎天立霸基。八方隣國盡相知。興吳定越崇王道。珍物平凶建國儀。忽

有靈根彰瑞應。皆由和氣感明祇。休言漢代芝房異。今日吾邦事更奇。

造寺保民（武肅王）百穀收成屈應鍾。南方景象喜重重。三秋甘澤烟塵息。四序和風氣色濃。播

種勤耕盈廩庾。兆民興讓洽溫恭。廣崇至道尊三教。蓋爲生靈奉聖容。

秋景（武肅王）三秋才到退炎光。二曜分暉照四方。解使金風催物象。能教素節運清涼。天垂甘

澤朝朝降。地秀佳苗處處香。率土吾民成富庶。虔誠稽顙荷穹蒼。

百花亭梅題二首（武肅王） 穠華閨裏萬株梅。含蕊經霜待雪催。莫訝玉顏無粉態。百花中最我先開。

吳山越岫種寒梅。玉律含芳待候催。爲應陽和呈雪貌。遊蜂難覺我先開。

和太師蘊讓韻（武肅王） 羅漢親崇建法臺。龍峯鳳嶺四山隈。遊人借問禪門路。遠道吳王爲佛開。

題羅隱壁（武肅王） 特到儒門謁老萊。老萊相見意徘徊。黃河信有澄清日。後代懋難繼此才。

送別十七哥（文穆王） 大伯東陽軫舊思。士民襦袴喜迴時。登臨若起鶴原念。八詠樓中寄小詩。

題得銅香爐（文穆王） 莫記年華隱水中。忽於此日覩靈蹤。三天瑞氣標金相。五色龍光儼聖容。

節屆初秋興典教。時當千載慶遭逢。仙冠羽服聲清曲。共引金臺入九重。

佳辰小讌寄越州七弟湖州八弟（忠獻王） 角黍佳辰社稷寧。靈和開燕樂羣英。樽前只少鶴原會。

百里江城隔二城。

謁寶塔回賜僧錄（忠獻王） 佛日輝光最有靈。真身寶塔鎮吳城。千尋獨拔乾坤聳。八面齊含日月明。

明。幾曲朱欄瞻海浪。長時金鐸振風聲。禱祈祇願蒼生泰。更仗高僧法供精。

登臥龍山偶成（忠遜王） 暮山重疊勢崔嵬。溢目清光入酒杯。幾處燒殘紅樹短。一航帆盡碧波來。

。民安未有移風術。微句慚非夢錦才。四望樓臺無限景。檻前贏得且徘徊。

禹廟（忠遜王） 千古功勳孰可倫。東來靈宇壓乾坤。塵埃共鑠梁猶在。星斗俱昏劍獨存。蟾殿夜

寒籠翠幌。麝爐春煖露瓊椽。會稽山水秋風裏。長放松聲入廟門。

登蓬萊閣懷武肅王（忠遜王） 黃鶴摧殘漫有名。建時方始殄羅平。飛梯疊拱重裝束。刻檻雕甍又

賞成。十載興隆吳與越。二邦安肅弟兼兄。從茲登覽雲樓上。願祝江南永宴清。

再遊聖母閣（忠懿王） 越地靈蹤多少處。伽藍難上此樓臺。有時風掣浪聲到。半夜月排山勢來。

極目烟嵐迷遠近。百般花木離塵埃。可憐光景吟無盡。知我登臨更幾迴。

宮中作（忠懿王） 廊廡重重翠幙遮。禁林惟此絕喧嘩。界開日影憐窗眼。穿破苔紋惡菊芽。曲檻

晚宜供露茗。小池寒欲結冰花。謝公未是深沉量。猶把戎機局上誇。

讀聖壽詩（忠懿王） 功格皇天僞國平。八方臣妾盡來庭。駿奔幸逐朝宗水。雀躍俄逢繞電星。就

日心雖怒紫闥。祝堯身尙處洪溟。壽山聳峙將何願。泰華千霄萬仞青。

感皇子遠降見迎（忠懿王） 千年遭遇覲真王。敢望青宮賜顯揚。祇合承華矚令德。豈宜中道拜元

良。深思轉覺乾坤大。力弱難勝雨露滂。蒼暮三思恩泰極。飽餐豐饌飽親光。

感降內夫人賜家室藥物金器（忠懿王） 魚軒相逐拜龍軒。聖主俄推望外恩。錫寵便蕃光石窰。內

嬪迢遞下金門。嵩衡壓地何曾重。雞犬昇仙未足論。巨悉已平難展報。祇將忠孝訓兒孫。

路次再感聖恩（忠懿王） 洪濤泛泛雨霏霏。芳草如茵柳裊絲。貼水碧禽飛一字。隔烟青嶂展雙眉

。南風入隙開襟久。西照臨窗捲箔遲。慚愧聖恩優渥異。不教炎暑冒長岐。

# 軼事

吳越錢武肅王三十二世孫文選恭輯

## 武肅王軼事

成大事者必此人。當唐乾符廣明間。盜賊充斥。寇掠兩浙無虛日。杭州練諸縣鄉兵討之。新城人杜稜時爲東安都將。更號武安營。與董昌。徐及。凌文舉。等稱杭州八都。推昌爲長。而以武肅王副之。武肅王功業日盛。僖宗拜爲杭州刺史。稜謂諸子曰。吾每責人不過十罰。則爲之傷心。觀錢公每有斬決。皆談笑自若。成大事者必此人也。遂傾心事之。

鐵幢 吳越王鏐用強弩射潮。箭止處立鐵幢以識。又云錢氏子孫言築塘時。高置鐵幢三。以爲水則。在今利津橋北者其一也。其地舊名鐵幢浦。幢制首圓如杵。徑七八寸。首出土三尺。餘趾皆陷土。故老曰初置幢時。塘猶未成。慮潮盪幢。用鐵輪護幢趾。以鐵緗貫幢幹。且維緗石鍵。然後實土築塘。故幢出土。宋淳祐間趙安撫作亭覆幢。今平爲民居。而鐵幢之首。嶄然出窪池可識。甚臨安志

崑墮錢江 武肅王建亭於虛白堂之基。曰八會堂。以平吳定越。講武計議。凡八會於此也。已而更名都會堂。寶正三年夏六月有嶼蔽日而飛。晝爲之暝。王親祀於都會堂。是夕大風。崑墮錢江而死。

吳越備史

不罪誑言 沈崧與羅隱從事幕下。一日武肅出妓。衆稱殊麗。便是姁娥。崧曰姁娥甚陋。安可及此。

武肅問曰。書記識姁娥否。對曰崧兩度到月宮。何爲不識。王笑應之。不罪其誑言云。羅江東外記

疊雪樓 成化杭州府志。武肅王於疊雪樓強弩數百以射潮。

今晏嬰也 曹師魯形短而多智。武肅王常稱曰。今晏嬰也。人因號爲曹晏嬰。竟居鎮而卒。

留貽後嗣 林鼎字煥文。侯官人。父無隱有詩名。流寓明州。刺史黃晟頗好禮士。無隱依之。鼎生於

明州之大隱村。及長謁武肅王。王以爲觀察押牙。尋辟文穆王幕府。文穆王以其才行。累爲不見用

。一日復密荐之。武肅王曰。鼎骨法非常。眞輔相器。然我不驟貴者。欲汝貴之。庶盡心於汝也。

文穆王襲位。署鎮海軍掌書記節度判官。

名籍之強記 馬綽。餘杭人也。爲人淳直。居恆以忠節自許。初與武肅王俱事董昌。昌嘗使王閣部伍

。亡其名籍。王歷唱之。存亡健悴。都無所失。綽密語王曰。老子素猜忌。駭公強記。當必相圖。

迺以白牋數番陽授王。若代軍籍者。王感其意深德之。因以從妹歸于綽。

不賣異物 鍾匡範。唐鎮南節度使傳第二十子也。鍾氏旣滅。匡範同母來歸。甚爲武肅王所禮。時匡

範獻王雲鶴通天離水犀帶一圍。及玉盃一事。玉盃當覆五雀雛于內。熾炭久然。比啓視。而雀雛已

飛去。是一異也。武肅王受盃。反帶。贈錢二萬緡。匡範因攜帶往碧波亭。命許彥方繫帶行水中。

水闊七尺。遂至瑞石山登岸。或云帶故唐明皇遺玩。遺在西川。川客獻於鍾傳。傳常寶之。

以上均  
十國春

秋

羅隱以詩受知 羅隱字昭諫。新城人也。本名橫。貌寢陋。凡十上不中第。遂更今名。少能詩。與族

人虬。鄴。齊稱。時人謂之三羅。已而羅遇異人。以相術勸隱曰。君志在一官。不過簿尉耳。若能

罷舉東歸霸國。富貴必矣。隱由是從事湖南歷淮潤諸鎮。復多齟齬不合。歸杭州謁武肅王。懼王不

納。乃以所爲夏口詩標卷首。中有一箇禪衡容不得。王覺詩大笑。加殊遇。賫以書曰。仲宣遠托劉荊州

。都緣亂世。夫子願爲魯司寇。只爲故鄉。隱曰是不可去矣。武肅王初授鎮海節度使。令沈崧草謝

表。盛言浙西繁富。成以示隱。隱曰今浙西兵火之餘。日不暇給。朝廷執政。方切於賄賂。此表入

奏。執政豈無意要求耶。迺請更其略曰。天寒而麋鹿常遊。日暮而牛羊不下。朝廷見之曰。必羅隱

辭也。及昭宗易名曄。隱爲賀表云。左則虞舜之全文。右則姬昌之半字。京師稱爲第一。梁既篡唐

。欲以虛爵廣強藩。進武肅王吳越兩國。且以諫議大夫召隱。隱不行。請舉兵討梁。曰王唐臣。義

當稱戈北嚮。縱無成功。猶可退保杭越。自爲東帝。奈何交臂事賊。爲終古羞乎。王始以隱不遇于

唐。有歎望心。及聞其言雖不能用。而心竊義之。王待隱日隆。時西湖日納魚數斤。號使宅魚。會

王召隱題蟠溪垂釣圖。隱詩借寓意。遮錮其徵。詩曰呂望當年展廟謨。直鉤釣國更何如。若教生在西湖上。也是須供使宅魚。又一日寢疾。

王親臨撫問。因題詩于壁。詩云。黃河僅有澄清日。後代應難繼此才。隱爲續末二句。暮紅紗子上。以誌恩焉。五代史本傳

排衙石 石在鳳凰山右嶺。石筍林立。最爲怪奇。舊傳錢武肅王鑿山。見怪石排立兩行。如從衙拱立

趨向。因名排衙石。雲林石譜。臨安府署之側。一山甚高。名拜郊臺。錢氏故蹟也。山之顛列石數

十。翠潤而堅。謂之排牙石。咸淳臨安志

可團可圓 武肅王有弟曰鏐。爲湖州刺史。嗜酒殺人。懼王之督已。出奔吳。有子二人。長者生五年

矣。次者未周晬。武肅王憐之。養於宮。與諸子同研席。名其長曰可團。次曰可圓。翼其父得歸聚

云。十國春秋

甯我有疾 李咸與葉簡同在武肅王幕府。徐許之變也。王召咸占之。咸曰。大王霸業方永。但分野小

災耳。請勿慮。不然大王常有疾。王曰甯我有疾。豈宜害百姓耶。後卒如咸言。天寶十六年梁册王爲吳越國王。先一日雨雪。王召咸卜以他日。咸曰大王雙受封册。惟天所相。雨雪必霽。固可卜社稷之延永矣。武肅王從之。卽夕果星斗明麗。詰朝遂成禮焉。同上

但得兩眼見物 目醫胡某者。不知所從來。自云累世療內外障眼。鍼法獨神。武肅王末年患目疾。召使治之。醫曰目易治耳。然大王非常人。殆天所以爲大王患者。若療之是違天也。恐無益於壽。王曰吾起身行伍。誇有方面。富貴極矣。但得兩眼見物。爲鬼不亦快乎。旣而應手豁然。王喜。賜物以萬計。醫悉不受。明年王果薨。同上

鸞手校尉 武肅王常使畫工數十人居涖江。號鸞手校尉。同北方流移者咸寫貌以聞。擇清俊福厚者用之。胡岳方渡江。畫工以貌奏王。親而嘆曰。面有銀光。真奇士也。同上

### 文穆王軼事

玉羊 有僧持玉羊獻武肅王曰。得此當生貴兒。文穆王果明歲丁未生焉。十國春秋

錦樓集 文穆王性好吟咏。有詩千篇。自編其尤者三百篇。名錦樓集。浙中人士傳之。舊五代史

擇能院 文穆王愛士好賢。一如武肅。置擇能院。厚其廩餼。使其國相沈崧爲之長。同上

與士卒同甘苦 王嘗北征。師次平望。蚊蚋尤甚。左右請施幃帳。王曰三軍皆在此。我獨何避。竟不許。十國春秋

謙讓有禮 武肅寢疾。一日出玉帶五分。賜王兄弟。命王先擇之。王乃取其狹小者。武肅大悅曰。吾

有汝暝目無恨矣。同上

闕袴大襪 文穆王事武肅王。孝敬小心。未嘗有懈。武肅王性既嚴急。每一召即時須至。乃置闕袴大襪以便之。同上

### 忠獻王軼事

夜聞戈甲聲 忠獻王救閻。禱於武肅廟。夜聞戈甲聲。凡數夕而止。後接戰。唐兵視我師遍郊野。入皆丈餘。蓋神助也。十國春秋

青史樓戲采 文穆王治世子府於城北。將俾居之。一日世子與宏佐戲采於青史樓。遽謂宏佐曰。君王

方爲我營府署。願與若博之。比四擲而宏佐得六赤。世子失色。宏佐從容曰。五哥入府。宏佐當將符印之命。因再拜。世子竟不懼。投骰盤於樓下而去。俄而世子不祿。同上

與官屬宴賞 忠獻幼好書。能爲五七言詩。凡遇雪月佳景。必與官屬同登碧波亭宴賞。唱和竟日。

情如家人。同上

龍瑞 忠獻時南船務石井有物。形如守宮。尾長七尺。蠶且角獲之。識者謂之龍。置於安溪潭。時

以爲瑞。同上

親軍救火 兵籍使錢承德家火。密邇內城。命親軍湊之。王登而望。有伺便攘竊者。亟命斬之。衆因

悉力。火遂滅。同上

大糾之令 開運中將益車徒。下令募軍民間子弟。逾時無至者。乃命大糾之。令曰糾而得之者糧皆蠲

半。翌日投書而集。遂加精訓。南方之捷。多其力也。同上  
復稅三年。民有獻嘉禾者。王問倉吏。蓄積幾何。對曰十年。王曰然則軍食足矣。可以寬吾民。命復其境內租稅三年。同上

### 忠遜王軼事

鑄錢不成。忠遜王即位。以黃金一錠。命近侍莫文昌鑄巨錢。文昌意其求識。且懼不就。乃宿謀於冶匠。別鑄一以爲備。翼日以所授金鑄之。王臨視果不就。因潛以宿鑄者獻。至是皆符其兆。十國春秋  
小字萬金。忠遜王名宏傑。字隆道。文穆王第三子。孝獻世子同母弟也。誕生之夕。文穆王夢人以黃金一錠獻者。因字之曰萬金。同上

眼小。忠遜王初生時。武肅王尙在。抱入府中。王方病目。摩其頂曰眼大小。左右曰眼小。王默然。樂賞園亭。廣順中徙王東府。忠懿王命東府以官物充王取給。西寢之後。卽臥龍山。爲王置園亭於上。栽植花木。周遍高下。遇良辰美景。王破道士服。擗伎樂。日暮登寶。每元夜張燈。徧於山谷。用油數千斤。七夕結綵樓於山巔。諸節時費用稱是。同上

夢二銀。王將即位。近侍陳禹夢以金鈔鑿承日輪加王之頂。而手持二銀。頃之墜地。既而以夢語人。人曰汝主將有非常之事。然其二銀。不過二句之事耳。同上

金魚水鼓。王當於山亭擊鼓。聲達於外。守衛者遽聞忠懿王。忠懿王曰。吾兄以適興爲懷。非鼓樂不歡。乃命裝金魚水鼓四面奉之。同上

# 忠懿王軼事

蒟蘆羹 陶穀來使。忠懿王宴之。命進蒟蘆羹。曰此先王時有此品味。庖人依樣造者。製在中朝。或

作詩嘲之曰。堪笑翰林陶學士。年年依樣畫蒟蘆。故王以此戲焉。十國春秋

酒令 又一日宴穀。王因舉酒令。曰白玉石。碧波亭上迎仙客。穀對曰口耳王。聖明天子客錢塘。同上

清門處士 是時海船獻沉香翁一具。高尺餘。剗鑿若鬼工。王號爲清門處士。同上

旂旄山 高麗船主王大世選沉水千斤。疊爲旂旄。山象衡岳七十二峯。王許以黃金五百兩。竟不售。同上

不忍加刑於舅 甯國節度使吳延福。順德太夫人弟也。建隆初延福兄弟五人有異圖。左右勸王誅之。

王曰先夫人同氣。安忍賞于法。言訖嗚咽流涕。但黜延福于外。而不加刑。同上

保全廢王 天福十二年統軍使胡進思既廢忠遜王。而迎忠懿王。領兩軍事。明年春遷忠遜王於衣錦軍

私第。進思日請圖害。譬說百端不止。忠懿王慮其有他變。遣親軍都頭薛溫親兵衛之。且誠曰是行

也。委爾保全廢王。若有非常處分。皆非吾意。當以死捍之。進思果潛謀於溫。溫拒而不許。復夜

使方安等二人踰垣入忠遜王第。溫率衆救之。斃安等於庭中。已而進思死。忠遜王獲考終。吳越備史

遐追嗣 崔仁冀。字子遷。錢塘人也。少篤學有文采。事忠懿王爲通儒院學士。王寵沈虎子政事。以

仁冀代之。宋太祖常諭忠懿王入朝。仁冀告王曰。主上天資英武。所向無敵。保族全名。上策也。

王然之。太平興國二年。王在汴京上疏。言願罷所封吳越國王及天下兵馬大元帥職名。宋太宗優詔

不許。仁翼復驚恐王曰。朝廷意可知。大王不速納士。禍且至。左右爭言不可。仁翼厲聲曰。今已在人掌握中。去國千里。惟有羽翼乃能飛去耳。王遂決策。奉境內十三州一軍。八十六縣。獻闕下。先是有侍郎鮑約者。頗驚。忠懿王納士。而同官胡毅劉鞬俱力言不可。及王歸宋。約竄處海上。王使人以詩追之。云東遐追兮河遐追。鮑約何如罷釣歸。迄今有遐追廟焉。十國春秋

保全盧多遜 太平興國末。趙普再入相。與盧多遜不相能。一日普召王世子惟濬。謂曰。朝廷知盧多遜。求取元帥財物。今未贖劾者。恐累元帥耳。請將所遺之物。列狀上聞。惟濬歸白王。王曰。我入朝時。荷主上殊常之遇。故左右大臣。咸有饋物。非獨盧相也。豈可見人將溺而加石焉。普聞之深自歎服。同上

勿令掌膳者知 忠懿王寬洪大度。常大會賓客食饜臠。而得庖人濡血紙於器中。王遽藏諸袖。願左右勿令掌膳者知。同上

綵繩繞宅 忠懿王將內附。決於天竺天士。夢天士以綵繩繞其宅。歸宋之意始定。後子孫遂金紫不絕。同上

中貴良藥 王歸宋後。一日內臣趙海過王。探懷中藥百粒以進王。方命茶盡餌之。海既去家人皆泣。蓋有所疑也。王笑曰。王上待我厚。中貴必良藥耳。宋帝聞之大驚。即杖海流之遠郡。同上

金鳳詞 王朝宋。一日召王內宴。出內妓彈琵琶。王獻詞曰。金鳳欲飛遭掣搦。情脈脈。宋帝遽拊王背曰。誓不殺錢王。同上

小心畏慎 王歸宋後。小心畏慎。每晨趨闕。必先至宮門。假寐以待。一日夜漏四鼓。清蹕啓行。時風雨大作。諸節鎮無一人至者。宋帝見王與世子惟濬。稱歎久之。謂王曰。卿中年宜避風冷。自今入見。不須太蚤。仍轅御前四大燭賜焉。同上

# 古蹟

廣德錢文選士青纂輯

築錢塘

武肅王欲於錢塘江築塘。苦爲怒潮所擊。遂於疊雪樓架三千弓弩射之。潮爲之斂去。便命下石籠樹巨木。其塘遂成。神史天寶三年八月吳越始築捍海石塘。廣杭州城。由是錢塘富庶。盛於東南。資治通鑑

開濬西湖

宋史河渠志。錢氏有國。始置撩湖兵士千人。專一開濬。杭州府志及西湖遊覽志又疏湧金池。以入運河。按夢梁錄云。湧金池在豐豫門。即湖金門內引西湖水入城爲池。吳越王元瓘命將曹杲成之。以便民汲。親書湧金池三大字。刻石識其旁。云清泰三年丙申之歲。建午之月。特開此池。咸淳志及西湖志

王嘗欲廣牙城。

以大公府。有術者告曰。王若改舊爲新。有國止及百年。如壞築西湖。以建府治。垂祚當十倍於此。王曰。百姓資湖水以生久矣。無湖是無民也。豈有千年而天下無真主者乎。有國百年天所命也。即於治所稍廣之。及忠懿王歸土。錢氏守吳越者凡九十八年。西湖志成化杭州府志。

寶石山龍王廟祀錢塘湖龍君。武肅王表請敕封廣潤龍王。建廟致祭。自撰碑文有云。常鎮吳邦。預消災沴。必使原田肥沃。克昌廣潤之名。穀稼豐登。更上土龍之德。其孜孜爲民之意。已溢於言辭間矣。西湖志

安國山

在臨安縣治東北。一名太廟山。爲縣治主山。錢武肅王建城於此。大清一統志縣治踞安國山右脈。山自天目中支逶迤七十里。至九仙。玲瓏。葛仙諸山。峻峭奇絕。下十餘里平地。隱隱隆隆。至

是起頂。有屹然獨尊之形。而功臣山特來朝對。信錢王肇基之地也。中脈爲武肅王墓。萬曆臨安縣志

八百山 在縣東北十里。有三峯甚高。中峯大將山。西峯紫籐山。東峯八百山。共周九里。咸淳臨安縣志按

八百之名。舊通志以爲彭祖居之者誤。據吳越備史武肅王屯兵八百里。以退黃巢。則知此山著名所自來。萬曆縣志吳越王破黃巢。常屯兵於此。得其實矣。杭州府志

衣錦山 在臨安城南里許。其東峯一圓石。光瑩如鏡。相傳錢王幼時臨照其形。首戴冠冕。既貴詔改

爲衣錦山。其石徑二尺七寸。名勝志 平糞字記 太

天目山 在縣西北五十里。即浮玉山。郭璞詩云。天目山垂兩乳長。龍飛鳳舞到錢塘。海門山起橫爲

案。五百年生異姓王。誠一方之巨鎮也。臨安縣志

功臣山 在臨安縣一里。本名大官山。晉天福五年敕改今名。蘇詩注 引圖經

山高九十丈。周七千五百三十步。舊錢氏所居也。

安國衣錦軍 唐光化三年改臨安縣安衆營爲衣錦營。天復三年陞爲衣錦城。天祐三年割睦州分水縣之

南新。甯善。新登。廣陵。銅峴五鄉來屬於臨安。四年三月陞衣錦城爲安國衣錦軍。十國太平興國

四年敕改衣錦軍爲順化軍。宋史臨安縣梁開平二年正月敕改爲安國縣。以尊武肅王。真明五年割新城

縣之鳳翥鄉隸安國縣。五代會要 輿地廣記臨安城武肅王築。城依大廟山。周五千五百六十步。池在東北。名

衣錦城。爲門四。東曰迎恩。西曰惠政。南曰望錦。北曰拱辰。萬曆臨安縣志安國衣錦軍舊治。宋以前建

在高陸鄉溪東夏城路西。舊碑尙存。浙江通志

吳越國城 唐昭宗景福二年七月蘇杭等州觀察使。開國侯錢鏐。發民夫二十萬。及十三都軍士。新築

羅城。自秦望山由夾城東亘江干。泊錢塘湖。霍山。范浦。周七十里。城門十。南曰龍山。在今六和塔西

東曰竹車。在今望仙橋東南曰南土。在今臨江橋門外曰北土。在市門外曰寶德。在今長山門外曰北關。在今夾城巷口西曰涵水

。西關。在今雷峯塔之下城中者曰朝天。在今吳山下今鎮海樓曰炭新。今庚橋東曰鹽橋。在今舊鹽橋西鏐自爲記。蓋其時城垣南北

展。而東西縮。吳越建國鳳凰山下。其子城南爲通越門。北爲雙門。後唐同光二年鏐開慈雲嶺。建

西關城宇。追俶納土後。雙門猶存。咸寧臨安志按此名羅城又名新城

吳越舊宮 宋行宮。卽武肅王舊宮。皇城九里。宋高宗南渡。卽基地爲行宮。是以後人但知有宋故都

。而不知有錢氏耳。

彭祖故里 在臨安縣東北十里。今有彭祖墓并廟存焉。正當八百山之中。其地號八百里。以祖居此。

壽八百。故皆以八百名。武肅王破黃巢。屯兵於此。八百山古名百江嶺。縣志

錢林宅 林。彭城人。漢諫議大夫。王莽專政。乃棄官隱於長城縣北十里吉祥鄉破門里梓山之東。遂

家焉。園林幽邃。花石佳致。層閣背山。高門臨水。密竹環池。疏桐映井。晉。宋。齊。梁間。子

孫多顯宦。爲邑著姓。長興縣志

文僖公別墅 內有白蓮。綠野等堂。四觀。披穎等軒。南漪。迎薰。澄心。涵碧。玉壺。雪甍甍等亭

。後舍以爲寺。名菩提院。今入昭慶寺。西湖遊覽志

烟霞洞 在錢塘縣舊治之西一十六里。晉開運元年有僧彌洪結菴洞口。遇神人指山後有勝蹟。何不顯

之。洪尋見一洞。內有石刻羅漢六尊。洪既卒。吳越錢王夢僧云。吾有兄弟一十八。今方有六。王可聚之。夢覺訪烟霞洞有六羅漢。遂別刻一十二尊。以符所夢。祥符臨安志

慧日永明寺 在南山慧日峯下。周顯德元年吳越王建。號慧日永明院。今名淨慈寺。淨慈寺志 杭州路淨慈

報國禪寺。在郡城之陰。面臨湖水。後周時錢氏國於吳越。忠懿王俶迎衢州慈化定慧禪師道潛至其府。受菩薩戒。建慧日永明寺以居之。今淨慈寺是也。潛常從忠懿王求塔下金銅十六羅漢像。忠懿

王適夢十六人者從潛行。異而與之。斯有羅漢之始也。智覺禪師延壽者。本餘杭人。宋建隆初忠懿

王迎居靈隱山。遂住永明。居十五年。作宗鏡錄一百卷。則寺所以有宗鏡臺也。摘錄咸集淨慈報恩寺記

靈隱寺 在武林山之陰北高峯下。創於延和元年竺僧慧理。山門始榜曰絕勝覺場。仙翁葛洪所書。正

殿曰覺皇殿。歷宋至隋。興廢莫考。唐大曆六年復興。屬會昌廢教。寺毀僧散。後稍稍興復。規制未宏。吳越錢王命僧延壽重爲開拓。殿字一新。建石幢二。正殿仍覺皇之舊殿。後爲千佛閣。最後

爲法堂。東建百尺彌勒閣。西有祇園。靈隱寺志

天竺看經院 在天竺山乳竇峯北。白雲峯南。後晉天福四年僧道翊結廬山中。夜有光。就地視得奇木

。命孔仁謙刻觀音像。會僧勸從洛陽持古佛舍利來。因納之頂間。妙相具足。錢忠懿王夢白衣人求治其居。王感悟。乃即其地創佛廬。咸淳臨安志 寺創於五代之間。時天下釋騷。惟兩浙晏然。蓋錢氏立

國之功。文穆之世。高僧道翊結菴是山。一夕見潤光明上燭。且往視之得奇木。遂刻爲觀音像奉之

。後感夢。忠懿王易菴爲寺云。摘錄商輅上天竺重建碑記

六和塔 吳越王命延壽費寧二僧創建。以鎮江潮。凡九級。高五十餘丈。湖山便覽

寶所塔 吳越王之臣吳延爽者。迎佛舍利。建塔於山頂。附以佛廬。西湖遊覽志湧幢小品云。杭州寶椒塔

。因錢俶入朝。作此塔保之。稱俶者。君前臣名也。今誤爲保叔。霏雪錄云。寶所塔俗誤爲保叔塔

。謂嫂造此塔。祈冥福以庇小郎。鄉曲附會如此。二說各異。西湖遊覽志。旣仍寶所之名。而復沿

永保之說。奚所折衷。竊意錢氏封石飯山爲寶石。其旁復有寶硯山寶雲山。皆因寶石而得名者。則

建塔自應以寶所名之。不待永保重修。始以寶叔稱也。故取霏雪錄以正之。西湖志纂

雷峯塔 在淨慈寺前。吳越王妃黃氏建以藏佛螺髻髮。亦名黃妃塔。忠懿王有黃妃塔記。湖山便覽南屏山

前回峯。以山勢迴抱得名。吳越王妃建塔其上。本名回峯塔。俗作雷峯。以回雷聲近致誤。而淳祐

咸淳舊志。造一雷姓者當之。可笑甚矣。宋有道士徐立之。築窠塔旁。世稱回峯先生。此明可驗者

。詩曰南屏有回峯。曲抱常寺門。王妃建黃塔。俗號黃皮墩。迤邐屏山西。石壁看垂露。坐對索端

碑。不覺日西去。西湖詩話

謹按此塔係宋時開寶八年歲乙亥。爲先忠懿王所造。歷宋。元。明。清。至今甲子。共計九百

五十年。忽於夏曆八月二十七日孔子誕辰午後一時半坍倒。西湖十景。今少其一。良用慨然。查

塔磚孔內藏有寶篋印經。開卷文曰天下兵馬大元帥吳越王錢俶造此經八萬四千卷。捨入西關磚塔

。永充供養。乙亥八月紀等語。塔雖圯而基址猶存。將來修復有時也。文選謹誌。

表忠觀 宋熙寧十年郡守趙抃。以故吳越國王錢氏墳廟荒廢請于朝。即龍山峻佛刹妙因院爲觀。使錢

氏之孫爲道士曰自然者居之。仍度其徒一人守掌墳墓之在錢塘者。籍其地之所入。以時修其祠宇。

詔許之。賜改院額爲表忠觀。詳具蘇軾撰碑。自紹興至咸淳。凡四修葺。元熾。明嘉靖時移建清波

門外。蘇碑真蹟。宋末昇置太學。後失所在。清朝乾隆五年杭教授余懋棟。剛得於泮池右。石原四片八面。今所得二片耳。妙音院一作妙因。今猶呼其地爲妙因山。湖山表忠觀碑蘇文忠公撰并書。便覽結法不能如羅池老筆。亦自婉潤可愛。銘辭是蘇詩之佳者。人蘇右表忠觀碑今存二片。又失其下截。每行止十一字。筆法方整俊偉。比之蔡君謨有過之無不及處。坡公最用意之作也。石在杭州府學。乾隆己未歲掘地得之。石跋尾 潘研堂金

蘇文忠公表忠觀碑。立于神宗元豐元年八月。原刻有趙清獻官階九十餘字。即宣和書譜所稱有張有篆額者是也。家瀾堂侍郎懋於嘉慶十一年提學山左。在益都得一本。後有紹興二十九年歲次己卯三月丙辰朔曾孫塔左朝散大夫權書。工部侍郎楊傑重刊字樣。始知明嘉靖間陳太守柯本。實從此本再摹者。泳以乾隆五十九年甲寅寓杭州。監修表忠觀。凡五閱月。既將陳太守摹本重樹於御書堂之右。而又請于兩浙都轉運使秦公震鈞。杭嘉湖道秦公瀛。督糧道張公映璣。暨錢塘知縣蔣公重耀。從郡庠名宦祠中。移舊刻二石。并樹於左。一時名士大夫。如翁閣學方綱。梁侍講同書諸公。各賦詩紀事。傳爲美談。忽忽十八年矣。今年春仲偶過魏塘。侍郎持以見示。細審之。的是郡庠所移之刻也。按田汝成西湖志。此碑本在龍山表忠觀舊址。宋末兵興觀廢。遂露立於荒烟蔓草中者數十年。又按元至正間。西僧楊璉真伽。正發宋諸陵。而又欲將高宗御書石經。與表忠觀碑。及一切舊碑毀棄。築白塔於錢塘。時有紹興路推官魯人申屠駟。力求得免。至明正德十二年巡按御史宋廷佐。始將此碑與石經同遷郡庠。石經既立大成殿兩廡。而此碑後復遺失。至乾隆四年己未諸賢余懋棟繇村爲府學教授。有同年友趙君石函者來視余。步齋傍隙地。見小阜微露石角發視之。得石二片。已失其下截。於時如傅玉筍。桑叟甫。厲葵謝。周穆門。丁龍泓諸公。俱有歌詩以紀其事。今從名宦祠所

移二石。即此本也。楊文襄一清記云。表忠觀諸碑十有四。徙於櫺星門北之兩偏。據此則兩石之外。尚有十餘碑。不知淪沒何所。可慨也已。其所刻皆楊傑者。即楊和王沂中子。代州崞縣人。

見宋史楊沂中傳。梅溪蘇考碑

乾隆五十九年八月。泳監修表忠觀既成。將明太守陳何重刻本。立置東廡。而宋時原刻尙在府學。心甚不安。其明年十二月遂請於當事。自郡庠移置此碑。僅兩石。表裏俱刻字。每字大四寸許。每石計高四尺七寸。橫二尺六寸。正面存者一百又七字。陰面存者一百十六字。其下半皆殘闕矣。遂謀之石工。上蓋碑頭。下用石座。左右中間。雜以三石柱。柱上刻立石時諸公題名。而又集文忠書帖。刻文忠送表忠觀錢道士歸杭詩一首。梁山舟先生作跋于後。北平翁覃溪先生又和文忠韻。賦詩見贈。爲一時佳話云。同上

烟雨樓 在秀水縣澱湖之濱。廣陵王錢元璩建。嘉禾百咏考

嘉興府東南有烟雨樓。五代時武肅王第六子元璩爲中吳軍節度使。築樓於澱湖之上。即此文名爲菴湖。應園爲菴湖東有烟雨樓。五代時中吳軍節度使廣陵王錢元璩築臺。爲登眺之所。建炎中廢。嘉

定間吏部尙書王希呂因舊址建樓。有司相繼拓治。爲一方之勝。嘉興府志

滄浪亭 蘇子美曰。滄浪亭在蘇州府學之南。積水彌數十畝。傍有小山。高下曲折。與水相帶。爲錢氏廣陵王書館。今改名姑蘇南園。名勝志祥符圖經。南園在于城西南。有安寧廳。思元堂。清風。綠波。迎仙三閣。清漣。涌泉。清暑。碧雲。流杯。沼波。蒼雲。白雲等八亭。又有榭亭二。就樹爲榭。柱及迎春百花等三亭。西池在園廳西。有龜首旋螺二亭。在池中心。形如旋螺。又有茅亭三。並茶酒庫。易衣

院。圖經續記。廣陵王帥吳中。治南園。鹽流爲沼。積土爲山。島嶼峯巒。出於巧思。錢氏去國。此園不毀。宋祥符中知州秦羲壽之。以會僚吏。館使客。朝貴皆爲賦詩。參知政事郡人丁謂爲序。時作景靈宮。購求珍石。郡人亦於此取貢京師。其間空樹歲久摧圯。呂濟叔嘗作熙熙堂。厥後守將亦加修飾。今所存之亭。僅有流杯。四照。百花。樂豐。慈雲諸亭。每春縱士女游覽。先是王禹偁常攜客醉飲賦詩云。天子優賢似有唐。鏡湖親賜賀知章。他年我若功成後。乞與南園作醉鄉。大觀末蔡京罷相。欲東還。詔以園賜之。京遂作詩云。八年帷幄竟何爲。更賜南園寵退歸。堪笑當年王學士。功名未有便吟詩。續志南園昔甚廣袤。異木奇石。多爲朱勳取進。獨一松盤根大不可移而止。今府學後一方之地。皆故址也。猶有清流崇阜。可以彷彿當時之勝。比蜀人高氏亦得一隅經營之。而流杯出焉。因作醉鄉亭以倣古。江蘇通志

吳越王鏐第六子錢元璩。字德輝。乾化二年刺蘇州。累授中吳建武軍節度使。蘇常潤三州團練使。贊正匡國功臣。大彭郡開國侯加檢校太師。同平章事。中書令。太傅彭城郡王。治蘇三十年。儉約鎮靜。郡政循理。天福二年弟元瓘篡位。元瓘覲之。燕於宮中。元瓘舉酒爲壽曰。先王之位。兄宜當之。元瓘俯伏曰。功德高茂。先王擇賢而立。因相顧感泣。兄弟乾無間言。七年詔封廣陵郡王。卒諡宣義。第二子文奉。字廉暉。以蔭爲中吳節度副使。幾三十年。及嗣元璩爲節度使。加檢校太尉。中書令。嘗於郡中創南園東墅。及諸別第。延接賓旅。雅有鑒裁。禮賢下士。

按廣陵王祠供奉中吳節度使錢元璩公。威顯公祠供奉節度使錢文奉公。二祠在薦福山北塲壽聖院。即其葬處也。

金谷園。吳越錢氏時廣陵王元璩所作。今朱氏樂園。即是其地。研北雜志

畢秋帆尙書爲陝西巡撫時。嘗買得朱伯原樂圃舊地。引泉疊石。種竹栽花。擬爲老年退息之所。余爲韓樂圃小志二卷贈之。尙書歿後。家產入官。無託足之地。一家眷屬。盡住園中。可慨也已。按樂圃五代時。爲吾家廣陵郡王金谷園遺址。伯原增築之。元時爲張適所居。明成化間又爲杜東原所有。申文定公致仕後。又購得之。有賜閒堂。鑑曲亭。招隱榭諸勝。履園叢話

吳越國軍駐地表（一軍十三州）

安國衣錦軍

|    |    |    |    |    |    |    |    |    |    |    |
|----|----|----|----|----|----|----|----|----|----|----|
| 杭州 | 錢塘 | 錢江 | 鹽官 | 餘杭 | 富春 | 桐廬 | 於潛 | 新登 | 橫山 | 武康 |
| 越州 | 會稽 | 山陰 | 諸暨 | 膽  | 餘姚 | 蕭山 | 上虞 | 新昌 |    |    |
| 湖州 | 烏程 | 德清 | 安吉 | 長興 |    |    |    |    |    |    |
| 溫州 | 永嘉 | 瑞安 | 平陽 | 樂清 |    |    |    |    |    |    |
| 台州 | 臨海 | 黃巖 | 台興 | 永安 | 寧海 |    |    |    |    |    |
| 明州 | 鄞  | 奉化 | 慈溪 | 象山 | 望海 | 翁山 |    |    |    |    |
| 處州 | 麗水 | 龍泉 | 遂昌 | 縉雲 | 青田 | 白龍 |    |    |    |    |
| 衢州 | 西安 | 江山 | 龍游 | 常山 |    |    |    |    |    |    |
| 婺州 | 金華 | 東陽 | 義烏 | 蘭溪 | 永康 | 武義 | 浦江 |    |    |    |
| 睦州 | 建德 | 壽昌 | 分安 | 分水 | 青溪 |    |    |    |    |    |
| 秀州 | 嘉興 | 海鹽 | 華亭 | 崇德 |    |    |    |    |    |    |
| 蘇州 | 吳  | 長洲 | 崑山 | 常熟 | 吳江 |    |    |    |    |    |
| 福州 | 閩  | 侯官 | 長樂 | 連江 | 長溪 | 福清 | 古田 | 永泰 | 閩清 | 永貞 |
|    |    |    |    |    |    |    |    |    |    | 寧德 |

## 藝苑

### 表忠觀碑記

元豐元年八月  
甲寅代趙抃作

蘇軾  
東坡

熙寧十年十月戊子資政殿大學士。有諫議大夫。知杭州府軍州事。臣抃言。故吳越國王錢氏墳廟。及其父祖妃夫人子孫之墳。在錢塘者二十有六。在臨安者十有一。皆蕪廢不治。父老過之。有流涕者。謹按故武肅王鏐始以鄉兵破走黃巢。名聞江淮。復以八都兵討劉漢宏。并越州。以奉董昌。而自居于杭。及昌以越叛。則諱昌而并越。盡有浙東西之地。傳其子文穆王元瓘。至其孫忠獻王宏佐。遂破李景兵取福州。而宏佐之弟忠懿王宏俶。又出兵攻景。以迎周世宗之師。其後卒以國入覲。三世四王。與五代相終始。天下大亂。豪傑蠱起。方是時以數州之地。盜名字者不可勝數。既覆其族。延及于無辜之民。罔有子遺。而吳越地方千里。帶甲十萬。鑄山煮海。象犀珠玉之富。甲于天下。然終不失臣節。貢獻相望於道。是以其民至于老死不識兵革。四時嬉遊歌鼓之聲相聞。至于今不廢。其有德于斯民甚厚。皇宋受命。四方僭亂。以次削平。西蜀江南負其險遠。兵至城下。力屈勢窮。然後束手。而河東劉氏。百戰守死。以抗王師。積骸爲城。瀕血爲池。竭天下之力。僅乃克之。獨吳越不待告命。而封府庫。籍郡縣。請吏于朝。視去其國如去傳舍。其有功於朝廷甚大。昔竇融以河西歸漢。光武詔右扶風。修理其祖父墳塋。祀以太牢。今錢氏功德殆過於融。而未及百年。墳廟不治。行道傷嗟。甚非所以勸獎忠臣。慰答民心之義也。臣願以龍山廣佛祠。曰妙因院者爲觀。使錢氏之孫爲道士曰自然者

唐之。凡墳廟之在錢塘者。以付自然。其在臨安者。以付其縣之淨土寺僧曰道微。歲各度其徒一人。使世掌之。籍其地之所入。以時修其祠宇。封植其草木。有不治者。縣令丞察之。甚者易其人。庶幾永終不墮。以稱朝廷待錢氏之意。臣朴昧死以聞。制曰可。其妙音院改賜名曰表忠觀。銘曰。天目之山。蒼水出焉。龍飛鳳舞。萃于臨安。篤生異人。絕類離羣。奮挺大呼。從者如雲。仰天誓江。月星晦蒙。強弩射潮。江海爲東。殺妄誅昌。奄有吳越。金券玉冊。虎符龍節。大城其居。包絡山川。左江右湖。控引島嶼。歲時歸休。以燕父老。曄如神人。玉帶趨馬。四十一年。寅畏小心。厥籛相望。大貝南金。五朝昏亂。罔堪託國。三王相承。以待有德。既獲所歸。勿謀勿咨。先王之志。我維行之。天祐忠孝。世有爵邑。允文允武。子孫千億。帝謂守臣。治其祠墳。毋俾樵牧。愧其後昆。龍山之陽。歸焉新宮。非私於錢。惟以勸忠。非孝無君。非孝無親。凡百有位。視此刻文。

### 文天祥論五代史書武肅王事

余讀歐陽子五代史。曰得吳越封落星石制書。稱寶正六年。則長興二年卽吳越改元僭禮。又曰尙不失君臣之義。夫既改元僭禮。奚以不失君臣之誼。既不失君臣之誼。又何致有僭禮之事。是其一言之間。已自相背謬。豈不大可疑乎。核史內或以改元保正。或云改元寶正。余公綽以爲同光元年吳越改元寶正。倪樸立則曰寶貞。一迄不能確指其年號。而司馬溫公通鑑。于是年特書曰。吳越不改元。參觀互證。改元乎。抑不改元乎。稽後唐甲申同光二年冬。錢鏐獲傳國璽。不敢私匿。貢之莊宗。錫以金印玉冊。夫既帝制自爲矣。又得玉璽。正可假符瑞以自大。貢之云何。又按歐陽子撰金堂縣君墓誌銘。序曰。錢氏自五代以來。知尊中國。效臣順。世稱其忠。子孫蕃昌。至今不衰。又有美堂記。亦曰

獨錢塘自五代時。知尊中國。效臣順。凡此皆一人之言也。何於史則如此。而於文又如彼。以此參考。將焉徵信。常考吳越備史。載武肅致董昌書曰。與其閉門作天子。不如開門爲節度。又謝賜鐵券表云。雖君親屬念。皆云必恕必容。而臣子爲心。豈敢傷慈傷愛。謹當日兢一日。戒子戒孫。不敢因此而累恩。不敢乘此而賈禍。聖主萬歲。愚臣一心。又臨薨囑戒子孫曰。善事中國。勿以易姓而廢事大之禮。當昭宗蒙塵。垂泣奔問。祭先必哭。負母登樓。教子以讓。立嗣以賢。約內外不蓄聲妓。斷罪人立出寵姬。雖在亂離之際。不失君臣之義。父子昆弟夫婦朋友。彬彬和雅。貢獻不絕於道。四十餘年如一日。諸國勸進。則曰踞吾熾炭之上。吾不爲也。然此書乃其曾孫昱所志。或者闡揚先烈。爲尊親諱。亦未可知。至如李志碑記云。錢某言必近禮。動必請命。尊主庇民。天興其姓。蘇子瞻云。錢某四十一年寅畏小心。厥篚相望。大貝南金。趙清獻云。民到於今。不忘錢氏功德。之數人者。其與武肅猶秦視越之肥瘠也。何尊何親。略改元而不言曷故。顧猶可謂學士大夫。本詩人忠厚之意。不欲明斥其非。紫陽綱目上繼麟經者也。明宗己丑天成四年秋。安重誨弟兄用事。以索賄故。矯詔削錢某官爵。夫欲加之罪。何患無辭。設其改元僭禮。方將明降之罰。寔用矯制削其職。朱子註云。不書故削。無罪也。允若是。當時無改元之事審矣。今於百餘年之後。忽以吳越封書遠蒙其妄自尊大之譏。綱目信歟。吳越封書信歟。必有能辨之者。特以五代史所載。多有闕疑。不得不稽古證今而爲之論。以表亮節。以正人心云。

## 武肅王傳

劉基

天下之最難泯者忠孝。古今之不可沒者功德。如故吳越國王錢鏐。自唐室衰微。五朝僭亂。王以布衣

崛起。用奇兵以討黃巢。名揚江漢。次滅劉漢宏。復除董昌。由是亂臣賊子聞王名姓。莫不心膽俱裂。不數年間除僞定亂。地方千里。恩威並著。社稷因以鞏固。黎庶賴以安全。奉母甘旨。必親自以進。當干戈紛擾之際。豪傑蜂聚。以數州之地。盜名器者不可勝數。既覆其族。延及無辜。靡有子遺。而吳越國王珠玉之富。兵甲之盛。謀入戰士。咸集於庭。猶復貢獻相接。不失臣節者。四十餘年如一日。是其忠孝出於至誠。至於六和塔之南。蛟龍自井而出。攻損江岸。王鑄鐵井欄。刻八卦於其上。降孽龍於井中。杭城與福里屢遭水厄。王造樓於是地。名拱北樓。每逢朔望朝北而祝曰。惟願唐室興隆。且以鎮黑魚之患。嗣後即無水厄。江干之塘。每被潮水晝夜衝激。地被侵削。日甚一日。王製詩以祝龍神水府。不聽。遂造箭以射潮。塘始築成。晴雨不調。虔誠步禱。蝗入嘉禾。百計驅逐。歲遇歉收。則請減賦振卹。民有疾疫。即請神以去瘟。是其功德實由至性。趙清獻公云是其有功德於斯民甚厚。非私於錢。實天下之公言也。亦勸獎忠孝。宣揚功德之義也。余亦曰錢武肅王之忠孝功德不可泯沒也固宜。至其文章。凡忠君愛民之心。流露於紙墨間。豈可不傳。故寫傳以誌不朽之意云爾。

### 重修表忠觀碑記

阮元 芸臺

錢塘表忠觀。宋熙寧十年趙清獻公請於朝。建以祀吳越錢武肅王鏐。始在龍山西南妙因山下。其旁有武肅之子與孫文穆忠獻兩王墓。使錢氏之孫爲道士曰自然者居此。俾脩護之。至理宗時。官給田三百畝。以旌舊功。元初遇兵燹。觀基俱毀。明正德間。遂爲江尚書兆城。嘉靖三十九年總督都御史胡宗憲。乃遷建於湧金門外靈芝庵寺故址。爲吳越時西園。即今重修之地也。當時有武肅十九世孫錢德洪。自餘姚來守此觀。飭俎豆。輯譜牒。湖山靈爽。神實憑依。春秋脥蠶。爲最盛焉。自是以來。屢脩。

屢廢。國朝康熙四十四年。聖祖皇帝南巡賜額。雍正四年世宗皇帝敕加封武肅王爲誠應王。今皇帝六次南巡。屢蒙駐蹕。凡五賜宸翰。褒功述事。並命有司以時致祭。蓋自武肅至其孫忠懿王宋初納土以來。未有食報增榮如今日者也。乾隆五十九年春。武肅三十世孫錢泳等以棟宇摧墮。呈請有司修治。於是巡撫吉公慶。布政司張公明緒。鹽運使阿公林保。各出俸錢。令杭州府李君亨特董其成。增建碑亭。左右六間。畫廊三十六間。正殿基培高三尺。易壁垣以磚石。重甬五王像。計費白金三千四百兩有奇。又增給歲修銀六百兩。置鹽運司庫。發商榷子母。爲歲修費。始工於五月十六日。告成於八月二十四日。其明年冬元奉命督學浙江。下車瞻拜。樂觀厥成。爰以重修落成命十一府士子賦詩紀事。凡得詩千有餘篇。極一時之盛。擇其佳者。付泳錄之。泳從金匱來錢塘。鳩工樹石。實始終其事。述此大略。屬元爲記。且自以隸古書丹刊石者也。內閣學士兼禮部侍郎。文淵閣直閣事。提督浙江全省學政。儀徵阮元記。嘉慶元年爲病之月。兩浙江南都轉鹽運使司鹽運使金匱秦震鈞。浙江糧儲道海豐張映璣同立石。

### 重修西湖錢王祠碑記

錢王功德。炳耀史乘。嘔吟崇報。至今不衰。西湖王祠自清以來。列入祀典。民國第一癸亥春。鏞調知杭縣。主祭祀。覲祠宇隳廢。詢悉風災兵燹諸狀。蠶然不安者久之。時王裔廣德士青孝廉文選長暨務稽核所駐杭。與祭到祠。迺相與謀重修。計資五六萬金之鉅。或以爲難。鏞謂王祠爲浙省公祠。凡浙中吏民與王裔。同負興舉之責。衆擎之力。舉鼎易耳。其時國有政爭。頻年構兵。國鮮甯宇。浙人士思慕錢王百年間人民安居樂業。老死不見兵革。欲以追崇錢王者。諷喻當道。於是高紳雲麟吳紳士

鑑領銜。公函前浙督盧上將永祥。省長張上將載陽。承允撥帑爲之倡。設祠工籌備處。幕僚紳商爲發起人。任勸捐。推幹事。任工事。文選復徧函同族協助。諏吉癸亥冬月興工。十四閱月訖甲子之臘工竣。用銀幣五萬五千餘元。越歲乙丑。而祠內設備完成。丙寅春祭。濟濟翼翼。峨峨如也。按舊志載表忠觀在湧金門外。今城拆矣。實卽杭縣一圖。地志稱其地與蕩。均曰旌功。朝旨賜地。豁免錢糧。蓋優典也。然歲久界湮。侵佔迷失。難可清釐。計不如承糧便。至是由祠裔呈縣覆丈。立錢王祠戶入冊。計地三十六畝七分二釐五毫。蕩一十九畝一釐二毫九絲。填給第二二八六號戶摺。文選復繪圖記弓丈四至於錢氏家乘。資印證焉。舊祠堂三椽殊陋。今爲正殿五楹。垂拱四阿。唐宋殿廷。存古制也。後殿五楹如之。殿內廣袤各倍尋仞。殿之前階級碎臺。制求相稱。凡木材磚石雕鏤丹雘之屬。務求精良。湖地質輟善陷。今以三合煉土填築。深及尋丈。用固基址。蓋一殿占工費之半焉。舊祠塑像無可依據。今武肅王像。乃後唐凌烟閣本。長興間供奉張昉使吳越所寫。宋天聖間奉賜王孫文僖公惟演。藏貽至今。得其原本。選工摹塑。四王像則摹自陳縣祠藏真蹟。皮碑蘇記。所謂龍章鳳目。曄如神人者。庶幾近之。舊祠門枋甚隘。今高大之。務稱全祠。外增護牆當馬之屬。濱湖建坊。下爲甬道。道之左右改濬二池。植荷樹柳。點綴風景。祠之北。原有思井軒。軒有樓。今葺新之。而移固有之彭祖樓於此。以存舊制。池旁舊有廢圃。今拓廣之。構造園林。附屬於祠。名曰西園。園中新建之堂。名曰閱禮堂。其樓名曰望湖樓。凡此名蹟。悉從圖經郡志。檢索標題。俾來遊者。藉省王家故實焉。杭州爲東南一大都會。又有西湖名勝。歲時中外賓客如雲。每遇公宴。苦無禮堂。今設西園。地則湖山勝概。人則吳越偉人。冠裳楹俎。觀國之光。於斯爲盛。此又今茲發起祠工要義之一也。官府提倡最先者。盧張兩上將。官紳出力者范毓靈。張壽鏞。祝紹箕。王錫榮。金百順。潘炳南等。祠裔出力

者。紹楨。能訓。宗翰。世昌。方魯。壽彭。皋。而文選爲之最。文選又捐修臨安祠墓。並輯刊錢氏家乘若干卷。功與其族明之德洪清之泳等也。鏞以守土吏。先後奔走。三年以來。始終其事。能知祠工始末。故攝敘記於碑。中華民國十有五年歲次丙寅秋九月令日浙江吳興縣知事調署杭縣知事古會稽陶鏞謹撰頭品頂戴前日講起居注官南書房行走翰林院侍讀提督江西學政錢塘吳士鑑書丹

### 西湖錢王祠落成序

古來焜煌棟宇。俎豆享祀者凡三。其建自樞廷者。如漢丞相之祠。于少保之廟。所謂報功崇德是也。其建自民間者。如夔公立社之女。朱邑桐鄉之祭。所謂巷誦戶誦是也。其建自裔胄者。如顏魯公家廟之碑。范文正義莊之制。所謂尊祖敬宗是也。有一於此。卽可以昭垂奕禩矣。而泉唐錢王祠。殆三者兼之者歟。五代椒擾。錢王掃平僭僞。奠安吳越。捍海築塘。以除水患。教耕勸織。而興農桑。禮賢下士。肇啓中國之文明。運道互市。用便遐邇之商業。凡所措施。非僅裕一時之富教。實遠造萬世之樂利。厚德豐功。震古鏗今。故自宋淳祐九年詔建表忠觀後。歷代興修。或發自官府者。或創自地方者。或陳自裔胄者。幾無代無之。錢王三十二代裔孫士青都轉與余素敦交誼。夙見其搜羅事蹟。編纂家乘。數典毋忘。孳孳不倦。又復會同地方官紳重建西湖王祠。歷年積月。鳩工庀材。正告椒落。倏遭時變。因暫緩舉行典禮。於今歲二十九年。先行徵文。以留紀念。憶余於二年管領閩疆。所治盡爲吳越舊地。嗣改主皖政。皖南固亦王所舊隸。媿治績之未彰。仰前徽之不遠。特書梗概。昭示來茲。旣以表邦人士崇拜信仰之深。且兼以明世德不墜。後嗣之純孝精誠。足垂久遠云爾。中華民國二十九年五月上浣至德許世英謹序

## 西湖錢王祠落成紀念

齊耀珊 照錄

中華民國二十九年庚辰孟夏。錢士青都轉寄函。爲錢武肅王徵文。余前奉使曾屢至祠瞻禮。迄今想像猶如在西湖風月間也。嘗考吾國歷史。當中原擾攘之時。其疆吏能完固一方。保境安民者。推漢之竇融。晉之張軌。惟竇融自歸漢後。雖累代公侯將相。而由漢以降。闕焉無聞。張軌傳實及駿。雖均恭慎守法。至駿子重華。卽已自立爲涼王。傳世不永。後無稱焉。從未有如錢武肅王。積厚流光。胄裔昌盛。歷宋元明清以迄今茲。而方興未艾者也。揣其因果。厥有二端。竇融張軌。所施政略。保守而已。竇融除撫結雄傑。懷輯羗虜。得其歡心外。河西張掖。沃土萬里。未聞有所開闢。張軌除破走劉彌。通貢晉室外。尤屬一無措置。民智閉塞如故。若錢武肅王。則識見高遠。規模闊遠。如除水患。興水利。勤耕織。廣農桑。凡所設施。非僅造一時之福。而好賢禮士。振起人文。至今學風蔚然。俊秀輩出。胥武肅王有以貽之。懋德豐功。迥非竇融張軌所能比擬。尤有進者。竇融之世。光武中興。寰宇統一。張軌之世。元帝繼統。國基奠定。其稽首歸命。奉事上國時也。亦勢也。武肅王之世。唐社傾圮。羣雄割據。其在中原僭號者。自梁逮周。要皆憑藉武力。草創一時。武肅王如有囊括四海之意。乘時奮起。剪除羣僭。逐鹿遷鼎。未嘗不可帝制自爲。迺始終以仁愛爲懷。惟恐軍事一興。生靈塗炭。爲民屈節。通問貢獻。虛與委蛇。比之文王事殷。仁宅心仁厚。觀其不填西湖。靜待賢君聖主復出。不探羅隱北討朱溫之策。真識時務之俊傑也。綜此二端。宜乎世澤綿長。蟬嫣華胄。至其習勞崇儉。勤政愛民。家範謹嚴。軍律整肅。良規懿德。爲後世典型。是以自辭國以來。歷三十二代

。繼續承承。簪纓勿替。今士青都轉復修王祠。編輯家乘。搜羅圖像。彙器典冊翰墨。以興起中外之觀感。採集史乘文獻私人著述。以表彰不朽之功德。近復商得保管西湖錢王祠委員會同意。徵文闡揚駿烈。其所以崇先德而申孝思者。洵不可及。信乎非有武肅王之深仁厚澤。不足以蔭庇後嗣於無窮。非有士青都轉之敬宗尊祖。揆張潤色。抉顯幽微。不足使武肅王之聲光昭示於天下後世。千秋輝映。佳話流傳。他日蒼葛幅琳瑯。鋪陳祠宇。湖山生色。士女謳思。非惟錢氏家族之光。抑亦南州民庶之望也。爰綴蕪詞。以誌景仰。

### 重修吳越國文穆錢王神道碑記

自來創業難。守成尤難。非有英武之偉略。不能締造邦基。非有寬厚之良模。無以綿長國祚。周美成康。漢稱文景。由來遠矣。吾祖武肅王。不階寸土。削平叛亂。奄有吳越十四州之地。肇開宏業。使其後嗣。不克負荷。亦安能保世滋大。享國至百年之久。至納土後。猶簪纓勿替乎。武肅王則繼起有人。其首先繼述者爲文穆王。王幼時爲質於田頌軍。慷慨許國。已異常童。及脫自虎口。率旅專征。梟倍熾濤。屢立戰功。開拓土宇。監國時又能秉承庭訓。鎮撫人民。至置粉盤以記事。撤收帳以習勞。猶爲勤儉恭儉之小節焉。武肅崩殂。諸將擁戴。繼位二稔。四境豐穰。免絕田之遺賦。減歲入之稅收。由是民力紓而頌聲作矣。武備既修。文治聿啓。擇能選賢。敦重儒術。史冊稱之。使天假之年。其成就未可限量。惜乎享國不永。算僅中壽。然吳越之基礎。則自此奠定。宋和凝撰神道碑。備極推崇。有以哉。王歿後葬于龍山之南原。卽今江干玉皇山之麓。距龍山里許。頭城門之內。樹有神道碑

。高二丈。闊七尺。千餘年之古物也。星霜屢易。風雨剝蝕。碑文漫漶。首行有大晉故吳越國天下兵馬都元帥數字。尙清晰。餘不易辨認。設今不修。其不至傾頽而湮沒于荒烟蔓草者幾希。蘇子瞻表忠觀碑記。有故吳越國王錢氏墳廟。及後代之墳。在錢塘臨安者。多蕪穢不治。父老過之皆流涕等語。況其地當衝要。爲今鐵道路綫所經。往來行人如織。豐碑屹立。遠近矚目。設一旦傾覆。則行道之傷。又將何如。又況余等分屬裔孫。前既將錢塘之祠。隨安之墓。次第修復一新矣。此千餘年之碑碣。反任其頹廢不加意保存。恐異日見之。其太息流涕之情。將更甚焉。爰商諸厚齋。墨卿。正卿。百堅。雄波。石嶽。諸宗台。共謀修葺。以垂久遠。本拿祖敬宗之念。爲攬古探勝之資。實爲一舉而兩得。庶免於蘇子之譏乎。茲將其修治緣起。撮大略而爲之記。並繫以辭曰。父勲業。子善守。位十載。民康阜。樹豐碑。貽厥後。盤蛟螭。凌牛斗。千年來。風雨受。勢傾頽。難持久。重興修。比啣嶼。三老碑。差足偶。念我祖。積累厚。勒石記。垂不朽。丙子冬日武肅王三十二世孫文選謹撰

### 重建吳越國忠獻錢王墓碑記

漢劉子政論起昌陵疏有云。殷蕩無葬處。卽葬地不明之謂。夫漢距殷商年代未爲甚遠。而湯王又係賢主。乃因時異世殊。葬地已不可考。何況其他。從知古來聖君哲相之名墓。多憑記載傳述。是否真爲其棲神之窀穸。後人無從確指也。錢氏家乘載杭州龍山之西原。舊有忠獻王墓。年久湮沒。一度爲人盜葬。致遭雷擊之報。故老相傳。土人皆知。甲戌杭市辦理土地清丈。余與百堅。雄波。厚齋。墨卿。正卿。石嶽。諸宗台。以忠獻墓雖湮廢。基址猶存。當經交涉爭回。領有圖照承權管業。丙子重九秋祭。衆議建築一衣冠墓。以備嗣後在浙裔孫春秋祭掃。展追遠報本之思。夷考忠獻王諱弘佐。後唐

天成三年生。後晉天福六年卽位於仙居堂。時年僅十五。其生平大事。除關梁之禁制。減寺產之賦稅。抑強扶弱。則鄰將來歸。庫積倉盈。則民租普免。其於文穆王。亦猶周康王之比德成王。漢景帝之濟美文帝。一則勤慎息民。一則寬仁保境。宜乎世澤綿延。易姓後仍簪纓勿替也。歿後葬於龍山。迄今墓基猶可辨認。以視殷湯之葬地不明。猶爲過之。重建竣工。應勒碑以垂久遠。爰綴其顛末而爲之記。嗟嗟。謁葛亮之墓。松柏猶新。過柳下之壟。樵採母近。發異代之幽馨。留名區之勝蹟。後之覽者。亦將有感於斯文。民國廿五年歲次丙子冬日武肅王三十二世孫文選謹撰

### 武肅王未納羅隱討朱梁之諫

錢文選 士青

古語云。爲人謀則吉。爲己謀則凶。王霸由此分。禍福由此定也。先武肅王崛起布衣。提三尺劍。削平大亂。奠定吳越十四州。民至老死不識兵革。及宋太祖統一宇內。忠懿王納土歸朝。吳越始終不被兵禍。雲間沈麟稱武肅王驅殘暴。平反側。有湯武征誅之功。忠懿王納土地退稱藩。有唐虞揖讓之德。宜其俎豆千秋。血食百世。而不絕也。夷考黃昌與家王同起討賊。惟董不作開門節使。而竟作閉門天子。禍及其身。咎由自取也。梁立。朱溫雖非善者。要係漢族。家王以保境安民爲職志。稱臣納貢。理所宜爲。後世以家王不聽羅隱之諫。討朱梁爲失計。有三千強弩能射潮退。而不射朱三之語。不知一納羅諫。必動干戈。大舉北伐。時淮氛未靖。湖州初平。彼將乘虛滋擾。人民必遭塗炭。故家王不惜屈一身以爲民謀。不忍與師殺戮。遂受梁命。家王出山之初。本無子陽自大之念。篤守老聃知足之戒。一心爲民。不計其他。所以蜀王氏。漢婁氏。吳楊氏。閩王氏。或僭稱帝號。或據土爭雄。並以龍衣于冊書疏勸王自大。家王笑曰。爾等自處於燼火之中。而又欲踞余於上耶。况吳越處於海濱。

就地勢論。偏隅亦不能爭衡全國。倘不自量力。爲一己之尊榮。陷百姓於塗毒。家王豈忍爲之。王讖見過人。故不以羅隱之諫爲然。設照羅意。北伐不成。退守杭越。自稱東帝。與蜀漢吳蜀。同爲一耶之貉矣。當五季中原多故。紛紛自大。獨有家王誓守臣節。立于古人臣之大防。論者不察。而以不討朱梁爲未足。似不知當時情勢。與家王爲民之心也。自古以來。論家王者當以眉山蘇軾表忠觀碑記爲最合事實。一則曰吳越地方千里。帶甲十萬。富甲天下。終不失臣節。賁獻相望於道。再則曰。西蜀江南。負其險遠。兵至城下。力屈勢窮。然後束手。而河東劉氏。百戰死守。以抗王師。積骸爲城。疆血爲池。竭天下之力。僅乃克之。獨吳越不待告命。封府庫。籍郡縣。請吏於朝。視去其國如去傳舍。其有功於朝廷甚大云云。有功於朝廷。卽有德於人民。一而二。二而一者也。蘇氏東坡以家王不抗王師爲功。文文山又以爲尊主庇民。天輿其姓。著論以表揚之。紫陽綱目。上繼麟經。亦以家王並未改元僭禮。朱註甚明。吳越封書不足信也。而後世反以未討朱梁爲非。有識者自能辨之。五季羣雄紛爭。終歸趙宋統一。設武肅王不守臣節。或忠懿王不納土歸朝。何能血食千秋。功垂萬世。趙宋雖有天下。而匡山之變。求爲匹夫不可得。家王功德至于今民不能忘。又視趙宋爲何如也。作善降祥。不善降殃。千古不爽。如必曰討梁。是以吳越稱帝而後快耶。設若此。恐東坡無此雄文。以記王功德。傳諸後世。而文山亦不能稽古證今。以表王亮節。朱子更不能贊武肅王云獨能志獎王室。剪馘兇頑。以修職貢。來賓王廷。唐后以金冊誓書賜王世守。其功業榮遇。比之齊桓。不啻過之。此數人者。爲後世所信仰。其立言又皆如此耳。或云設吳越進窺中原。逐朱溫自立。使全國受吳越文化。皆成秦麻樂土。厚愛武肅王者。且以未能統一區宇爲憾。此又非余所敢知也。抑余尤有進者。中國數千年來。長江以南從無大一統之君。三國孫仲謀。南朝陳霸先。皆爲偏安之主。吾錢氏世居長興。自六朝以

遠。王侯牧守。代不乏人。方定公深知青烏之術。爰臨安土厚水清。包含正氣。始遷臨安。文甫公亦精天文地理。見臨安山勢龍蟠雄壯。知子孫必有鍾其運者。至武肅王封爲吳越國王。尊稱尚父。王臨終戒子孫。勿廢事大之禮。祖訓流傳。知統一字內必不可能。故早戒之。良以堯舜禹湯故墟。皆在黃河流域。漢高明太廟起。亦在長江以北。山川限人。未可強求。此又爲世人所不知也。然武肅王雖未統一字內。而築塘捍海。大興農桑。謀人民之福利。啓東南之文明。至今祠聲西湖。功垂不朽。其視漢高明太統一區宇。而今安在。又何如也。余謂爲人爲己。禍福攸分。或可信然歟。

詩

御製表忠觀詩（清高宗）三世五王爵。同堂秩有倫。聖湖依故里。白水識真人。孫子儀型永。春秋俎豆新。蘇碑餘腕力。亦敵弩千鈞。歷世戴京洛。承家保土疆。伐唐曾助旅。納越遂來王。試看尸遠社。不離梓與桑。千秋爲民意。博得號錢塘。

錢塘府亭（羅隱）新恩別啓館娃宮。還拜吳王向此中。九牧土田周制在。兩藩茅社漢儀同。春生舊苑芳洲雨。香入高臺小徑風。更有灑光人未見。問安調膳盡三公。

自淨土步至功臣寺（蘇軾）落日岸葛巾。晚風吹羽扇。松開野步纒。竹外飛橋轉。神功鑿橫嶺。巖石得巨片。直渡千人溝。下有微流注。岡巒蔚回合。金碧爛明綉。緬懷異姓王。負担此鄉縣。長逢勝下辱。屢乞桑間飯。誰謂山石頑。識此希世彥。凜然英氣逼。屹起猶鏖戰。他年萬騎歸。父老恣歡宴。錦繡被原野。金珠散貧賤。寶融卽入朝。吳芮空記面。榮華坐銷歇。閱世如郵傳。惟有長明燈。依然照深殿。

錢王箭頭歌（劉基） 鷗夷遺魄劫餘怒。欲取吳山入江去。雷霆劈地水羣飛。海門扶胥漫氛霧。英雄一怒天可回。肯使赤子隨蛟鮓。指揮五丁發神弩。鬼物辟易腥風開。三百年來人事改。濤落平沙箭空在。石梁飲羽未足誇。蜀國三犀漫欺給。近聞黃河水亂流。青徐一半悲魚頭。安得壯士斡地軸。爲拯斯民塗炭憂。

臨安懷古（袁枚） 字子才號簡齋錢塘人乾隆四年進士選庶常改江甯知縣 曾把江湖當敵攻。三千強弩水聲中。霸才越國追勾踐。

家法河西敬寶融。宰樹重重封錦繡。宮花緩緩送春風。誰知苦創東周局。留與平王避犬戎。

敬題西湖錢王祠（李鴻章少荃） 自古大聖賢。仁民而愛物。和風與甘雨。世界徧披拂。不恃甲兵多。不誇土地廣。欲躋世康阜。生聚並教養。兵燹關運會。人力不能阻。惟有順天命。寧靜以自處。剝

極勢乃昌。時至誕真主。暫保境宇安。聊救災黎苦。愚者不加察。謂爲氣宇小。戴蠶乘黃屋。方爲帝王表。豈曉受統難。徒以殘生靈。丕炎偶篡竊。詎足垂典型。偉哉吳越王。識時並達變。開門作

節度。東南民生奠。立志已堅定。殫力圖富強。女子勤蠶織。男兒事耕桑。築塘水患除。利源通五

湖。江浙永繁庶。千古仰宏模。建殿名握髮。虛衷擢賢才。禮士士好學。文化自此開。又復奉釋教。

。寺塔倍莊嚴。欲在苦海中。廣擡普渡船。始時討叛逆。即是本此念。宏昌受戮後。不再試雄劍。勤儉二者備。長夜戒酣飲。易帳省青繒。臥嘗設警枕。包山板築役。蓮鑿法陶侃。主德神感化。三

軍戒疏嬾。宜乎承恩寵。爵位迭膺封。鐵券金章錫。存殁極光榮。表忠觀赫奕。蘇軾擣雄文。三世

傳五王。咸以仁厚聞。納土歸趙宋。繫纆世不絕。修祠隆俎豆。永爲疆吏式。

敬題表忠觀（張之洞香濤） 造物降異人。自來有休應。少昊流虹感。商湯立鳥命。東漢光武誕。赤光

室中明。唐高育長安。紫氣光門庭。宋祖降於洛。闔戶神光覆。胞下如菡萏。異香三日馥。武肅亦

如是。紅光照彌淪。尤有奇特事。隣聞甲馬聲。比之古帝王。應有受祚福。武肅獨退讓。只遜兆民樂。唐時勤貢獻。罔敢越臣節。唐亡仍守分。通使恆無絕。朱溫擅篡竊。誼應申討伐。王知梁晉仇。太原兵必發。南北逾萬里。出師徒勞民。何若靜保境。坐看晉功成。果爾未幾時。汴洛歸莊宗。王眞識時者。不與人爭雄。外以掃叛逆。內以興農桑。父老不知兵。鼓腹樂徜徉。樂塘水患除。遂啓萬世利。富而後施教。南國人文萃。廣治不填湖。留以待眞主。忠懿體先志。宋興遂納土。因此積累厚。奕葉吉慶綿。當塗與典午。閩位殊足憐。握兵鎮雄藩。應奉爲典則。保境與安民。勝於成帝業。立觀稱表忠。肝膽昭雲霄。青青觀前柏。嚴冬永不凋。

文穆王(翁同龢叔平) 禦才繼武復經文。斬佞擒濤靖亂氛。帷帳不施安儉約。粉盤是記矢精勤。免租惠政黔黎感。興學賢聲遠近聞。忠孝傳家昭令德。成康媲美紹先芬。

忠獻王(孫家鼎 雙臣) 八閩卻敵凱歌回。靈輦相迎夾道來。雙穗禎祥豐歲兆。三軍騰飽笑顏開。民風敦厚倉箱實。士習剛良樸械裁。境外烽烟猶未淨。災黎避地上春臺。

西湖表忠觀(劉 塘石菴) 立基五代闔閩安。旌樹生花蔚大觀。留得康王宮殿地。莊嚴龍虎仰踞蟠。題錢王祠(林則徐少穆) 恢宏祠觀聖湖濱。俎豆馨香世世新。蘇軾題碑表忠立。名昭中外騰榮禋。

詠錢王功德(馮 煦夢華) 三湖水利淳然興。撈盡浮泥鏡比澄。從此田疇無旱患。公私兩便歲收增。題錢武肅王功德史(唐文治蔚芝) 強弩三千射海回。大王風表越江來。飛翽龍鳳從天目。包絡山川想

霸才。新史譏評淆黑白。傳家符券鬱風雷。羅平妖鳥今猶昔。何日花看陌上開。錢王祠徵詩敬賦(張一屨仲仁) 乾立崇祠氣象新。錢王賢裔有傳人。至今吳越蒙遺澤。掃盡樓槍大地

春。

武肅王祠徵詩(陳敬第叔通)樂塘捍海憐蛟龍。微禹猶聞載道歌。列郡聲威關右竇。霸朝稱號越王佗。

。錦衣城改名仍著。鐵券家傳却不磨。湖畔崇祠隆報饗。茫茫兵後問如何。

錢王祠(余紹宋越園)徑山王氣鬱葱蘢。曾到臨安拜故宮。祠廟千秋藏鐵券。江濤萬丈射潮弓。遺民

麥飯懷先德。斷碣蕪城識表忠。我是西湖舊流寓。蒼茫中露弔英雄。鞭撻王劉服董昌。驅除羣盜

拒徐楊。關河帶礪餘千里。鐘鼎冠裳歷四王。是處青山誰立馬。可憐彤日久亡羊。百年辛有伊川髮

。不黍官前落照黃。黃袍沐浴見真龍。朱轂來歸奉璧琮。十郡河山收版籍。五湖烟水盡朝宗。卻

看巴蜀風雲陣。何物劉張昌妾婦容。前有寶璣後錢俶。高風千載比筠松。三歲西湖戰血腥。清

波廟貌鬼燐青。越王臺畔薪猶在。丞相祠堂柏未零。靈武大唐存正朔。虞思有夏建明廷。龍游名縣

猶王澤。惆悵遺山野史亭。

王祖祠(錢載壽石)蕞爾朱三竟代唐。黃巢餘孽太猖狂。獬兒進襲邦基覆。那及先王世祚長。

武肅土祠(錢大昕竹汀)留得錢塘境宇寬。宋高南渡得偏安。漢家宮殿原無恙。檜樹迎風釀歲寒。

西湖表忠觀(錢梁湘舸)功勳聲晉位侯王。帝室姻聯萬代昌。手挽銀河天下定。聲名直比古成康。

恭和清高宗鐵券歌(錢陳羣集齋)皇帝初巡駐錢塘。下問鐵券臣家藏。奏臣僻守台州族。臣忝屬從不

可將。向爲台州族人世守上初次南巡臣屬從來浙未及先臣生丁五代季。乘鹿筮仕未造唐。討劉破巢繼誅

董。進呈今三次幸浙族孫選自台裔至遂恭呈御覽。時先後來守杭。臣軾又言射潮事。江海東注澤孔長。券

中所書僅一二。已足令人不能忘。風茲有位我聖主。五載虞典一省方。親舉玉趾覽廟貌。冕旒伏地

家五王。三世五王僞上第一次。褒臣先人曰忠順。賜額曰忠。最臣孫子以善良。賜額曰忠。風上第二次所賜詩。臣今老

矣守家祏。三陪祀事迎牲羶。以謙承之以謹守。大哉皇言日月光。

恭和清高宗鐵券歌(錢 澧南園) 千年臨安捍海塘。賜券亦與久留藏。異人間出爲民耳。心所能及力能將。古來豈有射潮法。竟爭水地還之唐。矧乃么磨董昌輩。亦敢盜弄爲悖狂。披兇靈侵膺上贗。五王三世傳餘杭。歷宋元明及聖代。片鐵完好澤何長。六飛南幸經進覽。賜詩賜匾誠勿忘。惟臣陳羣暨臣選。誇示榮遇於四方。詩家拜手竦唐和。要讀高宋兼劉王。天目之山碧之水。匪忠匪孝曷爲良。臣澧晚進自邊徼。寒宗其敢攀芬羶。庶歌蹈舞不自已。仰瞻雲漢昭回光。

敬題西湖 王祖祠(錢能訓 幹丞) 錢塘門外仰崇祠。翠柏蒼松挺勁姿。功德儼同三代盛。仁慈永繫萬民思。百年堪羨家規肅。五季應嗟國祚移。休問滄桑經幾度。還鄉有日拜靈旂。

祭潮神有感(錢振錕 名山) 獨自遨遊東海濱。萬家香火祭潮神。三千鐵弩消沈盡。誰識錢塘舊主人。恭紀 文穆王遺事一首(錢崇威 自啟) 翼翼 武肅祠。 文穆配西向。吾宗 文穆出。瞻拜心悽愴。憶昔展謁遠。鴛湖植秋漲。苦蚊夜蒙衣。曲身弓入韞。後讀會要編。較 王英年狀。恭承 武肅命。出師次平望。蚊蚋患尤甚。嗜膚起疹恙。左右惜 王軀。請爲施帷帳。三軍皆暴露。敢獨修供張。 王竟不之許。軍心益以壯。聞風百世下。誰甘懦夫謗。禍患苟當前。奮起與之抗。況今戰事殷。前綫正接仗。士卒甘苦同。夫豈古人讓。謹紀王仁言。用以告諸將。

敬題西湖 王祖祠(錢宗翰 墨卿) 一劍霜寒十四州。開門節使屬婆留。築塘捍海功侔禹。百世馨香拜冕旒。衣錦還鄉父老嬉。歌風直比漢高時。安民保境咸康樂。功德流傳蘇子碑。 王業流風安在哉。依然陌上看花開。錢塘留得名千古。日夜潮聲江上來。

敬題 先武肅王畫像(錢 謨厚 哉) 雄姿壯河嶽。生氣倚千秋。祇自驚神采。何須狀冕旒。鄂公疑動

髮。叔子正輕裘。鹿走懼睚刺。鷹揚建節旂。破巢八百里。帶甲十三州。隻手安吳越。先聲殄董劉。眞王符石鏡。遠使冊琉球。鐵弩江神避。金樽父老酬。扶扶赤子淚。灌灌老夫謀。論敵無全虜。還鄉歷舊遊。汾陽薄天子。張軌老諸侯。此意佳兵懼。奇謀奪枕收。中原避旗鼓。餘事擅風流。陌上花開緩。尊前竹畫猷。河清惜才士。夜飲戒兒儔。所好惟名馬。占星淨斗牛。百年有國限。八會尙亭留。節擁今何世。民勞此少休。湖光新廟貌。現重修王氣黯旄頭。祖德慚難繼。披圖效越謳。

恭題 王祖祠落成紀念(錢文選 士青) 巍巍 王祖蔭屨長。歷千餘歲裔膏昌。王祖功德難縷計。爲

民造福追炎黃。自古治國民爲貴。保障東南心力瘁。大廈將傾一柱擎。黎庶憂戴寇盜畏。誅宏滅昌逐黃巢。衆至如歸不待招。捍海築塘弭水患。張弩射退浙江潮。由是農桑利大闢。男婦分工勤耕織。中原遍地彌烽烟。吳越一隅安衽席。自此國產廣發揚。名茶行銷達重洋。倘使改進精焙製。定見勝算握商場。燦爛錦繡衣被資。抵制外貨塞漏卮。亦自 王祖啓幕輅。民受其賜到今茲。富而後教秉聖訓。江浙因之開文運。清代狀頭兩省多。登科記職士振奮。科目廢後興學校。英才蔚起菁莪耀。胥賴 王祖吐握勤。後世庠序得深造。又崇釋教建琳宮。寶塔藏經願力宏。湖山瀾漫慈祥氣。百年無事罷兵戎。四王相承守其業。民物阜康培國力。趙宋受命納版圖。志促寰區成統一。王祖初舉義旂時。本無僭竊帝號思。不壞西湖待眞主。爲國守土萬民舒。斗米十錢閭閻裕。倉廩充實獨進賦。試與後世相比擬。甯不令人生震怖。裔孫仰叨祖德庇。壯歲曾抱澄清志。中外歎歷苦無成。閉戶著書勤搜記。家乘一編備闡揚。敬宗蔚爲國族光。興修祠宇置祭產。千秋俎豆永馨香。保管大會徵文詞。揆張偉績後賢師。倘使疆史咸取法。海宇清晏會有期。昔官錢塘屢建議。今處瀕濱懷前事。附綴俚句作嚆引。相期祖德長不墜。

# 聯額

西湖錢王祠聯

(劫後祠聯多有損失。今將所存者錄之。以資查考。)

清乾隆

勳勒金書。納土當年資保障。業基石鏡。築塘奕葉慶安瀾。

又

劉墉

啓匣尙存歸國詔。解駁時拂射潮弓。

又

金安清

十四州一劍霜寒。閉門天子。開門節使。三五夜羣斐玉豔。陌上花開。江上潮來。

又

蔣益澧

公獨掃羣雄。問當年討董誅黃。半壁河山誰整頓。我來新廟貌。際此日丹楹刻楮。千秋棟宇復觀瞻。

又

楊淑樸

捍海築金堤。鯨浪長恬。累世共欽明德遠。射潮驅鐵弩。烏號宛在。餘風猶想大王雄。

又

聶緝槻

霸業常昭。天目鍾靈表忠礪。海波不起。雄風猶憶射潮弓。

又

盧永祥

有與王定霸之才。追溯生平。開門節度。獨能繕牧圉。修塘塲。大利說農桑。綜十四州齊萌至今受賜。抱保境安民之志。流傳佳話。衣錦故鄉。允宜崇廟堂。明龔祀。威靈彌海宇。誦千餘年往史私淑在茲。

又

張壽鏞

十四州安堵無驚。帶礪垂盟。半壁河山資保障。三千弩雄風猶在。金湯永固。一堂俎豆報馨香。

又

蔡樸

天地幾滄桑。歎龍拏虎攫。四境驛騷。幸此邦民氣太和。依然陌上花開。江中潮靜。湖山新殿宇。仰玉帶金丸。千秋威肅。願今後神保是格。再見倉多積粟。野獻嘉禾。

又

郭子江

十四州七邑無驚。保境安民。麟閣褒揚銘鐵券。九百載威靈宛在。陳裳薦食。螭碑鼎峙鎮錢塘。

又

陶鏞 在東

三世五王。十四州。九八年。武肅肇基。何以頌之聖賢豪傑。唐祠宋觀。元明祀。有清廟。共和阡。用能保我子孫黎民。

又

錢錫壽

烏乎天將間氣特鍾歟。當夫蠻觸蝸爭。伏處臨安。出而掃羣雄草莽。於季唐朝封越國。於朱梁朝兼封吳國。金印玉册。傳賈三祚爲獨隆。厥後英莫康榮開五公。八叶以還皆顯爵。想其際帝憑泥馬。主扈參輿。鞏東都。隨南渡。繩繩繼繼。迄祿闕閱千百年。故昭代仁廟純廟累褒題。誠慝不彰。岳墓于墳陪俎豆。幸也我亦慶系入譜矣。溯自龍飛鳳舞。發祥廣義。屹然撐半壁河山。至忠懿王徙汴州。至會稽王還徙台州。木本水源。分派四方者甚衆。舉凡杭嘉湖寧紹諸郡。兩浙所屬盡支孫。念吾宗元籍海虞。明歸羅利。家北墅。遷西園。濟濟踴踴。歷敘祠堂卅餘世。况鸞翟甲科乙科相蔚起。謀貽弗替。蘇碑焦券鎮靈芝。

又

錢方軾

廟貌壯湖山。崇德報功。隆千百年俎豆馨香。不獨雲礽欽烈祖。版圖拓吳越。安民保境。樹億萬載封疆模範。至今海宇頌前王。

又

錢宗翰

藩鎮痛恣橫。獨能半壁堅持。百戰金甌固吳越。潮流趨險惡。安得先王復起。萬枝鐵脊障江山。

又

錢汝雯

潮用鐵弩射。功用鐵券銘。念先人鐵石心腸。百世勳名高鐵柱。族以錢山稱。縣以錢塘著。願我輩錢家子姓。千年祠墓守錢王。

西湖王祖祠聯

錢文選 士青

討董殲劉。征誅比湯武。稱藩納土。揖讓效唐虞。九八年保障一方。我祖宏規開自昔。樂塘捍海。吳越拓雄圖。課桑訓農。東南興美利。十四州措模全國。生民受賜到於今。

西湖王祖祠慶系堂聯

前人

遠系肇鼓城。更五季吳越開疆。保境安民。用宏堂構。自是文章勳業。代有名流。南北衍雲勳。數典無忘。於此處萬派朝宗。羣峯會極。崇祠基故苑。歷千載滄桑換劫。豐功偉烈。永壯湖山。迄今締造經營。重新廟貌。春秋隆俎豆。孝思勿懈。願後昆恪遵遺訓。不顯前謨。

重修文穆王神道碑聯

前人

守業繼統。夙號賢王。仁厚奠丕基。十四州遺澤孔長。洵堪媲美成康。追躡文景。保境安民。克承先德。焜煌留古蹟。千餘載豐碑屹立。共仰爭光日月。生色湖山。

王祖祠聯

功普東南億萬載。生靈並仰仁風歌罔極。 澤濡吳越千百年。子姓同登壽域頌無疆。

又

三世五王。永受金書玉册。 一門四相。累承銅節銀章。

又

千年明德安吳越。 七葉精忠裕子孫。

御碑

清乾隆

保障江山 忠順貽庠

匾額

海不揚波

又

翁曾桂

砥柱千秋

# 祠產

## 呈市政府將祠產作旌功糧文

呈爲呈請事。西湖錢王祠（卽表忠觀）供奉故吳越國錢氏五王。（武肅。文穆。忠獻。忠遜。忠懿。）神像。自明季由龍山移建於此。西湖之有錢祠。三百年於茲矣。緣錢王當五代時。奄有吳越。保障東南。趙宋開國。受命納土。以故百年間民生不見兵革。加以捍海築塘。功在水利。民到於今。咸受其賜。歷代崇德報功。於春秋致祭外。更於其祠址臺域（龍山表忠觀見蘇軾碑記。龍山卽今江干玉皇山。其地有文穆忠獻兩王墓。）豁免錢糧。民初杭縣派員清丈。由錢氏裔孫承糧納稅。但其時依照旌功產科則。稅額極輕。尙堪擔負。今杭市政征地稅。以地價釐定稅額。在江干玉皇山臺地稅額。已較前增加倍蓰。西湖屬風景區。每畝地價。估計二千五百元。照千分之八抽稅。以全祠大門甬道正殿彭祖殿并兩旁餘屋。及前後面蕩地，綜計地積雖寬。均一無收入之產。若按畝價納稅。恐非需數百元不可。在祠裔方面實無能方繳此鉅款。緬想前王功德。感激非涉於私。將垂後世典型。愛護惟恐不至。爰將錢王祠墓昔時免稅。及現在地稅增高。無力擔負緣由。備文縷述。仰祈於西湖祠址。及江干玉皇山墓地。請援照旌功先例。減輕稅額。俾裔孫等得勉力輸將。遮幾於公於私。得以兼籌并顧。不勝迫切待命之至。謹呈。

杭州市政府

錢王祠裔孫錢世昌

錢雄波

錢皋

錢江

錢若錦謹呈

民國廿三年九月一日

### 杭 市 政 府 通 知 准 作 旌 功 糧

杭 州 市 政 府 通 知 書 土 字 第 一 一 號

案 奉 浙 江 省 政 府 第 一 六 一 號 訓 令。內 開「案 准 財 政 部 賦 字 第 二 二 九 四 號 會 咨。內 開「案 奉 行 政 院 二 十 五 年 一 月 十 三 日 第 二 一 五 號 訓 令。內 開「案 查 前 據 該 部 等 為 呈 為 會 核 浙 江 省 政 府 咨 送 杭 州 錢 王 祠 鳳 凰 寺 岳 王 廟 三 戶。應 減 地 價 稅 清 冊 一 案。會 呈 鑒 核。轉 呈 等 情 到 院。當 經 指 令 准 予 照 辦。並 呈 報 國 民 政 府 鑒 核 備 案 在 案。茲 奉 國 民 政 府 廿 四 年 十 二 月 三 十 一 日 第 三 零 一 零 號 指 令。內 開 呈 件 均 悉。應 准 照 辦。附 件 存。此 令。」等 因。奉 此。除 分 令 外。合 行 令 仰 該 部 知 照。此 令。」等 因。奉 此。相 應 會 同 咨 請 查 照。轉 飭 知 照。」等 由。准 此。查 此 案 前 據 造 冊 呈 請 減 征 地 價 稅。即 經 轉 咨。並 指 令 在 案。准 咨 前 由。合 行 令 仰 該 市 長 知 照。此 令。」等 因。奉 此。相 應 錄 案 通 知。即 希 查 照。此 致 西 湖 錢 王 祠 保 管 委 員 會

市 長 周 象 賢 啓 民 國 廿 三 年 二 月 十 一 日

### 杭 州 錢 王 祠 產 簡 明 表

| 部 圖 | 地 號     | 地 名   | 產 別 | 地 積       | 稅 額 |         | 備 考       |     |
|-----|---------|-------|-----|-----------|-----|---------|-----------|-----|
|     |         |       |     |           | 每 期 | 全 年     |           |     |
| 二 四 | 七 六     | 錢 王 祠 | 地   | 二 七、三 五 二 | 元   | 五 四、七 〇 | 一 〇 九、四 〇 | 祠 基 |
| 二 四 | 七 六 一 一 | 全     | 池 塘 | 三、五 三 二   | 元   | 四 七     | 九 四       | 祠 後 |

表 忠 小 志 洞 産

|   |   |      |              |          |        |      |      |          |
|---|---|------|--------------|----------|--------|------|------|----------|
| 三 | 二 | 二一九一 | 全            | 地        | 二三、五六〇 | 六三   | 一、二六 | 文穆王墓山    |
| 三 | 二 | 一六九七 | 全            | 田        | 一、一九〇  | 〇七   | 一四   |          |
| 三 | 二 | 一六九六 | 全            | 山地       | 三、九四〇  | 一一   | 二二   |          |
| 三 | 二 | 一六九五 | 全            | 田        | 二〇、三〇五 | 三二   | 六四   |          |
| 三 | 二 | 一六九四 | 全            | 地        | 二、一五五  | 〇三   | 〇六   | 文穆王神道碑地  |
| 三 | 二 | 一六五八 | 全            | 池塘       | 三一五    | 〇二   | 〇四   | 在田中間     |
| 三 | 二 | 一六四二 | 江千龍山         | 地        | 一、〇〇〇  | 〇二   | 〇四   |          |
| 二 | 三 | 三三九五 | 上天竺<br>天喜山   | 茶地<br>山地 | 八、八五〇  | 四七   | 九四   | 錢士青捐入錢王祠 |
| 二 | 二 | 一〇一九 | 全            | 田        | 一、八九〇  | 一一   | 二四   | 青石橋路北    |
| 二 | 一 | 八三七五 | 全            | 田        | 二、一三〇  | 一一   | 二四   | 全        |
| 二 | 一 | 七七一三 | 青石橋          | 田        | 二、三二〇  | 一六   | 三二   | 青石橋路南    |
| 二 | 四 | 七七   | 南山路<br>武肅路轉角 | 地        | 一、五五二  | 二、四八 | 四、九六 | 葛敬銘租地建屋  |
| 二 | 四 | 七六一三 | 全            | 全        | 一、五二一  | 二〇   | 四〇   | 洞前       |
| 二 | 四 | 七六一二 | 全            | 全        | 一、一三九  | 一五   | 三〇   | 洞前       |

|   |   |      |       |    |       |    |    |                   |
|---|---|------|-------|----|-------|----|----|-------------------|
| 三 | 二 | 二一九二 | 全     | 坎地 | 三六五   | 〇一 | 〇二 | 文穆王墓基             |
| 三 | 二 | 二二七〇 | 江干妙因山 | 全  | 七、五一九 |    |    | 忠獻王墓地             |
| 二 | 四 | 六九一一 | 錢王祠北面 | 宅地 | 一七九   |    |    | 即宴會廳後牆外路<br>此係保持證 |

以上簡明表圖照攝影列後。共計叁拾捌張。(已載於祠產補編單行本。故從略。)

### 臨安縣將祠產列表通知函

臨安縣政府公函財字第六〇〇號

案查臨邑錢王祠用地。前准 貴會函請援照旌旗照旌功糧減免賦稅。即經飭據田賦徵收處查明用地數目。造具減免田賦簡明表。轉呈在案。茲奉

浙江省政府財字第一九三八號指令。准予彙案核轉。等因奉此。相應檢同原表一份。函請 貴會查照。爲荷。此致

保管西湖錢王祠委員會

縣長何揚烈啓 民國廿五年十一月十二日

計函送 臨邑錢王祠用地減免田賦簡明表一份

### 臨安錢王祠管業證一覽表 民國二十五年十二月頒發

| 鄉  | 區  | 坐    | 落 | 字              | 號 | 產別 | 畝     | 分 | 戶 | 名   | 備              | 考 |
|----|----|------|---|----------------|---|----|-------|---|---|-----|----------------|---|
| 錦城 | 錦城 | 化成寺前 |   | (化字二八)<br>長字六三 |   | 田  | 一、七六八 |   |   | 錢王祠 | 凡有( )者皆是舊字號。田原 |   |







|   |   |               |               |                |       |     |   |
|---|---|---------------|---------------|----------------|-------|-----|---|
| 全 | 全 | 全             | 趙村畝           | (高字九三)<br>中字一三 | 田     | 七〇〇 | 全 |
| 全 | 全 | 西洲畝           | (楊字九二)<br>州字五 | 田              | 二、七〇〇 | 全   |   |
| 全 | 全 | (楊字九二)<br>州字一 | 田             | 四〇〇            | 全     |     |   |

以上管業證共四十六紙。總共

田三十畝八分七厘  
山一百三十一畝六分七厘二毫  
地三十三畝六分六厘八毫

### 復臨安祠堂地不能作公園函

臨安錢王祠經董公鑒。逕復者。茲准 大函內開。奉縣政府函開。安國山麓錢王祠前空地。經建設委員會議決指定規劃公園。並命轉知。以免臨時誤會等因。董等當召集會議。以墓址地山。均經承辦保管。未敢擅專。乞速開會安定辦法。候示以便答復等由。並附摘錄碑文。及縣原函。并糧串等件准此。當經召集在杭同族。於本月二十日在西湖錢王祠開會。徵求同意。僉以開辦公園。固為地方公益。惟查該地係錢武肅王墓祭私產。逐年完糧納稅。執有串據并碑記。班班可考。未便將原有地址。讓與公家。全體一致。未有異詞。除專函蔣代主席及臨安縣政府外。特據情奉復。請轉函為荷。再本族各支散處各省。本日僅在杭一小部份族人集議。未能代表全體。容俟再據情通函各省同宗。俾得共同討論。合併聲明。敬頌

台綏

錢文選 錢宗翰 錢世昌 錢 皋 錢壽彰敬啓

# 雜錄

## 保管西湖錢王祠委員會暫行規則

- 第一條 本規則爲保管西湖錢王祠產而設。凡本會委員應遵守之。
- 第二條 本會保管祠產。凡錢王墳產及附屬一切產業均屬之。
- 第三條 本會委員。由重修錢王祠發起捐款士紳並祠裔及熱心祠事各員組織成之。嗣後如新委員加入。須經本會委員二人以上之介紹。如願辭去。須經本會之議決。
- 第四條 本會委員暫定十五人。內主席一人。文牘會計庶務各二人。
- 第五條 本會管理事項如下。(一)關於田產經租及其他一切事務。(二)關於各種款項收支保存事務。(三)關於祠內器具保管事務。(四)關於春秋祭祀事務。
- 第六條 本會分常會臨時會兩種。常會於春秋祭祀時行之。臨時會由主席或二人以上之請求。得隨時召集。
- 第七條 凡祠內各事。經本會議決後。交由文牘會計庶務辦理之。收入款項。由主席委員。向指定銀行存儲。支用款項。除主管人員蓋章外。並須加蓋主席印章。其收支帳目。應於春秋祭祀時。各公布一次。
- 第八條 春秋祭祀。於武肅王忠懿王誕日舉行。每屆祭祀前。並東遊當地士紳。及各祠裔共同參加。

第九條 本會委員均爲義務職。並不支公費。

第十條 本規則如有未盡事宜。由委員會修改之。

第十一條 本規則呈請市政府備案。

### 保管西湖錢王祠委員會委員

呂戴之 祝甫南 阮毅成 余越園 金潤泉 張毅夫 張忍甫 張佐時 張旭人 羅少秋 錢士青  
錢墨卿 錢厚哉 錢百堅 錢雄波 錢西樵

### 保管臨安錢王祠委員會委員

楊維禮 胡廷濟 潘友三 盛明敏 錢士青 錢繼宇 錢文源 錢文鏞 錢兆芳 錢震 錢美生  
錢學源

### 西湖祠祭日期

(祠產收入無多。僅供祭掃費用。其他暫行停止。)

春祭夏正二月十六日舉行 秋祭夏正八月二十四日舉行

### 西湖墓祭日期

春祭夏正三月初三日舉行 秋祭夏正九月初九日舉行

臨安墓祭日期

祠祭與西湖  
祠祭日期同

春祭夏正二月初三日 風雨  
秋祭夏正十月初三日 舉行

墓所

彭組墓百崗嶺。

洪勝王建初王英顯王暨水邱夫人諸墓 功臣山錢塢壩。

水邱夫人墓 水邱塢定安院旁。

武肅王墓 山安國。

戴夫人墓 西墅明堂山。

武穆王墓 江干玉皇山下。自東至西三十四号自南至北九十九号二分。

馬夫人墓 慶仙鄉良山下。

忠獻王墓 在江干玉皇山下妙因山。該處有石人石馬牌樓均坍塌不全。墓址已無形迹可稽。已失之地業已稽查一部份承領完糧。並於民國丁丑建立新墓。以便祭掃。

忠遜王墓 在紹興昌源田螺石山巖下。翁仲石器。以及祭碑神道。均早毀滅。貼近坟前。尙存斷石柱兩株，其坟之四圍。均無一石。祇有泥尖而已。前清布政使後衛錢寶琛立有石碑一塊。并四址界石。今錄碑石界限於

後。文曰。吳越錢忠遜王之神道。大清道光十六年五月浙江布政使後裔錢寶琛。紹興府知府吳繼昌。山陰縣知縣宋大寅。會稽縣知縣黃世俊謹立。查王坟坐東北。朝西南。坟前有松木七八株。雜木兩三株。闊約六十步。長約八十步。四角立有東南西北界石四塊。惟山上北角已經被人拔去。民國七年記。

忠懿王墓 在河南洛陽縣賢相里陶公原。

### 附記

西湖之濱。兩大祠廟。一錢王祠。一岳廟。春秋香市。游人瞻仰者甚衆。惟多有未知錢岳二王之歷史。茲岳廟有精忠小誌之刊行。本會亦有表忠小志之編輯。任其事者如下。

錢士青 錢墨卿二君供給材料。士青並以五王像功業圖鐵券龍簡等銅鐸版三十六方供給之。可省製版費約在金圓一萬元以上。

錢厚哉 錢西樵二君任編輯。

錢百堅 錢維波二君任總務兼籌劃印費。

錢學源 錢英生二君任校對。英生並繕理稿件。

錢復華 錢平正二君任會計。平正并抄錄錢王祠對聯。

保管西湖錢王祠委員會識

中華民國三十八年一月初版

每冊定價金圓 元

編輯者

保管西泠錢王祠委員會

印刷所

浙江文化印刷公司


杭州：中山中路六二六號  
電話：一 九 八 六

版權所有  
翻印必究

寄售處

杭州市各大書店

6  
262981



43